

यूहन्नासे भिबा थाबा पिन्बा समाचार

चु किताबला बारेरी पाङ्तो:मा

भिबा म्हि: येशूला मुल चेला यूहन्नासे भिबा मुबा। चु यूहन्ना येशूसे माया लबा चेला हिन्ना (यूहन्ना २१:७)। थे जब्दियाला भा ओच्छे याकूबला आले हिन्ना (मत्ती ४:२१)।

भिबा ग्ला: एफिसस शहररी भिबा मुबा।

भिबा साल: ओस्पन ईश्वी संवत् ८०-९५ (विक्रम संवत् १३७-१५२) सालला गुडरी भिबा मुबा। चु जम्मान भन्दा लिच्छा भिबा थाबा पिन्बा समाचार हिन्ना।

खाल्दा भिबा: यहूदी धर्म तेन्बा अर्गु यहूलला म्हिगदेदा येशू ख्रीष्टनोन परमेश्वर हिन्ना भिसी उन्बाला लागिरी भिबा मुबा।

चु थाबा पिन्बा समाचाररी येशू जुकजुकधोनाला जुनी पिन्बा बचन हिन्ना। ओच्छे थे बचन म्हि दोसी जम्बुलिडरी मुबा म्हिगदेला गुडरी धन्छयाजी भिसी भिबा मुला। येशू परमेश्वरला भादेन कबुल लबा थाबा पिन्बा ग्ले हिन्ना भिसी चु थाबा पिन्बा समाचार पढब लबागदेसे येशूदा विश्वास लगै ओच्छे थेनीगदेसे जुकजुकधोनाला जुनी याङ्गै भिसी भिबा हिन्ना (यूहन्ना २०:३१)।

चु किताबरी बचनदेन येशू गिकनोन हिन्ना भिसी भिबा मुला। चु थाबा पिन्बा समाचारला डाच्छाला भोरी येशूसे लबा उदेकला गेगदेला बारेरी पाङ्बा मुला। ओच्छे येशून परमेश्वरला भादेन कबुल लबा थाबा पिन्बा ग्ले हिन्ना भिसी पाङ्बा मुला। डाच्छाला भोरी प्रभुसे लबा उदेकला गेगदेग्याम तिग उन्बा मुला भिबा ताम येशूसे सुङ्बा बचनग्यामनोन ज्यना लसी घोबारी खम्ला। चु भोरी चा म्हिगदेसे खाहङ् लसी येशूदा विश्वास लसी चेला दोजी ओच्छे स्थान्दोसे थेदा बिरोध लसी विश्वास आलनी भिबा तामला बारेरी

पाङ्बा मुला। जमाहेन्से १३ अध्यायहेन्से १७ अध्याय न्हडरी येशूसे हाडदा चुङ्बाकुनु म्हुनड हाडला चेलागदेदेन छ्याम संगती लबा तामदेन हाड कुसरी सिबा भन्दा डाच्छा हाडला चेलागदेदा होशियार तना लबान आँट पिन्बा तामगदेला बारेरी भिबा मुला। लिच्छाला अध्यायगदेरी चा येशूदा चुङ्बा तामला बारेरीदेन येशूला सेम च्याबा तामला बारेरी भिबा मुला। थेहङ् लसीन येशू कुसरी सिबा तामला बारेरीदेन सिबाग्याम सोबा तामला बारेरी ओच्छे येशू हाडला चेलागदे मुबा ग्लारी फेप्खबा तामला बारेरीनोन भिबा मुला।

यूहन्नासे जुकजुकधोनाला जुनी चा ख्रीष्टग्याम याङ्मुला ओच्छे येशूदा परमेश्वर मुबा ग्लारी भोर्बा ग्यामदेन सत्य ओच्छे जुनी हिन्ना भिसी विश्वास लसी थे मुबा ग्लारी खबागदेसे जे याङ्ला भिसी लोप्बा मुला। चु थार्बा पिन्बा समाचाररी उदेकला ताम तिग मुला भिसम म्हिगदेदा आत्माला ताम घोना लबाला लागिरी क्युइदेन गेड ओच्छे य्हाल, गोठालोदेन ग्यु, थेहङ् लसीन अङ्गुरला दोडदेन रोगदे हङ्बा जम्मासेन घोबारी खम्बा उखानगदेग्याम सुङ्बा मुला।

मुल तामगदे

- बचन म्हि दोसी न्हबा १:१-१८
- बप्तिस्मा पिन्बा यूहन्नादेन येशूला चेलागदे १:१६-५१
- येशूसे म्हिगदेला गुडरी लबा गे २:१-१२:५०
- येशू सिबा भन्दा डाच्छा हाडला चेलागदेदेन छ्याम लबा तामगदे १३:१-१७:२६
- येशूदा कुसरी टाँगब लबा १८:१-१९:४२
- येशू सिबाग्याम सोसी हाडला चेलागदे मुबा ग्लारी फेप्खबा २०:१-२१:२५

यूहन्नासे भिबा थार्बा पिन्बा

समाचार

बचन म्हि दोसी न्हबा

१ जम्बुलिङ स्होबा भन्दा डाच्छान बचन भिबा मुबा, थे बचन परमेश्वरदेन छ्याम मुबा, ओच्छे बचननोन परमेश्वर मुबा। २जम्बुलिङ स्होबा भन्दा डाच्छाहेन्सेन थे परमेश्वरदेन छ्याम मुबा।

३परमेश्वरसे जम्मान स्हे थेनोन बचनग्याम स्होजी। परमेश्वरसे स्होबा स्हेगदे न्हडरी बचनग्याम आस्होबा स्हे तिगैनोन आरे। ४बचनसे स्होबा जम्मान स्हेगदेसे थेनोन बचनग्याम जुनी याङ्जी। थेनोन जुनी जम्मान म्हिगदेला य्हाल हिन्ना। ५थे य्हाल धोपधोपरी य्हाल य्हाल तला, ओच्छे धोपसे थे य्हालदा खाइमै साइबारी आखम।

६परमेश्वरसे म्हि गिक पुइखबा मुबा, थेला मिन यूहन्ना मुबा।* ७थेग्यामसेन जम्मान म्हिगदेसे थे य्हालदा विश्वास लगै भिसी परमेश्वरसे थेदा थे य्हालला

बारेरी पाङ्बाला लागिरी पुइखबा मुबा। ८थे चा थे य्हाल आहिन्बा मुबा। तर थे य्हालला बारेरी म्हिगदेदा घोना लबारी थे खबा मुबा।

९जम्मान म्हिगदेदा ज्ञान बुद्धि पिन्बा सत्य य्हाल चा जम्बुलिङरी फेप्खबान मुबा। १०थे जम्बुलिङरी मुबा, जम्बुलिङ थेग्यामसेन स्होबा हिन्ना। तसैनोन जम्बुलिङला म्हिगदेसे थेदा डोआसेनी। ११थे हाडलान म्हिगदे मुबा ग्लारी फेप्खजी। तर थेदा हाडलान म्हिगदेसे मान आलनी। १२तर जुन म्हिसे थेदा मान लसी थेथोरी विश्वास लजी, थेनीगदेदा थेसे परमेश्वरला सन्तान दोबा हक पिन्जी। १३थेनीगदे म्हिला सेमसे म्हन्बा अन्छार खजिबै म्हिला ल्हुङ्ग्याम न्हबा आहिन। थेनीगदे परमेश्वरसे स्होबा परमेश्वरलान कोलागदे हिन्ना।

१४चुनोन बचन म्हि दोसी न्हजी, ओच्छे दयामायादेन सत्यसे प्लिङ्सी

थे य्हाडला गुडरी धन्छयाजी। डन्से थेला घेन य्हालदेन शक्ति म्राङ्जी, थे य्हालदेन शक्ति परमेश्वरला गिकजेन भाला मुबा।

१५ यूहन्नासे थेला बारेरी चुहङ् भिसी क्रिङ्बान पाङ्जी, “डा भन्दा लिच्छा फेप्खबा चा डा भन्दा घेन म्हि हिन्ना। तिग्दा भिसम थे डा भन्दा डाच्छाहेन्सेन मुबा। थे म्हिला बारेरी डाङ् डाच्छान पाङ्बा मुबा।”

१६ थे दयामायासे प्लिङ्बा मुला। थेतबासेलमा थेग्यामसेन य्हाडसे दयामायाथोरी दयामाया याङ्बा मुला। १७ तिग्दा भिसम परमेश्वरसे य्हाडदा मोशाग्याम ठिम पिन्मुबा। तर येशू ख्रीष्टग्याम चा दयामायादेन सत्य ताम पिन्बा मुला। १८ परमेश्वरदा खालैसेन खाइमै म्राङ्बा आरे। तर परमेश्वर आबादेन छ्याम मुबा थेला गिकजेन भा परमेश्वरसेन य्हाडदा परमेश्वर आबा खाहङ्बा मुला भिसी उन्बा मुला।

बप्तिस्मा पिन्बा यूहन्नासे पाङ्बा ताम

मती ३:१-१२; मर्कस १:१-८;

लूका ३:१-१८

१९ यरूशलेम शहरग्याम यहूदीगदेसे परमेश्वरला मन्दिररी पूजा लबागदेदेन

लेवीगदेदा यूहन्ना मुबा ग्लारी थे खाल चीम? भिसी ड्योइबारी पुइमा यूहन्नासे थेनीगदेदा चुहङ् भिसी पाङ्मुबा। २० थेसे थेनीगदेदा “डा थाबा पिन्बा ख्रीष्ट हिन्नोन आहिन” भिसी सत्य ताम पाङ्जी।

२१ जमाहेन्से थेनीगदेसे यूहन्नादा “थेहङ् भिसम ए खाल हिन्ना? तिग ए एलिया हिन्ना” भिसी ड्योइजी।

तर यूहन्नासे “डा आहिन” भिसी जोहाब पिन्जी।

दो:सी थेनीगदेसे “तिग ए थेनोन अगमवक्ता हिन्ना?” भिसी ड्योइमा,

यूहन्नासे “डा थे अगमवक्ताएनोन आहिन” भिसी जोहाब पिन्जी।† *

२२ जमाहेन्से दो:सीनोन थेनीगदेसे यूहन्नादा “ए खाल हिन्ना? डन्दा पाङ्गो। डन्दा चुरी पुइखबा म्हिगदेदा एला बारेरी पाङ्तो:बा मुला। थेतबासेलमा ए खाल हिन्ना? डन्दा पाङ्गो” भिसी भिमा,

२३ यूहन्नासे थेनीगदेदा “यशैया अगमवक्तासे पाङ्बा हङ्गोन ‘परमप्रभु भ्रबाला लागिरी थेला ग्याम सोजो स्होउ’ भिसी तोडतोडबा ग्लारी क्रिङ्बा म्हि गिकला काइ डानोन हिन्ना” भिसी पाङ्जी। *

१:२१ चु पदरी “थे अगमवक्ता” भिबा चा ठिमला किताबरी यहूदीगदेदा पुइखला भिसी पाङ्बा अगमवक्ताला बारेरी हिन्ना।

१:२१ ठिम १८:१५, १८; मला ४:५ १:२३ यशै ४०:३

२४ थेनीगदे न्हडला कोइ कोइ फरिसीगदेसे २५ यूहन्नादा “ए थाबा पिन्बा खीष्टएनोन आहिन, एलियाएनोन आहिन, ओच्छे थे अगमवक्ताएनोन आहिन भिसम तिगदा बप्तिस्मा पिन्बा?” भिसी ड्योइजी।

२६ जमाहेन्से यूहन्नासे थेनीगदेदा “डाइ क्युइसे बप्तिस्मा पिन्बा मुला, तर एनीगदेला गुडरी खालै गिक मुला थेदा एनीगदेसे डोसेबा आरे। २७ डा भन्दा लिच्छा फेप्खबा चा थेनोन हिन्ना। डा थेला लखमला तुना ब्लबाधोनाला आरे” भिसी भिजी।

२८ चु ताम यर्दन स्योडला क्याम्सडपट्टि बेथानिया भिबा नाम्सारी तबा मुबा, थेरीन यूहन्नासे म्हिगदेदा बप्तिस्मा पिन्बान मुबा।

परमेश्वरला भा

२९ न्हडगरदड येशू हाड मुबा ग्लारी फेप्खबान लबा म्राइसी यूहन्नासे चुहङ् भिजी, “च्यागो, जम्बुलिडरी मुबा जम्मान म्हिदा पापग्याम फेबा परमेश्वरसे पुइखबा ग्ले!” ३० थेला बारेरी डाइ डाच्छान पाडुबा मुबा, ‘डा भन्दा लिच्छा म्हि गिक फेप्खबान मुला, थे डा भन्दा शक्तिशाली मुला। तिगदा भिसम थे डा न्हबा भन्दा डाच्छाहेन्सेन मुबा।’ ३१ थे खाल हिन्ना भिबा ताम डादा था आरेबा,

तर इस्राएलीगदेसे थेदा डोसेगै भिसीन डाइ क्युइग्याम बप्तिस्मा पिन्बान खबा हिन्ना।”

३२ यूहन्नासे अफ हाडसे म्राइबा ताम चुहङ् भिसी पाइजी, “डाइ परमेश्वरला आत्मा ढुकुर हङ् लसी स्वर्गग्याम फेप्खसी थेथोरी धन्छ्याबा म्राइजी। ३३ डाइ अफ थेदा डोसेबा आरेबा, तर क्युइग्याम बप्तिस्मा पिन्गो भिसी डादा पुइखबासेन, ‘एसे जुन म्हिथोरी परमेश्वरला आत्मा फेप्खसी धन्छ्याबा म्राइला, थेसेन परमेश्वरला आत्माग्याम बप्तिस्मा पिन्ना’ भिसी सुइजी। ३४ थेथोरी परमेश्वरला आत्मा फेप्खबा डाइ म्राइबा मुला। थेतबासेलमा डाइ पाइबा चु ताम सत्य हिन्ना, परमेश्वरला भा चा थेनोन हिन्ना।”

येशूसे डाच्छा धम्बा चेलागदे

३५ दोःसी न्हडगरदड यूहन्ना हाडला चेलागदे न्हडला न्हीदेन छ्याम राप्सी चिबा मुबा। ३६ येशू फेप्बान लबा म्राइसी यूहन्नासे, “च्यागो, परमेश्वरसे पुइखबा ग्ले!” भिसी पाइजी। ३७ चु ताम थेःसी यूहन्नाला चेला न्ही येशूला लिच्छा लिच्छा निजी।

३८ येशूसे फ्लिक दोःसी स्हीमा, थेनीगदे लिच्छा लिच्छा खबान लबा

१:२९ “परमेश्वरसे पुइखबा ग्ले” भिसी भिबा तामदा ग्रीक बाइबलरी परमेश्वरसे पुइखबा ग्यु बोगो भिसी भिबा मुला। चु ताम १:३६ पदरीनोन मुला।

म्राङ्सी येशूसे थेनीगदेदा “एनीगदेसे तिग म्हाइबा?” भिसी ड्योइजी। जमाहेन्से थेनीगदेसे येशूदा “गुरु हाड खानड धन्छ्यामुला?” भिसी ड्योइमा,

३६ येशूसे थेनीगदेदा “डादेन छ्याम खउ, एनीगदेसे म्राङ्ला” भिसी सुङ्जी। जमाहेन्से थेनीगदे येशूदेन छ्याम निजी, ओच्छे येशू धन्छ्याबा ग्ला म्राङ्जी। जमाकुनु ओस्पन ड्यसेला चार बजब तसी जिन्बासे लमा थेनीगदे येशूदेन छ्याम चिजी।

४० यूहन्नासे पाङ्बा ताम थे:सी येशूदेन छ्याम निबा थे चेला न्ही न्हडला गिक चा सिमोन पत्रुसला आले अन्द्रियास मुबा। ४१ थेसे डाच्छा हाडला ज्योज्यो सिमोनदा स्याप्सी, “डन्से मसीहदा स्याप्जी,” भिसी पाङ्जी। हिबू ग्योइरी “मसीह” भिबा चा “थार्बा पिन्बा खीष्ट” भिबा हिन्ना। ४२ थेसे सिमोनदा येशू मुबा ग्लारी भजी।

येशूसे सिमोनदा स्हीसी, “ए योनाला भा सिमोन हिन्ना, एला मिन केफास हिन्ना” भिसी सुङ्जी। केफास भिबा चा ग्रीक ग्योइरी पत्रुस भिबा हिन्ना।†

फिलिपदेन नथानेल

४३ न्हडगरदड येशू गालील अञ्चलरी नितो:जी भिसी फेप्मा

फिलिपदा स्याप्जी। ओच्छे येशूसे थेदा “डादेन छ्याम भ्रउ” भिसी सुङ्जी। ४४ फिलिपएनोन पत्रुसदेन अन्द्रियासलान शहर बेथसेदाला मुबा। ४५ जमाहेन्से फिलिप नथानेलदा हुप तबारी निजी। ओच्छे नथानेलदा चुहङ् भिसी पाङ्जी, “मोशासे भिबा ठिमदेन अगमवक्तागदेसे जुन म्हिला बारेरी पाङ्बा मुबा, डन्से थे म्हिदा स्याप्बा मुला। थे योसेफला भा नासरतला येशू हिन्ना।”


४६ नथानेलसे थेदा “तिग नासरत-ग्यामसेनोन तिगै ज्यबा स्हे खला?” भिसी ड्योइमा, फिलिपसे थेदा “खसी च्यागो” भिसी जोहाब पिन्जी।

४७ नथानेल हाड मुबा ग्लारी खबान लबा म्राङ्सी येशूसे थेला बारेरी “तिगै लुसीला ताम आलबा पक्का इस्राएलीदा च्यागो” भिसी सुङ्जी।

४८ नथानेलसे येशूदा “हाडसे डाला बारेरी खाहङ् लसी था याङ्जी?” भिसी ड्योइमा, येशूसे थेदा “फिलिपसे एदा ड्योइबारी निबा भन्दा डाच्छान डाइ एदा अञ्जीरला दोड टारी म्राङ्मुबा” भिसी जोहाब पिन्जी।

४९ जमाहेन्से नथानेलसे येशूदा “रब्बी, हाडनोन परमेश्वरला भा इस्राएलला ग्ले हिन्ना” भिसी भिजी।

५० येशूसे थेदा “डाइ एदा अञ्जीरला दोड टारी म्राङ्जी भिबासे लमा एसे



ब्याहला भोजरी येशूसे लबा उदेकला गे (२:६)

विश्वास लबा आहिन? एसे अभ चु भन्दान घेन घेन तामगदे म्राङ्ला” भिसी सुङ्जी। ^{४१}दोःसी येशूसे थेनीगदेदा “च्यागो, एनीगदेसे डाला ताम ड्यान्गो, एनीगदेसे स्वर्ग ठोङ्बादेन परमेश्वरला दूतगदे परमेश्वरसे पुइखबा म्हिथोरी फाप्खवान लबा तोर निबान लबा म्राङ्ला” भिसी सुङ्जी। *

काना भिबा नाम्सारी लबा ब्याह

२ सोमरेमाकुनु गालील अञ्चल-ला काना भिबा नाम्सारी ब्याह गिक मुबा। थेरी येशूला आमाएनोन मुबा। ^२थे ब्याहरी येशूदेन येशूला चेलागदेदाएनोन निम्तो पिन्बा मुबा।

^३अङ्गुरला निङ्गु जिन्माहेन्से येशूला आमासे येशूदा “थेनीगदेदेन छ्याम अङ्गुरला निङ्गु आरे” भिसी भिजी।

^४चु ताम थेःसी येशूसे “चु य्हाङला गे आहिन। डाइ गे लबा धुइ अभ तबा आरे” भिसी सुङ्जी। ^५जमाहेन्से येशूला आमासे नोकरगदेदा “येशूसे एनीगदेदा जे लउ भिसी कुल्ला, थेनोन लउ” भिसी पाङ्जी।

^६ओच्छे थेरी युङ्बा ट्वाइसी स्होबा ओस्पन बोगल ब्लिहेन्से ग्यार्जा गिक लिटर क्युइ वाङ्बा गोर दु युङ्बाला फुम्बा मुबा। थे फुम्बारी चा यहूदीगदेला ठिम अन्छार चोख्याब लबाला लागिरी क्युइ थान्मुबा। ^७येशूसे थेरी मुबा नोकरगदेदा “चु

जम्मान फुम्बारी क्युइ प्लिङ्ना लउ” भिसी कुल्जी। जमाहेन्से थेनीगदेसे थे जम्मान फुम्बा नाड नाड क्युइ प्लिङ्ना लजी।

८ ओच्छे येशूसे थेनीगदेदा “चु जजाकर भोर्सी भोजला मुल म्हिदा म्हाङ्पुङ्गो” भिसी कुल्जी। जमाहेन्से थेनीगदेसे भोर्सी मुल म्हिदा पिन्जी। ९ मुल म्हिसे म्हाङ्बा धुइरी थे क्युइ अङ्गुरला निङ्गु दोसी जिन्बा मुबा। थेदा थे निङ्गु खानङ्ग्याम भजी भिबा ताम था आरेबा, तर थे क्युइ युबा नोकरगदेदा चा था मुबा। जमाहेन्से थे मुल म्हिसे म्हाछारदा ड्योइसी, १० “जम्मान म्हिसे डाच्छा अङ्गुरला ज्यबा निङ्गु पिन्मुला। ओच्छे डोन्बोगदे ड्योइमाहेन्से लिच्छा अङ्गुरला आज्यबा निङ्गु पिन्मुला। तर एसे मी दान्दे धोनान ज्यबा निङ्गु पिन्बान मुला” भिसी भिजी।

११ येशूसे लबा उदेकला गेगदे न्हङ्गरी गालील अञ्चलला काना भिबा नाम्सारी लबा उदेकला गे चा जम्मान भन्दा डाच्छा लबा हिन्ना। चु उदेकला चिनुग्याम येशूसे हाडला शक्ति उन्जी। चु म्हाङ्सी थेला चेलागदेसे थेदा विश्वास लजी।

१२ जमाहेन्से येशू हाडला आमा, आले, चेलागदेदेन छ्याम कफर्नहुम

भिबा शहररी फेप्जी। ओच्छे तिगै धिनधोना थेनीगदे थेरीन धन्छ्याजी।*

येशू परमेश्वरला मन्दिररी फेप्बा

मत्ती २१:१२-१३; मार्कस ११:१५-१७;

लूका १९:४५-४६

१३ यहूदीगदेसे मिश्र यहूल्साग्याम फेसी खबा धिनदा ढन्सी धङ्बा चाड खबारी छ्याइबा मुबा। थे धुइरी येशू यरूशलेमरी फेप्जी।* १४ येशूसे म्हिगदेदा परमेश्वरला मन्दिररी† ग्यु, बहर, ढुकुर चूङ्बा किन्बा लबादेन टेबुलरी टाङ्गा थान्सी टाङ्गा देप्सी चिबा म्हाङ्जी। १५ जमाहेन्से येशूसे छोला कोर्ना स्होसी मन्दिररी मुबा ग्युगदेदेन बहरगदे जम्मादान ताप्जी, ओच्छे टाङ्गा देप्सी चिबागदेला टाङ्गागदे भ्याङ्सी टेबुल प्लाड प्लिङ लसी पिन्जी। १६ ढुकुर चूङ्बागदेदा येशूसे “चु जम्मान स्हे चुग्याम भोर्गो। डाला आबाला दिमदा व्यापार लबा दिम थास्होउ” भिसी सुङ्गी।

१७ थे धुइरी येशूला चेलागदेसे परमेश्वरला बचनरी, “परमेश्वर! हाडला दिमला लागिरी डाइ लबा मायासे लमा डा सिबा तेबान तबा मुला” भिसी भिबा ताम ढन्जी।*

१८ यहूदी नेतागदेसे येशूदा “हाडदा चु गे लबाला लागिरी अधिकार मुबा

२:१४ यरूशलेमरी परमेश्वरला मन्दिर गिक जे मुबा।

२:१२ मत्ती ४:१३ २:१३ प्रस्था १२:१-२७ २:१७ भजन ६६:६

हिन्सम डन्दा ह्वाडसे तिग चिनु उन्बारी खम्ला?” भिसी भिजी।

१६ येशूसे थेनीगदेदा “एनीगदेसे चु मन्दिर फुप्पो, डाइ चु सोमरेरी स्होला” भिसी सुङ्जी।* २० जमाहेन्से यहूदी नेतागदेसे येशूदा “परमेश्वरला चु मन्दिर स्होबारी डन्दा बोगल न्हीसे दु दिङ लगब तजी भिसम ह्वाडसे चा खाहङ् लसी सोमरेरी स्होखम्ला?” भिसी ड्योङ्जी। २१ तर येशूसे जुन मन्दिरला बारेरी सुङ्बा मुबा, थे मन्दिर चा ह्वाडलान ल्हुइ मुबा। २२ येशू सिबाग्याम सोमाहेन्से येशूसे सुङ्बा चु ताम चेलागदेसे ढन्जी। जमाहेन्से थेनीगदेसे परमेश्वरला बचनरी भिबा तामदेन येशूसे सुङ्बा तामरी विश्वास लजी।

२३ मिश्र यहुल्साग्याम फेसी खबा धिनदा ढन्सी धङ्बा चाडला धुइरी येशू यरूशलेमरी मुबा। थेरी येशूसे लबा उदेकला गे म्राङ्सी ल्हानान म्हिगदेसे येशूदा विश्वास लजी। २४ तर थेनीगदेसे लबा विश्वासदा येशूसे पत्याब आतनी। तिगदा भिसम जम्मान म्हिगदेला सेमला ताम येशूदा था मुबा। २५ जम्मान म्हिला सेमला ताम था मुबासे लमा खालै सेन म्हिला बारेरी येशूदा खालै सेन पाङ्तोःबा आरेबा।

निकोदेमस येशूदा स्याप्बारी निबा

३ फरिसीगदे न्हडला निकोदेमस भिबा म्हि गिक मुबा। थे यहूदी नेतागदे न्हडला गिक मुबा। २ थे तिरेकुनु म्हुनङ येशू मुबा ग्लारी निसी येशूदा “गुरु, ह्वाड डन्दा लोप्बारी परमेश्वरग्याम फेप्खबा हिन्ना भिबा डन्दा था मुला। तिगदा भिसम परमेश्वरसे हो आलनी भिसम ह्वाडसे लबा हङ्बा शक्तिशाली गेगदे खालै सेन लबारी आखम” भिसी भिजी।

३ येशूसे थेदा “च्यागो, एसे डाला ताम ड्यान्गो, खालै म्हि तोरग्याम^३ आन्हतेधोना परमेश्वरला यहुल्सादा म्राङ्बारी आखम” भिसी सुङ्जी।

४ चु ताम थेःसी निकोदेमससे येशूदा “खेप्बा दोसीनोन म्हि खाहङ् लसी दोःसी न्हबारी खम्ला? तिग थे दोःसी आमाला फो न्हडरी वाङ्सी न्हबारी खम्ला?” भिसी भिजी।

५ जमाहेन्से येशूसे थेदा चुहङ् भिसी सुङ्जी, “च्यागो, एसे डाला ताम ड्यान्गो, खालै म्हि क्युइदेन आत्माग्याम आन्हतेधोना परमेश्वरला यहुल्सारी वाङ्आम्याङ्। ६ ल्हुइग्याम न्हबा ल्हुइ हिन्ना, तर परमेश्वरला आत्माग्याम न्हबा आत्मा हिन्ना।

३:३ “तोरग्याम” भिबा चा ग्रीक बाइबल अन्छार दोःसीनोन भिबा हिन्ना। चुला अर्थ चा परमेश्वरला आत्माग्याम भिबा हिन्ना। चु ताम ३:७ देन ३१ रीनोन मुला।

२:१६ मत्ती २६:६१; २७:४०; मार्क १४:५८; १५:२६

७ डाइ एदा तोरग्याम न्हतोःला भिसी पाङ्मा ए उदेक थातउ। ८ लाबा खानडपट्टि निम्हन्जी थेनोनपट्टि निमुला। लाबा खबा एसे था याङ्मुला, तर थे खानडग्याम खजी खानडपट्टि निजी भिबा एदा था आरे। परमेश्वरला आत्माग्याम न्हबा म्हिगदेएनोन थेहङ्बान तमुला।”

९ निकोदेमससे येशूदा “चु खाहङ् लसी तखम्ला?” भिसी ड्योइजी।

१० जमाहेन्से येशूसे थेदा चुहङ् भिसी सुङ्जी, “ए इस्राएलीगदेला गुरु तसीनोन चु ताम आघोनी? ११ च्यागो, एसे डाला ताम ड्यान्गो, डन्से मी ह्वाङ्से म्हाङ्बा तामदेन था याङ्बा ताम जे पाङ्मुला। तर डन्से पाङ्बा ताम एनीगदेसे विश्वास आलमुला। १२ डाइ जम्बुलिङरी मुबा स्हेला बारेरी पाङ्मा मी एनीगदेसे विश्वास आलमुला भिसम स्वर्गला बारेरी पाङ्मा एनीगदेसे खाहङ् लसी विश्वास लबारी खम्ला? १३ “स्वर्गग्याम खबा परमेश्वरसे पुइखबा म्हि बाहेक स्थान्दो खालैनोन स्वर्गरी निबा आरे। १४ यहूदीगदे तोडतोडबा ग्लारी मुबा धुइरी मोशासे पित्तलला पुख्री स्होसी सिङरी ठोक्सी च्योबा हङ् परमेश्वरसे पुइखबा म्हिदाएनोन च्योला।* १५ ओच्छे जुन जुन म्हिसे थेदा विश्वास लला, थेनीगदेसे जुकजुकधोनाला जुनी याङ्ला।

१६ “तिग्दा भिसम परमेश्वरसे जम्बुलिङदा ल्हानान माया लसी ह्वाङ्ला गिक जेन भा पुइखजी। थेदा विश्वास लबागदे खालै नाश थातगै, तर जुकजुकधोनाला जुनी याङ्गै भिसीन चुहङ् लबा हिन्ना। १७ तिग्दा भिसम परमेश्वरसे ह्वाङ्ला भादा जम्बुलिङदा सजाय पिन्बारी पुइखबा आहिन। तर थेग्याम जम्बुलिङसे थार्बा याङ्गै भिसी पुइखबा हिन्ना। १८ जुन म्हिसे परमेश्वरला भाथोरी विश्वास लला, थेला दोष आउन। तर विश्वास आलबा म्हिला चा डाच्छान दोष उन्सी जिन्बा तला। तिग्दा भिसम थेसे परमेश्वरला भादा विश्वास आलनी। १९ दोषी खाहङ् लसी तला भिसम य्हाल जम्बुलिङरी खसी जिन्सैनोन म्हिगदेदा य्हाल भन्दा धोपधोपनोन सेम निजी। तिग्दा भिसम थेनीगदेसे लबा गेनोन आज्यबा मुबा। २० आज्यबा गे लबागदेसे य्हालदा हेला लमुला। तिग्दा भिसम य्हालरी खमाहेन्से थेनीगदेसे लबा आज्यबा गे जम्मासेन म्हाङ्ला भिसी थेनीगदे य्हालरी आखबा हिन्ना। २१ तर थेसे लबा जम्मान गे परमेश्वरदेन छ्याम गिक तसी लबा हिन्ना भिसी जम्मासेन म्हाङ्गै भिसी सत्य तामदा तेन्बा म्हि य्हालरी खबा हिन्ना।”

बप्तिस्मा पिन्बा यूहन्नासे येशूला बारेरी दोःसी पाङ्बा

२२ जमाहेन्से येशू हाडला चेलागदेदेन छ्याम यहूदिया अञ्चलरी फेप्सी तिगै धिनना लागिरी थेनीगदेदेन छ्याम थेरी धन्छ्याबा धुइरी म्हिगदेदा बप्तिस्मा पिन्बान मुबा। २३ यूहन्नासेनोन सालीम भिबा ग्लाला डामरी मुबा एनोन भिबा ग्लारी बप्तिस्मा पिन्बान मुबा। तिग्दा भिसम थेरी ल्हानान क्युइ मुबा, ओच्छे म्हिगदे थेरी खसी बप्तिस्मा किन्बान मुबा। २४ थे धुइधोना यूहन्ना भयाल्खानरी परब तबा आरेमुबा। *

२५ थेनोन धुइरी यूहन्नाला चेलागदे यहूदी गिकदेन छ्याम चोखो तबाला बारेरी ताम लबान मुबा। २६ जमाहेन्से थेनीगदे यूहन्ना मुबा ग्लारी खसी, “गुरु, यर्देन क्याम्सड मुबा धुइरी हाडसे डन्दा म्हि गिकला बारेरी सुइमुबा, थे म्हि हाडदेन छ्यामनोन मुबा। दान्दे थेसेनोन बप्तिस्मा पिन्बान मुला, ओच्छे जम्मान म्हिगदे थे मुबा ग्लारी निबान मुला” भिसी भिजी।

२७ यूहन्नासे थेनीगदेदा चुहड भिसी जोहाब पिन्जी, “परमेश्वरसे आपिन्तेधोना म्हिसे तिगै स्हे आयाड्। २८ डा थार्बा पिन्बा ख्रीष्ट आहिन, तर थे भन्दा डाच्छा पुइखबा म्हि जे हिन्ना’ भिसी डाला बारेरी पाङ्बा ताम

एनीगदेदान था मुला।* २९ जुन म्हिदेन छ्याम चाडछार चिला थेनोन म्हाछार हिन्ना। म्हाछारदेन छ्याम राप्बा म्हि म्हाछारला काइ थेःसी ल्हानान ताड्मुला। थेहड् लसीन डाएनोन ल्हानान ताङ्बा मुला। ३० दाहेन्से ख्रीष्ट चा बढब तबान नितोःला, तर डा चा घटब तबान नितोःला।

स्वर्ग्याम फेप्खबा परमेश्वरला भा

३१ “तोरग्याम फेप्खबा चा जम्मान भन्दा घेन मुला। जम्बुलिडरी न्हबा म्हिगदे चा जम्बुलिडलान हिन्ना, ओच्छे जम्बुलिडलान ताम लमुला। तर स्वर्ग्याम फेप्खबा चा जम्मान भन्दा घेन मुला। ३२ थेसे हाडसे म्हाड्बादेन थेःबा तामनोन सुइमुला, तर थेला ताम खालैसेन विश्वास आलमुला। ३३ जुन म्हिसे थेला तामदा विश्वास लला, थेसे चा परमेश्वर सत्य हिन्ना भिबा तामला प्रमाण उन्ना। ३४ परमेश्वरसे पुइखबा म्हिसे परमेश्वरलान ताम पाङ्गला। तिग्दा भिसम परमेश्वरसे थेदा हाडला पूरान आत्मा पिन्बा मुला। ३५ परमेश्वरसे हाडला भादा माया लबा मुला, ओच्छे थेदा जम्मानथोरी शासन लबा अधिकार पिन्बा मुला।* ३६ थेतबासेलमा जुन म्हिसे परमेश्वरला भादा विश्वास लला थेसे जुकजुकधोनाला जुनी याङ्गला। तर

जुन म्हिसे परमेश्वरला भासे कुल्बा ताम आङ्गयान थेसे जुकजुकधोनाला जुनी आयाङ्। बरु थेसे परमेश्वरग्याम खबा सजाय नातोःला।”

येशूदेन सामरी यहुलला म्रिडम्हेमे

४ यूहन्नासे भन्दा येशूसे ल्हानान चेलागदे स्होबा मुला, ओच्छे बप्तिस्माएनोन पिन्बान मुला भिसी फरिसीगदेसे थेःजी भिबा ताम येशूदा था मुबा। २ बप्तिस्मा पिन्बा चा चेलागदेसे पिन्मुबा तर येशू हाङसेन चा आहिन मुबा। ३ फरिसीगदेसे थेःबा ताम था याङ्माहेन्से येशू यहूदिया अञ्चल रूलासी गालील अञ्चलरी दोःसी फेप्जी।

४ येशू गालील अञ्चलरी फेप्मा सामरिया अञ्चलग्याम फेप्तोःमुबा। ५ थेतबासेलमा येशू सामरिया अञ्चलला सुखार भिबा शहररी धोखजी। चु शहर चा याकूबसे हाङला भा योसेफदा पिन्बा बुला डामरी मुबा।* ६ थेरी याकूबला इनार मुबा। भ्रना भ्रना ब्लप्बासे लमा येशू थे इनारला कुनीरी धन्छ्याबा मुबा। थे धुइरी ओस्पन धिनी गडसल तबा मुबा।

७ थेनोन धुइरी सामरी यहुलला म्रिडम्हेमे गिक थे इनाररी क्युइ

किन्बारी खजी। येशूसे थेदा “डादा क्युइ थुङ्बारी भउ” भिसी सुङ्जी। ८ येशूला चेलागदे चा चबा स्हे ग्लुबारी शहररी निबा मुबा।

९ सामरी यहुलला म्रिडम्हेमेसे येशूदा “हाङ यहूदी यहुलला म्हि तसीनोन डा हङ्बा सामरी यहुलला म्रिडम्हेमेदेन छ्याम तिगदा क्युइ ह्रीबा?” भिसी भिजी। तिगदा भिसम यहूदीगदेसे सामरीगदेदेन छ्याम संगतनोन आलमुबा।†

१० येशूसे थेदा “एसे परमेश्वरसे पिन्बा मोलमदेन दान्दे एदेन छ्याम क्युइ ह्रीबा म्हिदा डोसेबा हिन्सम एसे थे म्हिदेन छ्याम क्युइ ह्रीसेला मुबा। जमाहेन्से थे म्हिसे एदा जुकजुकधोनाला जुनी याङ्बा क्युइ पिन्सेला मुबा” भिसी सुङ्जी।

११ थे म्रिडम्हेमेसे येशूदा “लास्सो, हाङदेन छ्याम क्युइ तेःबारी ताङ आरे, ओच्छे इनारएनोन नुप्बा मुला। हाङसे खानङ्ग्याम थे जुकजुकधोनाला जुनी याङ्बा क्युइ भला? १२ तिग हाङ डन्ना म्हेमे याकूब भन्दा घेन हिन्ना? थेसेन डन्दा चु इनार स्होसी पिन्बा हिन्ना। थेदेन थेला सन्तानसे ओच्छे थेला म्हे मुङ्गदेसेनोन चुनोन इनारला क्युइ थुङ्मुबा” भिसी भिजी।

४:६ “यहूदीगदेसे सामरीगदेदेन छ्याम संगतनोन आलमुबा” भिबा चु ताम कोइ कोइ ग्रीक बाइबलरी आरे।

४:५ उत्प ३३:१६; यहो २४:३२

१३ जमाहेन्से येशूसे थेदा चुहङ् भिसी सुङ्जी, “चु क्युइ थुङ्बा म्हिगदेदा दोःसी क्युइ फुइला। १४ तर जुन जुन म्हिसे डाइ पिन्बा क्युइ थुङ्ला थे म्हिदा दोःसी क्युइ आफुइ। डाइ थेदा जुन क्युइ पिन्ना, थे क्युइ चा थेला लागिरी जुकजुकधोनाला जुनी पिन्बा क्युइला मुहान दोला!” भिसी सुङ्जी।

१५ थे मिडम्हेमेसे येशूदा “लास्सो, डादाएनोन थे क्युइ भउ, थेहङ् भिसम डादा दोःसी क्युइ आफुइ ओच्छे चुधोना क्युइ किन्बारीनोन खआतोः” भिसी भिजी।

१६ जमाहेन्से येशूसे थेदा “निउ, एला हेम्बोदा ड्योइसी भउ” भिसी सुङ्जी।

१७ थेसे “डाला हेम्बो आरे” भिसी भिजी।

तर येशूसे थेदा “एसे डाला हेम्बो आरे भिसी भिबा ठीक हिन्ना। १८ तिग्दा भिसम एला गोर डा हेम्बो तसी जिन्बा मुला। दान्दे ए जुन म्हिदेन छ्याम चिबा मुला, थे म्हि एला हेम्बो आहिन। एसे पाङ्बा ताम सत्य हिन्ना” भिसी सुङ्जी।

१९ जमाहेन्से थे मिडम्हेमेसे, “लास्सो, हाङ अगमवक्ता हिन्बा चीम भिसी डाइ था याङ्जी। २० डन्ना आखे म्हेमेगदेसे चु गडरी परमेश्वरदा तेन्जी, तर हाङनी यहूदीगदेसे चा परमेश्वरदा तेन्बा ग्ला यरूशलेम जे हिन्ना भिसी सुङ्मुला” भिसी भिजी।

२१ येशूसे थे मिडम्हेमेदा चुहङ् भिसी सुङ्जी, “एसे डादा विश्वास

लउ, दाहेन्से खालैनोन परमेश्वरदा तेन्बारी चु गडरीदेन यरूशलेमरी निआतोःबा धुइ खबान मुला। २२ एनी सामरीगदेसे आसेनान परमेश्वरदा तेन्जी, तर डनी यहूदीगदेसे चा सेसी तेन्जी। तिग्दा भिसम थार्बा याङ्बा चा यहूदीगदे न्हङ्ग्यामनोन तला। २३ तर चुहङ्बा धुइएनोन खबान मुला, थे धुइ चा चुनोन हिन्ना, सेसी सेमहेन्सेन परमेश्वरदा तेन्बा म्हिगदेसे चा सत्यदेन आत्माग्याम परमेश्वर आबादा तेन्मुला। परमेश्वर आबासे चुहङ् लसी तेन्बा म्हिगदे म्हाइमुला। २४ तिग्दा भिसम परमेश्वर आत्मा हिन्ना। थेतबासेलमा थेदा तेन्बागदेसे सत्यदेन आत्माग्याम तेन्तोःला।”

२५ जमाहेन्से थे मिडम्हेमेसे येशूदा “थार्बा पिन्बा ग्ले फेप्खला भिबा ताम डादाएनोन था मुला, थेदा ‘थार्बा पिन्बा ख्रीष्ट’ भिसी भिला। थे फेप्खमाहेन्से थेसेन डन्दा जम्मान ताम घोना लला” भिसी भिजी।

२६ येशूसे थेदा “एदेन छ्याम ताम पाङ्बा म्हि, डा थेनोन हिन्ना” भिसी सुङ्जी।

२७ थे धुइरी येशूला चेलागदेएनोन थेरी धोखजी। येशू मिडम्हेमे गिकदेन छ्याम ताम लसी चिबा म्राङ्सी थेनीगदे उदेक तजी। तर “हाङसे तिग म्हाइबा?” अथवा “हाङ थे मिडम्हेमेदेन छ्याम तिग्दा ताम लबा” भिसी खालैसेन आङ्गोइनी।

२८ जमाहेन्से थे मिडम्हेमे दर्बुड थेरीन ख्लासी नाम्सापट्टि निसी म्हिगदेदा, २९ “म्हि गिकदा च्याबारी खउ, डाइ लबा जम्मान गे थेसे डादा पाङ्जी। थेनोन थार्बा पिन्बा स्त्रीष्ट मी आहिन?” भिसी भिजी। ३० चु ताम थे:सी शहरला जम्मान म्हिगदे येशूदा च्याबारी थेरी खजी।

३१ थेनोन धुइरी चेलागदेसे येशूदा “रब्बी, सोल छ्योइगो” भिसी बिन्ती लजी।

३२ तर येशूसे थेनीगदेदा “डादेन छ्याम चबा स्हे मुला, थे ताम एनीगदेदा थानोन आरे” भिसी सुङ्जी।

३३ थेतबासेलमा चेलागदेसे “खालैसे येशूदा सोल भसी पिन्जी कि तिग?” भिसी हाड हाड न्हडरी ताम लजी।

३४ येशूसे थेनीगदेदा चुहङ् भिसी सुङ्जी, “डादा पुइखबासे कुल्बा ताम इयान्सी थेला गे पूरा लबान डाला चबा स्हे हिन्ना। ३५ एनीगदेसे ‘बाली मिन्बारी अझ ला बिल बाँकी मुला भिसी भिमुला।’ तर एनीगदेसे डाला ताम इयान्गो, बु वारीरी च्यागो, बाली मिन्सी दुइबा धुइ तसी जिन्बा मुला। ३६ जुन म्हिसे बाली दुइबान मुला, थेसे ज्यला याङ्बान मुला। ओच्छे जुकजुकधोनाला जुनी याङ्बा बाली हुप लबान मुला। ओच्छे ब्लु द्ववबादेन बाली दुइबा न्हीनोन ताङ्म्याङ्गला। ३७ तिगदा भिसम चु ताम सत्य हिन्ना।

‘गिकसे ब्लु द्ववला, ओच्छे स्थान्दोसे बाली दुइला।’ ३८ डाइ एनीगदेदा एनीगदेसे ब्लुनोन आद्ववबा ग्लारी बाली दुइबारी पुइजी। स्थान्दोसे दुख लसी ब्लु द्ववबा ग्लारी एनीगदेसे बाली दुइम्याङ्गला मुला।”

३९ “डाइ लबा जम्मान गे थेसे डादा सुङ्जी” भिसी थे सामरी मिडम्हेमेसे पाङ्बासे लमा थे नाम्साला ल्हानान सामरीगदेसे येशूदा विश्वास लजी। ४० थेनीगदे येशू मुबा ग्लारी खसी येशूदा “हाड डन्देन छ्याम धन्छ्यागो” भिसी बिन्ती लजी। जमाहेन्से येशू थेनीगदेदेन छ्याम न्हीरेधोना धन्छ्याजी। ४१ येशूला ताम थे:सी भन ल्हानान सामरीगदेसे येशूदा विश्वास लजी। ४२ थेनीगदेसे थे मिडम्हेमेदा “दान्दे एसे पाङ्बा ताम थे:सी जे डन्से विश्वास लबा आहिन, तर डन्सेन येशूला ताम थे:सी विश्वास लबा हिन्ना। ओच्छे पक्कान जम्बुलिङला जम्मान म्हिदा थार्ना लबा थेनोन हिन्ना भिसी डन्से था याङ्जी” भिसी भिजी।

येशूसे हाकिमला भादा खम्ना लबा

४३ थे ग्लारी न्हीरेधोना धन्छ्यासी येशू गालील अञ्चलरी फेज्जी। ४४ अगमवक्तादा हाडलान नाम्सारी मान आल भिसी येशूसेन सुङ्बा मुबा।* ४५ येशू गालील अञ्चलरी धोखमाहेन्से थे ग्लाला म्हिगदेसे येशूदा मान लजी।

तिग्दा भिसम मिश्र यहुल्साग्याम फेसी खबा धिनदा ढन्सी धड्बा चाडला धुइरी येशूसे यरूशलेम शहररी लबा जम्मान उदेकला गेगदे थेनीगदेसे म्राड्बा मुबा। थे धुइरी थेनीगदेएनोन यरूशलेम शहररी चाड धड्बारी निबा मुबा।*

४६ दोःसी येशू गालील अञ्चलला काना भिबा शहररी फेप्जी। थेनोन शहररी येशूसे क्युइदा अडगुरला निडगु दोना लबा मुबा। कफर्नहुम शहररी चिबा हाकिम गिकला भा ल्हानान आखम्बा मुबा।* ४७ येशू यहूदिया अञ्चलग्याम गालील अञ्चलरी फेप्खजी भिबा ताम थेःसी थे हाकिम येशू मुबा ग्लारी खजी। ओच्छे थेसे हाड फेप्खसी डाला भादा खम्ना लसी पिन्गो भिसी बिन्ती लजी। तिग्दा भिसम थेला भा ल्हानान आखम्ना सिबारीन छ्याइबा मुबा।

४८ थेतबासेलमा येशूसे थेदा “उदेकला गेदेन चिनु आम्राड्तेधोना एनीगदेसे खाइमै विश्वास आल” भिसी सुड्जी।

४९ थे हाकिमसे येशूदा “लास्सो, डाला भा सिबा भन्दा डाच्छान हाड फेप्खउ” भिसी पाड्जी।

५० येशूसे थेदा “निउ, दाहेन्से एला भा सोला” भिसी सुड्जी।

जमाहेन्से येशूसे सुड्बा तामरी विश्वास लसी थे दिमरी निजी।

५१ ओच्छे थे ग्यामरी निबान लमा थेला नोकरगदे खसी, “हाडला भा खम्जी” भिसी भिजी। ५२ जमाहेन्से थेसे नोकरगदेदा “थे गाते धुइहेन्से खम्जी?” भिसी ड्योइमा, थेनीगदेसे “तिल्मा धिनना एक बजेहेन्से थेला छवा म्हाजी” भिसी भिजी। ५३ चु ताम थेःमाहेन्से येशूसे थेदा “एला भा सोला” भिसी सुड्बा धुइरीन खम्जी भिबा ताम थेसे था याड्जी। थेतबासेलमा थेदेन थेला म्हेमेक्योइसेन येशूदा विश्वास लजी।

५४ चु गे चा यहूदिया अञ्चलग्याम गालील अञ्चलरी फेप्खसी येशूसे लबा अर्गु उदेकला गे हिन्ना।

येशूसे कुज्या म्हिदा खम्ना लबा

५ जमाहेन्से यहूदीगदेला चाडला धुइरी येशू यरूशलेमरी फेप्जी। २ यरूशलेम शहर न्हडरी निबारी ग्यु भिबा म्राप मुबा। थे म्रापला डामरी गोर डा दलान मुबा घ्योइ गिक मुबा। थे घ्योइदा हिब्रू ग्योइरी बेथेसदा भिसी भिमुबा। ३ थे दलानरी आखम्बा ल्हानान म्हिगदे, मी आम्राड्बा म्हि, कुज्या म्हिदेन काड या चलब आतबा म्हि चिमुबा। थे घ्योइला क्युइ गाते धुइरी ल्हिङ्गला भिसी थेनीगदे जम्मासेन च्यासी चिमुबा। ४ तिग्दा भिसम धुइ धुइरी परमप्रभुला दूत गिक मार खसी थे घ्योइला क्युइ ल्हिङ्गसी पिन्मुबा।

घ्योइरी क्युइ ल्हिङ्मैछ्याम जुन म्हि डाच्छा घ्योइरी वाङ्जी थे म्हि जस्तोन आखम्बा मुसैनोन थे खम्मुबा।[†]

^५थेरी बोगल गिकसे च्युक भ्रे: दिडधोना आखम्बा म्हि गिकएनोन मुबा। ^६येशूसे थे थेरीन म्हेसी चिबा म्हाङ्जी। ओच्छे थे ल्हानान दिडहेन्से आखम्बा चीम भिबा था याङ्सी येशूसे थेदा “तिग एदा खम्बा सेम मुला?” भिसी ड्योइमा, ^७थे आखम्बा म्हिसे, “लास्सो, घ्योइला क्युइ ल्हिङ्बा धुइरी डादा घ्योइरी भाङ्सी पिन्बा डाला खालै आरे। थेतबासेलमा डा घ्योइरी वाङ्बारी निना निनान डा भन्दा डाच्छा स्थान्दो म्हि वाङ्मुला” भिसी भिजी।

^८जमाहेन्से येशूसे थेदा “रे:गो, ओच्छे हाडला तीबा नान्बा पुइसी भ्रउ” भिसी सुङ्जी।

^९येशूसे थेहङ् सुङ्मैछ्याम थे म्हि खम्जी। जमाहेन्से थे हाडला तीबा नान्बा पुइसी भ्रजी। जमाकुनु ब्लप्बा न्हबा धिन मुबा।[†] ^{१०}थेतबासेलमा यहूदी धर्मगुरुगदेसे थे म्हिदा “तिनी ब्लप्बा न्हबा धिन हिन्ना, एसे तीबा नान्बा पुइबारी आत” भिसी भिजी।

^{११}जमाहेन्से थेसे “जुन म्हिसे डादा खम्ना लजी थेसेन डादा तीबा नान्बा पुइसी भ्रउ भिसी सुङ्बा हिन्ना”

भिसी भिजी। ^{१२}थे म्हिगदेसे थेदा “एदा तीबा नान्बा पुइसी भ्रउ भिबा म्हि खाल हिन्ना?” भिसी ड्योइजी। ^{१३}तर हाडदा खम्ना लबा म्हि खाल हिन्ना भिसी थेसे डोसेबा आरेमुबा। तिगदा भिसम थेरी म्हिगदे ल्हानान पोप तबासे लमा म्हिहा हुल न्हङ्ग्याम येशू सुटुक्क फेप्सी जिन्बा मुबा।

^{१४}लिच्छा येशूसे थेदा परमेश्वरला मन्दिररी स्याप्सी, “च्यागो, ए खम्सी जिन्बा मुला। थेतबासेलमा एसे दो:सी पाप थालउ, चुदे पाप लजी भिसम एदा चु भन्दा आज्यबा तला” भिसी सुङ्जी। ^{१५}थे निसी हाडदा खम्ना लबा म्हि येशू चीम भिसी यहूदी धर्मगुरुगदेदा पाङ्जी।

परमेश्वरला भाग्याम याङ्बा जुनी

^{१६}येशूसे चु गे ब्लप्बा न्हबा धिनकुनु लबासे लमा यहूदी धर्मगुरुगदेसे येशूदा बिरोध लबारी छ्याइजी। ^{१७}तर येशूसे “डाला आबासे सदन गे लमुला। ओच्छे डाइनोन सदन गे लला” भिसी सुङ्जी। ^{१८}थेतबासेलमा यहूदी धर्मगुरुगदेसे भन येशूदा साइबारी म्हाइजी, तिगदा भिसम थेसे ठिम अन्छार ब्लप्बा न्हबा धिनकुनु लबारी आतबा गे जे लबा आहिन, तर थेसे हाडसे हाडदान परमेश्वर

५:४ “थे घ्योइला क्युइ...थे म्हि जस्तोन आखम्बा मुसैनोन थे खम्मुबा।” चु ताम ल्हानान हङ्बा ग्रीक बाइबलरी आरे।

५:६ यहूदीगदेला ठिम अन्छार ब्लप्बा न्हबा धिनकुनु तिगै गे लबारी आतमुबा।

हड्बान स्होसी परमेश्वरदा ह्राडला
आबा भिसी सुड्मुबा।

१९ येसूसे थेनीगदेदा चुहड् भिसी
सुड्जी, “च्यागो, एनीगदेसे डाला
ताम ड्यान्गो, आबासे जुन जुन लबा
म्राड्ला भासेनोन थेनोन गे जे लला,
तर भासे जे तिगै गे लबारी आखम।
तिगदा भिसम आबासे जुन गे लला
भासेनोन थेनोन गे लला। २० तिगदा
भिसम आबासे भादा माया लसी
ह्राडसे लबा जम्मान गे उन्ना। ओच्छे
थेसे अफ चु भन्दान घेन घेन गे ह्राडला
भादा उन्ना। ओच्छे एनीगदे उदेक
तगै भिसी थेसे अफ चु भन्दा घेन
घेन गे लला। २१ आबासे सिबागदेदा
सोना लसी जुकजुकधोनाला जुनी
पिन्बा हड् लसी भासेनोन जुन म्हिदा
सेम निला थेदा जुकजुकधोनाला जुनी
पिन्ना। २२ आबासे खालैलान निसाफ
आल। तिगदा भिसम जम्मादान निसाफ
लबा अधिकार आबासे भादा पिन्बा
मुला। २३ आबादा मान लबा हड् लसी
भादाएनोन मान लगै भिसीन आबासे
चुहड् लबा हिन्ना। तिगदा भिसम जुन
म्हिसे भादा मान आल थेसे भादा
पुइखबा आबादाएनोन मान आल।

२४ “थेतबासेलमा एनीगदेसे डाला
ताम ड्यान्गो, जुन म्हिसे डाला ताम
ड्यान्सी डादा पुइखबादा विश्वास
लला थेसे जुकजुकधोनाला जुनी
याड्ला। ओच्छे थेदा दोषएनोन आल,

बरु थे सिबाला तहग्याम थोन्ना।
जमाहेन्से थेसे जुकजुकधोनाला जुनी
याड्ला। २५ च्यागो, एनीगदेसे डाला
ताम ड्यान्गो, थे धुइ खबान मुला,
थे धुइ डाच्छान खसी जिन्बा मुला।
थेतबासेलमा सिबागदे न्हडला जुन
जुनसे परमेश्वरला भाला काइ थे:ला
थेनीगदे सोला। २६ तिगदा भिसम
परमेश्वर आबा ह्राडदेन छ्यामनोन
जुकजुकधोनाला जुनी मुला, थेहड्
लसीन थेसे ह्राडला भादाएनोन
जुकजुकधोनाला जुनी पिन्बा
अधिकार मुबा म्हि स्होबा मुला।
२७ ओच्छे निसाफ लबा अधिकार
थेदान पिन्बा मुला। तिगदा भिसम
परमेश्वरसे पुइखबा म्हि थेनोन
हिन्ना।

२८ “डाला ताम थे:सी एनीगदे उदेक
थातउ। तिगदा भिसम चुहड्बा धुइ
खबान मुला, थे धुइरी परमेश्वरसे
पुइखबा म्हिला काइ थे:सी सिबागदे
जम्मान दो:सी सोला। २९ ज्यबा
गे लबागदे जुकजुकधोनाला जुनी
याड्बारी दो:सी सोला ओच्छे
आज्यबा गे लबागदे सजाय नाबाला
लागिरी दो:सी सोला। *

३० “डाइ ह्राडसेन तिगै लबारी
आखम, परमेश्वर आबासे सुड्बा
अन्छार निसाफ लबासे लमा डाइ
लबा निसाफ ठीक तमुला। तिगदा
भिसम डाइ म्हन्बा अन्छार आहिन,

तर डादा पुइखबासे म्हन्बा अन्छार डाइ गे लमुला।

३१ “चुदे डाइ डाला बारेरी जे पाङ्जी भिसम एनीगदेसे डाइ पाङ्बा ताम सत्य हिन्ना भिसी था आयाङ्। ३२ तर डाला बारेरी परमेश्वर आबासेन सुङ्ला, थेसे डाला बारेरी जुन ताम सुङ्ला थे जम्मान ताम सत्य हिन्ना भिसी डादा था मुला।

३३ “एनीगदेसे ताम घोबाला लागिरी हाडला म्हिगदेदा बप्तिस्मा पिन्बा यूहन्ना मुबा ग्लारी पुइजी। ओच्छे थेसे थेनीगदेदा सत्य ताम पाङ्जी।* ३४ डाइ म्हिगदेसे डाला बारेरी तिग ताम पाङ्मुला भिसी भर लबा आहिन, तर एनीगदेदा थार्ना लबाला लागिरीन डाइ चु ताम पाङ्बा हिन्ना। ३५ यूहन्ना मी लुङ्सी य्हाल तना लबा नाडसल हङ्बान मुबा, तर थेसे पिन्बा य्हालरी एनीगदे छिन्ड जे ताङ्बारी म्हाइजी।

३६ “तर डाला बारेरी ताम पाङ्बा यूहन्ना भन्दाएनोन घेन ताम चुरी मुला। तिगदा भिसम जुन गेगदे पूरा लबारी आबासे डादा पिन्बा मुला, थे गेगदे डाइ लबान मुला। चु गेसेन डादा परमेश्वरसे पुइखबा हिन्ना भिसी उन्बा मुला। ३७ डादा पुइखबा आबासेनोन डाला बारेरी सुङ्बा मुला। तर एनीगदेसे थेला काइ खाइमै थे:बा आरे, ओच्छे थेदा म्राङ्बाएनोन आरे।* ३८ थेसे सुङ्बा बचन एनीगदेला सेमरी

आचि। तिगदा भिसम थेसे पुइखबा म्हिदा एनीगदेसे विश्वास आलनी। ३९ एनीगदेसे जुकजुकधोनाला जुनी याङ्ला भिसी बचनरी म्हाइमुला, थे बचनसेनोन डाला बारेरी पाङ्मुला। ४० तसैनोन जुकजुकधोनाला जुनी याङ्बाला लागिरी एनीगदे डा मुबा ग्लारी खबारी आम्हाइमुला।

४१ “म्हिगदेसे डादा जयजयकार लगै भिसी डाइ म्हन्बा आरे। ४२ तर एनीगदे परमेश्वरदा माया आलबा खाहङ्बा खाल्ला म्हि हिन्ना भिबा ताम डादा था मुला। ४३ डा हाडलान आबाला मिन किन्सी खमाएनोन एनीगदेसे डादा मान आलनी। तर स्थान्दो खालै म्हि हाडलान मिन किन्सी खजी भिसम एनीगदेसे थेदा मान लला। ४४ एनीगदेसे डादा खाहङ् लसी विश्वास लखम्ला? एनीगदे हाङ हाङ न्हडरी चा गिकसेम गिकदा मान लगै भिसी म्हन्बा, तर परमेश्वरग्याम जे याङ्बा मान चा किन्बारी आम्हाइबा।

४५ “परमेश्वर आबाला ओन्छाडरी डाइ एनीगदेला दोष उन्ना भिसी थाम्हन्गो। तर थार्बा पिन्ना भिसी एनीगदेसे विश्वास आश लबा मोशाला ठिमरी मुबा तामसेन एनीगदेला दोष उन्ना। ४६ च्यागो, एनीगदेसे मोशाला विश्वास लबा हिन्सम दान्दे डादाएनोन विश्वास लसेला मुबा। तिगदा भिसम थेसे डालान बारेरी भिबा

मुबा! ४७ तर मोशासे भिबा तामनोन एनीगदेसे विश्वास लबारी आखम्नी भिसम डाइ पाड्बा ताम भन खाहड् लसी विश्वास लखम्ला?”

**येशूसे हजार डा म्हिगदेदा चबा स्हे
पिन्बा**

मत्ती १४:१३-२१; मर्कूस ६:३०-४४;

लूका ९:१०-१७

६ जमाहेन्से येशू गालील समुन्द्रला क्याम्सडपट्टि फेप्जी। थे समुन्द्रदा तिबेरियास समुन्द्र भिसीनोन भिमुबा। २ ओच्छे ल्हानान म्हिला हुलएनोन येशूला लिच्छा लिच्छा निजी। तिगदा भिसम आखम्बा म्हिगदेदा येशूसे ल्हानान रेम खम्ना लबा उदेकला चिनुगदे थेनीगदेसे म्हाड्बा मुबा। ३ ओच्छे येशू गडरी फेप्सी हाडला चेलागदेदेन छ्याम थेरीन धन्छ्याजी। ४ थे धुइरी यहूदीगदे मिश्र यहूल्साग्याम फेसी खबा धिनदा ढन्सी धड्बा चाडएनोन खबारी छ्याइबा मुबा।

५ येशूसे क्युर्सीन स्हीमा हाड मुबा ग्लारी ल्हानान म्हिगदे खबान लबा म्हाड्सी फिलिपदा “चु म्हिगदेदा पिन्बाला लागिरी य्हाडसे खानडग्यामसे गेड ग्लुसी भसे?” भिसी सुड्जी। ६ येशूसे थेला सेम च्याबाला लागिरी थेहड् भिसी सुड्बा मुबा। तिगदा भिसम हाडसे तिग

लबारी छ्याइबा मुबा, थे ताम येशूदा था मुबा।

७ फिलिपसे येशूदा “य्हाडसे ग्यार्ज न्ही म्हुइला डबलसे गेड ग्लुसी भसैनोन चुरी मुबा म्हिगदेदा जजाकर सुतै आथोप” भिसी भिजी।†

८ येशूला चेला सिमोन पत्रुसला आले अन्द्रियाससे येशूदा, ९ “चुरी कोला गिकदेन छ्याम जौला गोर डा गेडदेन गोर न्ही तार्डा मुला। तिग चुदेसे चु जम्मान म्हिगदेदा छ्योला?” भिसी भिजी।

१० येशूसे चेलागदेदा “म्हिगदेदा चिपुङ्गो” भिसी सुड्जी। थेरी घेन पाडग्याल मुबा, थेरी हजार डा ते चा हेम्फेबे जे मुबा। ११ जमाहेन्से येशूसे गेड छ्यारी थोसी परमेश्वरदा धन्यवाद पिन्माहेन्से जम्मान म्हिदा भो लसी पिन्जी, ओच्छे तार्डाएनोन भो लसी पिन्जी। थेरी मुबा जम्मान म्हिसे मेन्ना चजी।

१२ थेनीगदे जम्मासेन मेन्ना चसी जिन्माहेन्से येशूसे हाडला चेलागदेदा “लेड्बा टगलटोगोल खेरो थानिगै, जम्मान पोप लउ” भिसी सुड्जी। १३ थेतबासेलमा थेनीगदेसे चसी लेड्बा गोर डा जौला गेडला टगलटोगोल दुइमा च्युक न्ही सोली तजी।

१४ येशूसे लबा चुहड्बा उदेकला गे म्हाड्सी म्हिगदेसे “जम्बुलिडरी फेप्खला भिसी बचनसे य्हाडदा पाड्बा

६:७ थे धुइरी धिन गिक गे लमा सिगा गिक म्हुइला डबल गिक याड्मुबा।

अगमवक्ता[†] चा पक्कान चुनोन चीम” भिसी भिजी। * १५थेतबासेलमा म्हिगदे खसी हाडदा जबरजस्ती ग्ले स्होबारी म्हाइबा मुला भिबा ताम था याइसी येशू दोःसी हाड गिकनोन गडरी फेप्जी।

येशू समुन्द्रथोरी भ्रबा

मत्ती १४:२२-२३; मर्कस ४५:५५

१६इयसे तमाहेन्से येशूला चेलागदे समुन्द्रपट्टि निजी। १७ओच्छे थेनीगदे दोंगारी क्रेःसी समुन्द्रला क्याम्सड कफर्नहुम भिबा शहरपट्टि निजी। थे धुइरी धोप तसी जिन्बा मुबा, तसैनोन अफ्र येशू थेनीगदे मुबा ग्लारी फेप्खबा आरेमुबा। १८घेन लाबा खबासे लमा समुन्द्ररी छाल रेःबारी छयाइजी। १९चेलागदे दोंगा चलब लसी ओस्पन कोस गिक-न्ही ते थारेड धोमा, थेनीगदेसे येशू समुन्द्र थोथोरी भ्रसी हाडगदे मुबापट्टि फेप्खबान लबा म्राइजी। चु म्राइसी थेनीगदे लोइजी। २०तर येशूसे थेनीगदेदा “डानोन हिन्ना, थालोइगो” भिसी सुइजी। २१चु ताम थेःसी थेनीगदे ल्हानान ताइजी, ओच्छे येशूदा दोंगारी धन्छयापुइजी। जमाहेन्से तुरुन्तन थेनीगदे धोतोःबा ग्लारी धोजी।

२२ओच्छे समुन्द्रला क्याम्सडपट्टि मुबा म्हिगदेसे न्हडगरदड थेरी दोंगा गिक जेन म्राइजी। डाच्छाकुनु

येशू चेलागदेदेन छ्याम दोंगारी फेप्बा आरेमुबा, तर थेला चेलागदे जे निमुबा भिबा ताम थेनीगदेदा था मुबा। २३जमाहेन्से तिबेरियास भिबा शहरग्याम अर्गु दोंगागदे येशूसे परमेश्वरदा धन्यवाद पिन्सी थेनीगदेदा गेड पिन्बा ग्लाला डामरी धोखजी। २४थेरी येशूदेन छ्याम चेलागदे आरेबा था याइसी थेनीगदे दोंगागदेरी क्रेःसी येशूदा म्हाइबान कफर्नहुम शहररी निजी।

जुनी पिन्बा गेड

२५थेनीगदेसे येशूदा समुन्द्रला क्याम्सडपट्टि स्याप्माहेन्से “गुरु, हाड चुरी खाइमा फेप्खजी?” भिसी इयोइजी।

२६जमाहेन्से येशूसे थेनीगदेदा चुहइ भिसी सुइजी, “एनीगदेसे डाला ताम इयान्गो, डाइ लबा उदेकला गे म्राइसी आहिन, तर मेन्ना गेड चम्याड्बासे लमान एनीगदेसे डादा म्हाइबा हिन्ना। २७च्यागो, नाश तसी निबा चबा स्हेला लागिरी जे दुख लसी गे थालउ, तर जुकजुकधोना चिबा चबा स्हेला लागिरी दुख लसी गे लउ। चु चबा स्हे एनीगदेदा परमेश्वरसे पुइखबा म्हिसे पिन्ना। तिगदा भिसम चु गे लबाला लागिरीन परमेश्वर आबासे थेदा धम्बा मुला।”

६:१४ “पाइबा अगमवक्ता” भिबा चा यूहन्ना हिन्ना (१:२१ स्हीगो)।

६:१४ व्यव १८:१५

२८ जमाहेन्से थेनीगदेसे येशूदा “थेहड् भिसम परमेश्वरसे म्हन्बा अन्छारला गे लबाला लागिरी डन्से तिग लतोःला?” भिसी इयोइमा, २९ येशूसे थेनीगदेदा “परमेश्वरसे पुइखबा म्हिदा विश्वास लउ, एनीगदेसे लगै भिसी परमेश्वरसे म्हन्बा गे चा थेनोन हिन्ना” भिसी सुड्जी।

३० जमाहेन्से थेनीगदेसे येशूदा भिसी भिजी, “डन्से हाडदा विश्वास लबाला लागिरी हाडसे डन्दा खाहड्बा उदेकला चिनु उन्खम्ला? हाडसे तिग लखम्ला? ३१ यहाडला आखे म्हेमेगदेसे मी तोडतोडबा ग्लारीएनोन मन्नं चजी। चु ताम बचनरीन ‘परमेश्वरसे थेनीगदेदा स्वर्गग्याम गेड पिन्जी’ भिसी भिबा मुला।”*

३२ येशूसे थेनीगदेदा चुहड् भिसी सुड्जी, “च्यागो, एनीगदेसे डाला ताम इयान्गो, एनीगदेदा स्वर्गग्याम गेड पिन्बा मोशा आहिन। तर स्वर्गग्याम सत्य गेड पिन्बा चा डाला आबा हिन्ना। ३३ तिगदा भिसम परमेश्वरसे पिन्बा गेड चा चुनोन हिन्ना, थे स्वर्गग्याम खसी जम्बुलिडला म्हिगदेदा जुनी पिन्मुला।”

३४ थेनीगदेसे येशूदा “प्रभु, चु गेड डन्दा सदन पिन्गो” भिसी भिजी।

३५ जमाहेन्से येशूसे थेनीगदेदा चुहड् भिसी सुड्जी, “जुकजुकधोनाला जुनी

पिन्बा गेड चा डानोन हिन्ना। डा मुबा ग्लारी खबागदे खाइमै आखेन, ओच्छे डादा विश्वास लबागदेदा खाइमै क्युड आफुइ। ३६ तर डाइ एनीगदेदा पाड्सी जिन्बा मुबा, एनीगदेसे डादा म्राड्सैनोन विश्वास आलनी। ३७ आबासे डादा पिन्बा जति जम्मान डा मुबा ग्लारी खला, डा मुबा ग्लारी खबागदेदा डाइ तिगै लसीन आरुला। ३८ डा हाडसे म्हन्बा अन्छारला गे लबारी खबा आहिन, तर डादा पुइखबासे म्हन्बा अन्छारला गे लबारी डा स्वर्गग्याम खबा हिन्ना। ३९ डादा पुइखबासे म्हन्बा ताम चा थेसे डादा पिन्बा म्हिगदे डाग्याम गिकनोन थाम्हागै, तर चु जम्बुलिडरी डा दोःसी खबा धुडरी डाइ थेनीगदेदा सोना लबारी खमै भिसी हिन्ना। ४० तिगदा भिसम डाला आबासे म्हन्बा ताम चा चुनोन हिन्ना, भादा म्राड्सी थेदा विश्वास लबागदे जम्मासेन जुकजुकधोनाला जुनी याड्गै, ओच्छे डा दोःसी खबा धुडरी डाइ थेनीगदेदा सिबाग्याम सोना लला।”

४१ “स्वर्गग्याम खबा गेड डानोन हिन्ना” भिसी येशूसे सुड्बासे लमा यहूदी गन्बागदेसे येशूला बिरोध लसी ताम लबारी छ्याइजी। ४२ थेनीगदेसे, “तिग चु योसेफला भा येशू आहिन?, चुला आबा आमादा यहाडसे डोसेबा

६:३१ “मन्न” भिबा चा परमेश्वरसे स्वर्गग्याम पिन्बा गेड हिन्ना।

६:३१ प्रस्था १६:१५, ३१; भजन ७८:२४

आरे?, खाहङ् लसी चुसे ‘डा स्वर्ग्याम खबा हिन्ना’ भिसी पाङ्बा” भिसी भिजी।

४३ जमाहेन्से येसूसे थेनीगदेदा चुहङ् भिसी सुङ्जी, “एनीगदेसे हाङ हाङ न्हङरी डाला बिरोध लसी ताम थालउ। ४४ तिग्दा भिसम डादा पुइखबा आबासे डा मुबा ग्लारी खबा सेम आपिन्तेधोना खालैनोन डा मुबा ग्लारी खबारी आखम। डा मुबा ग्लारी खबागदे जम्मादान डा दोःसी खबा धुइरी डाइ सोना लला। ४५ अगमवक्तागदेसेनोन परमेश्वरला बचनरी ‘परमेश्वरसेन जम्मान म्हिगदेदा लोप्ला’ भिसी भिबा मुबा। परमेश्वर आबाला ताम थेःसी थेग्यामसेन लोप्ला म्हिगदे जम्मान डा मुबा ग्लारी खला।* ४६ परमेश्वर आबाग्याम खबा म्हिसे जे परमेश्वरदा म्राङ्बा मुला। तर स्थान्दो खालैसेन थेदा म्राङ्बा आरे। ४७ थेतबासेलमा एनीगदेसे डाला ताम ड्यान्गो, जुन म्हिसे विश्वास लला थेसे जुकजुकधोनाला जुनी याङ्बा मुला। ४८ च्यागो, जुकजुकधोनाला जुनी पिन्बा गेड डानोन हिन्ना। ४९ एनीगदेला आखे म्हेमेगदेसे तोडतोडबा ग्लारी मन्न चजी, तसैनोन थेनीगदे सिजी। ५० तर स्वर्ग्याम खबा गेड चुनोन हिन्ना, जुन म्हिसे चु गेड चला थे खाइमै आसि। ५१ स्वर्ग्याम खबा छोन्बो गेड चा डानोन हिन्ना,

जुन म्हिसे चु गेड चला थे खाइमै आसि। चु गेड चा डाइ जम्बुलिङला म्हिगदेसे जुकजुकधोनाला जुनी याङ्गै भिसी पिन्ना। थे गेड चा डालान ल्हुइ हिन्ना।”

५२ चु ताम थेःसी यहूदीगदेदा बोमो रेःसी हाङ हाङ न्हङरी चुहङ् भिसी ताम लबारी छ्याइजी, “चु म्हिसे खाहङ् लसी हाङला ल्हुइ य्हाङदा चबारी पिन्खम्ला?”

५३ जमाहेन्से येसूसे थेनीगदेदा चुहङ् भिसी सुङ्जी, “च्यागो, एनीगदेसे डाला ताम ड्यान्गो, चुदे एनीगदेसे परमेश्वरसे पुइखबा म्हिला ल्हुइ आचनी भिसम, का आथुङ्नी भिसम एनीगदेदेन छ्याम जुकजुकधोनाला जुनी आत। ५४ तर डाला ल्हुइ चबा, डाला का थुङ्बा म्हिदेन छ्याम जुकजुकधोनाला जुनी तला। ओच्छे डा दोःसी खबा धुइरी डाइ थेदा सिबाग्याम सोना लला। ५५ तिग्दा भिसम चनोन तोःबा स्हे चा डाला ल्हुइ हिन्ना ओच्छे थुङ्गोन तोःबा स्हे चा डाला का हिन्ना। ५६ डाला ल्हुइ चबा, डाला का थुङ्बा म्हि डादेन छ्याम तला, ओच्छे डा थेदेन छ्याम तला। ५७ छोन्बो परमेश्वरसे डादा पुइखबासे लमा डा थेग्यामसे सोला, थेहङ् लसीन डादा चबा म्हिणोन डाग्यामसेन सोला। ५८ स्वर्ग्याम खबा गेड चुनोन हिन्ना। चु गेड

एनीगदेला आखे म्हेमेगदेसे चबा गेड हङ्बा आहिन। थेनीगदेसे थे गेड चजी तसैनोन थेनीगदे सिजी। तर चु गेड चबा म्हिगदे चा खाइमै आसि।”^{५६}चु ताम चा येशूसे कफर्नहुम भिबा शहररी यहूदीगदे हुप तबा दिमरी म्हिगदेदा लोण्बा धुइरी सुङ्बा मुबा।

ल्हानान चेलागदेसे येशूदा ख्लाबा

^{६०}चु ताम थे:माहेन्से येशूला चेलागदे न्हडला ल्हानानसे “चुहङ्बा गाहो बचन खाल्से ड्यान्खम्ला?” भिसी भिजी।

^{६१}तर चेलागदेसे चु तामला बारेरी ताम लबान मुला भिबा था याङ्सी येशूसे थेनीगदेदा चुहङ् भिसी सुङ्जी, “तिग डाइ पाङ्बा तामसे लमा एनीगदेला विश्वास म्हाबा हिन्ना? ^{६२}थेहङ् भिसम एनीगदेसे परमेश्वरसे पुइखबा म्हिदा स्वर्गरी दो:सी निबा म्राङ्मा एनीगदेला सेमरी खाहङ्बा छोर्ला? ^{६३}जुकजुकधोनाला जुनी पिन्बा चा परमेश्वरला आत्मासेन हिन्ना। चु गे चा म्हिला शक्तिसे लबारी खम्बा गे आहिन। डाइ एनीगदेदा पाङ्बा ताम चा परमेश्वरला आत्मासे पिन्बा जुकजुकधोनाला जुनीला बारेरी हिन्ना। ^{६४}तर एनीगदे न्हडरी गातेसे मी चु ताम विश्वास लबा आरे।” तिगदा भिसम खाल्से विश्वास आल,

खाल्से हाडदा धोका पिन्ना भिबा ताम येशूदा डाच्छाहेन्सेन था मुबा। ^{६५}जमाहेन्से दो:सी येशूसे थेनीगदेदा “थेतबासेलमान डाइ एनीगदेदा चु ताम पाङ्बा हिन्ना, चुदे डाला आबासे डा मुबा ग्लारी खआपुङ्नी भिसम खालै म्हि डा मुबा ग्लारी खबारी आखम” भिसी सुङ्जी। ^{६६}चु तामसे लमा जमाकुनुहेन्से चेलागदे न्हडला ल्हानान चेलागदे येशूदेन छ्याम भ्रबारी ख्लाजी।

^{६७}थेतबासेलमा येशूसे हाडला च्युक न्ही चेलागदेदा “तिग एनीगदेएनोन डादा ख्लासी निबा हिन्ना?” भिसी सुङ्जी। ^{६८}जमाहेन्से सिमोन पत्रुससे येशूदा भिसी भिजी, “प्रभु, जुकजुकधोनाला जुनी पिन्बा बचन मी हाडदेन छ्याम मुला भिसम डनी खाल मुबा ग्लारी निसे?” ^{६९}हाड परमेश्वरसे पुइखबा परमेश्वरला म्हि हिन्ना भिबा ताम डन्से था याङ्सीन हाडदा विश्वास लबा हिन्ना।”

^{७०}येशूसे थेनीगदेदा “एनीगदे च्युक न्हीदान डाइ धम्बा हिन्ना, तसैनोन एनीगदे न्हडला गिक चा शैतान हिन्ना” भिसी सुङ्जी। ^{७१}चु ताम येशूसे सिमोन इस्करियोतला भा यहूदाला बारेरी सुङ्बा मुबा। तिगदा भिसम च्युक न्ही चेला न्हडला तसीनोन थेसे लिच्छा येशूदा धोका पिन्बारी छ्याइबा मुबा।

यहूदीगदेसे छाप्रोरी चिसी धड्बा चाड

७ जमाहेन्से येशू गालील अञ्चललान नाम्सा नाम्सारी फेप्जी, तर यहूदिया अञ्चलरी चा फेप्बा सेम आलनी। तिग्दा भिसम यहूदीगदेसे येशूदा साइबारी म्हाइमुबा।^२थे धुइरी यहूदीगदेसे छाप्रोरी चिसी धड्बा चाड^१ खबारी छ्याइबा मुबा।^{*} ^३थेतबासेलमा येशूदा ह्वाडला आलेगदेसेनोन खिसी लसी चुहड् भिसी भिजी, “चु ग्ला ख्लासी ह्वाड यहूदिया अञ्चलरी फेप्नोन फेप्गो, थेरीनोन ह्वाडसे लबा गेगदे ह्वाडला चेलागदेसे म्हाइगै।^४ह्वाडदा जम्मासेन डोसेगै भिसी म्हन्बा म्हिसे खाइमै लासी गे आलमुला। ह्वाडसेनोन थेहड्बान गेगदे लबा मुसम ह्वाड खाल हिन्ना भिबा ताम जम्बुलिडला म्हिगदेदा डोसेना लउ।”^५तिग्दा भिसम येशूला आलेगदेसेनोन येशूदा विश्वास आलमुबा!

^६थेतबासेलमा येशूसे थेनीगदेदा चुहड् भिसी सुइजी, “डाला लागिरी धुइ तबा आरे। तर एनीगदेला लागिरी मी खजिबै धुइ मुसै ठीक मुला।^७एनीगदेदा जम्बुलिडला म्हिगदेसे हेला आलमुला, तर डादा चा हेला लमुला। तिग्दा भिसम थेनीगदेला

बानीबेहोर आज्यबा मुला भिसी डाइ पाइमुला।^८एनीगदे चा चाड धड्बारी निउ, डा दान्दे आनि। तिग्दा भिसम डाला धुइ तबा आरे।”^९थेहड् सुइसी येशू गालीलरीन धन्छ्याजी।

^{१०}तर येशूला आलेगदे चाड धड्बारी निमाहेन्से येशूएनोन खालैसे था आयाइना लसी थेरी फेप्जी।

^{११}थेरी यहूदी नेतागदेसे येशूदा म्हाइबान, “थे म्हि खानड मुला?” भिसी म्हिगदेदा ड्योइजी।

^{१२}ल्हानान म्हिगदेसे येशूला बारेरी चुहड् भिसी ताम लबान मुबा, कोइ कोइसे “थे ज्यबा म्हि हिन्ना” भिसी भिमुबा। तर कोइ कोइसे चा “आहिन, थेसे ल्हानान म्हिगदेदा न्होइना लबा मुला” भिसी भिमुबा।^{१३}तसैनोन यहूदी नेतागदेदेन छयाम लोइसी खालैसेन येशूला बारेरी स्थान्दो म्हिसे था याइना लसी ताम आलमुबा।

चाडला धुइरी येशूसे म्हिगदेदा लोप्बा

^{१४}चाडला गुडरी परमेश्वरला मन्दिररी फेप्सी येशूसे म्हिगदेदा लोप्बारी छ्याइजी।^{१५}यहूदी नेतागदे उदेक म्हन्बान, “चुसे तिगै पढब आलना चुहड्बा ज्ञान बुद्धि खानडयाम याइजी?” भिसी भिजी।

७:२ चु चाड यहूदीगदेसे ह्वाडला आखे म्हेमेगदे बोगल न्ही दिडधोना तोडतोडबा ग्लारी चिबा धुइदा ढन्बाला लागिरी छाप्रोरी चिसी धड्मुबा।

७:२ लेवी २३:३४; व्यव १६:१३

१६ जमाहेन्से येशूसे थेनीगदेदा चुहङ् भिसी जोहाब पिन्जी, “डाइ डाला ताम लोप्बा आहिन, तर डादा पुइखबा परमेश्वरला ताम लोप्बा हिन्ना। १७ चुदे खालै म्हिसे परमेश्वरसे म्हन्बा अन्छार लबारी म्हाइजी भिसम थेसे जे डाइ लोप्बा ताम परमेश्वरग्याम हिन्ना कि डालान सेमला ताम लोप्बा हिन्ना भिसी था याङ्ला। १८ जुन म्हिसे ह्वाङलान ताम पाङ्ला थेसे ह्वाङदान मान लगै भिसी म्हन्मुला। तर ह्वाङदा पुइखबादा मान लगै भिसी म्हन्बा म्हिसे चा सत्य ताम पाङ्मुला, थेसे तिगै लुसीला ताम आलमुला। १९ मोशासे एनीगदेदा ठिम पिन्बा मुला, तसैनोन एनीगदेसे मोशासे पिन्बा ठिम अन्छार गे आलनी। एनीगदेसे डादा तिग्दा साइबारी म्हाइबा?”

२० थेरी मुबा म्हिला हुलसे येशूदा “एदा म्हडसे स्याप्जीम, खाइ एदा खालसे साइबारी म्हाइबा मुला?” भिसी भिजी।

२१ जमाहेन्से येशूसे थेनीगदेदा चुहङ् भिसी सुङ्जी, “डाइ गे गिक लमा एनीगदे तिग्दा उदेक म्हन्बा? २२ च्यागो, खतना लउ भिसी एनीगदेदा मोशासे ठिम स्होसी पिन्बा मुला। हिन्बाम थे ठिम मोशासे स्होबा आहिन, एनीगदेला आखे म्हेमेसेन स्होबा हिन्ना। थेतबासेलमा एनीगदेसे

ब्लप्बा न्हबा धिनकुनुएनोन ह्वाङला भागदेला खतना लमुला।* २३ य्हाङसे मोशासे पिन्बा ठिम आखलागे भिसी ब्लप्बा न्हबा धिनरीएनोन खतना लमुला भिसम डाइ चा आखम्बा म्हि गिकदा खम्ना लमा एनीगदेसे तिग्दा डादा बोमो लबा? २४ एनीगदेसे म्हिला ली च्यासी निसाफ थालउ, तर ठीक लसी निसाफ लउ।”

तिग चुनोन ख्रीष्ट हिन्ना?

२५ यरूशलेमग्याम खबा कोइ कोइ म्हिगदेसे चुहङ् भिसी भिजी, “तिग यहूदी धर्मगुरुगदेसे साइबारी म्हाइबा म्हि चुनोन आहिन? २६ च्यागो, आलोङ्नान चुसे जम्मादान लोप्बान मुला, तर चुदा थेनीगदेसे तिगै आपाङ्नी! डन्ना नेतागदेसेनोन चुनोन थार्बा पिन्बा ख्रीष्ट हिन्ना भिसी पक्कान था याङ्जी कि तिग? २७ चु म्हि खाहङ् लसी थार्बा पिन्बा ख्रीष्ट हिन्ना, तिग्दा भिसम चु म्हि खानङ्ग्याम खबा हिन्ना भिबा ताम य्हाङदा था मुला। तर ख्रीष्ट फेप्खबा धुइरी खानङ्ग्याम फेप्खला भिबा ताम खालैदान था आत।

२८ थे धुइरी परमेश्वरला मन्दिररी लोप्बान लमा येशूसे घेन काइरी चुहङ् भिसी सुङ्जी, “डा खानङ्ग्याम खबा हिन्ना भिबादेन डा खाल हिन्ना भिबा ताम एनीगदेदा पक्कान था मुला।

च्यागो, डा हाडनोन खबा आहिन, तर डादा खालैसे पुइखबा हिन्ना थे चा सत्य हिन्ना, एनीगदेसे थेदा डोसेबा आरे। २६तर डाइ थेदा डोसेबा मुला। तिगदा भिसम थेसे पुइखबासे लमा डा थेग्याम खबा हिन्ना।”

३०चु ताम थे:सी थेनीगदेसे येशूदा चुड्बारी म्हाइजी। तर खालैसेन या आभाङ्नी, तिगदा भिसम येशूला धुइ तबा आरेमुबा। ३१थेरी मुबा ल्हानान म्हिगदेसे येशूदा विश्वास लजी। ओच्छे थेनीगदेसे, “थार्बा पिन्बा ख्रीष्ट फेप्खसी, तिग चु म्हिसे भन्दा अभ उदेकला गेगदे लला?” भिसी भिजी।

येशूदा चुड्बारी म्हाइबा

३२म्हिगदेसे येशूला बारेरी खास-खास खुसखुस ताम लबान लबा फरिसीगदेसे थे:जी। जमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे येशूदा चुड्बाला लागिरी परमेश्वरला मन्दिर खुड्बा सिपाहीगदेदा पुइजी।

३३येशूसे म्हिगदेदा चुहङ् भिसी सुङ्जी, “तिगै धिनधोना डा एनीगदेदेन छ्यामनोन तला, जमाहेन्से डादा जुनसे पुइखबा मुला, डा थे मुबा ग्लारीन निला। ३४ओच्छे एनीगदेसे डादा म्हाइला, तर आस्याप। तिगदा भिसम डा निबा ग्लारी एनीगदे खबारी आखम।”

३५चु ताम थे:सी यहूदी नेतागदेसे हाड हाड न्हडरी चुहङ् भिसी भिजी, “चु म्हि खानड निबारी छ्याइजी? एनीगदेसे डादा आस्याप भिसी भिमुला। अर्गु यहूल्सारी ससा बडबड तसी चिबा यहूदीगदे मुबा ग्लारी निसी थे यहूल्साला ग्रीक ग्योइ पाङ्बा म्हिगदेदा लोप्बारी म्हाइजी कि तिग? ३६एनीगदेसे डादा म्हाइला, तर आस्याप। तिगदा भिसम डा निबा ग्लारी एनीगदे खबारीन आखम’ भिसी चु म्हिसे तिग ताम पाङ्बा?”

जुकजुकधोनाला जुनी पिन्बा क्युइ

३७चाड जिन्बा धिनकुनु अथवा मुल धिनकुनु येशूसे म्हिगदेला डाच्छा राप्सी घेन काइरी चुहङ् भिसी सुङ्जी, “चुदे खालैदा क्युइ फुइबा मुसम डा मुबा ग्लारी खसी थुङ्गो।” ३८परमेश्वरला बचनसे पाङ्बा हङ्नोन डादा विश्वास लबा म्हेला सेम न्हङ्ग्याम जुकजुकधोनाला जुनी पिन्बा क्युइ थोन्ना।” ३९चु ताम चा येशूसे हाडदा विश्वास लबा म्हिगदेसे याङ्तो:बा परमेश्वरला आत्माला बारेरी सुङ्बा मुबा। परमेश्वरसे थे धुइधोना हाडला आत्मा पुइखबा आरेमुबा। तिगदा भिसम थे धुइधोना येशूदा कुसरी टाँगब लबादेन स्वर्गरी घेन य्हालदेन शक्तिरी फेप्बा धुइ तबा आरेमुबा।

थे खाल?

४० येशूला ताम थे:सी थेरी मुबा कोइ कोइ म्हिगदेसे “चु म्हि पक्कान थेनोन अगमवक्ता[†] हिन्ना” भिसी भिजी। *

४१ ओच्छे कोइ कोइसे “चु थार्बा पिन्बा ख्रीष्ट हिन्ना” भिसी भिजी। तर कोइ कोइसे चुहङ् भिसी भिजी, “तिग गालील अञ्चलग्यामसेनोन थार्बा पिन्बा ग्ले फेप्खला? ४२ परमेश्वरला बचनरी थार्बा पिन्बा ख्रीष्ट दाऊदला सन्तानग्याम दाऊदलान नाम्सा बेथलेहेमग्यामसेन खला भिसी पाङ्बा आरे?”* ४३ चुहङ् लसी येशूसे लमा म्हिगदे हाड हाड न्हङरीन आढिकनी। ४४ थेनीगदे न्हङला गाते म्हिगदेसे येशूदा चुङ्बारी म्हाइजी। तर थेनीगदे खालेसेन या आभाङ्नी।

यहूदी धर्मगुरुगदेसे विश्वास आलबा

४५ परमेश्वरला मन्दिर खुङ्बा सिपाहीगदे दो:सी खमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे थेनीगदेदा “खाइ, एनीगदेसे थेदा तिगदा आभबा?” भिसी भिजी।

४६ जमाहेन्से थे सिपाहीगदेसे थेनीगदेदा “थे म्हिला ताम थे:सी डनी

उदेक तजी। थेहङ्बा ताम मी डन्से खाइमै थे:बा आरे” भिसी भिजी।

४७ जमाहेन्से फरिसीगदेसे थेनीगदेदा चुहङ् भिसी भिजी, “एनीगदेदाएनोन थेसे भुक्याब लजी कि तिग? ४८ तिग यहूदी नेतागदेदेन फरिसीगदे खालैसे थेदा विश्वास लबा मुला? ४९ तर परमेश्वरसे मोशादा पिन्बा ठिम आसेबा चु म्हिगदेसे परमेश्वरग्याम सजाय याङ्ला।” ५० डाच्छा म्हुनड तिरेम येशूदा हुप तबारी निबा थेनीगदे न्हङलान निकोदेमस भिबा म्हिसे चुहङ् भिसी भिजी,* ५१ “तिग यहाङला ठिम अन्छार थे म्हिसे लबा तामदेन गे आघोनान यहाङसे थेदा दोष उन्बारी तला?”

५२ तर स्थहान्दोगदेसे थेदा “एनोन गालील अञ्चलला हिन्ना? परमेश्वरला बचन ज्यना लसी पढब लउ। जमाहेन्से एसे गालीलग्याम खाइमै खालै अगमवक्ता आख भिबा ताम था याङ्ला” भिसी भिजी। ५३ जमाहेन्से थेनीगदे जम्मान हाड हाङला दिमरी निजी।

स्थहान्दोदेन छ्याम ब्रेल्सी भ्रबा प्रिडम्हेमे

तर येशू चा जैतून भिबा गडरी फेप्जी। २ येशू न्हङगरदड

७:४० “थेनोन अगमवक्ता” भिबा चा यूहन्ना हिन्ना (यूहन्ना १:२१ स्हीगो)।

७:४० व्यव १८:१५ ७:४२ २ शामू ७:१२; यर्मि २३:५-६; मीका ५:२; भजन ८६:३-४

७:५० यहू ३:१-२

स्थहोरीन परमेश्वरला मन्दिररी फेप्खजी। जमाहेन्से जम्मान म्हिगदे येशू मुबा ग्लारी खजी। ओच्छे येशू धन्छ्यासी जम्मान म्हिगदेदा लोप्बारी छ्याइजी।

३ यहूदी धर्मगुरुगदेदेन फरिसीगदेसे स्थहान्दोदेन छ्याम ब्रेल्सी चिबान लबा धुइरी स्याप्बा म्रिडम्हेमेदा चुइसी येशू मुबा ग्लारी भजी। ओच्छे जम्मालान डाच्छा थे म्रिडम्हेमेदा राप्सी चिपुइजी। ४ थेनीगदेसे येशूदा चुहङ् भिसी भिजी, “गुरु, चु स्थहान्दोदेन छ्याम ब्रेल्बान लबा म्रिडम्हेमेदा चुइसी डन्से हाड मुबा ग्लारी भसी खबा मुला। ५ यहाडला मोशासे ठिमरी चुहङ्बा म्रिडम्हेमेदा युडबासे तोसी साइगो भिसी कुल्बा मुला। हाडसे चा चुला बारेरी तिग सुङ्बा?”* ६ तर येशूदा दोष लम्याङ्ला कि भिसी थेनीगदेसे चुहङ् भिसी ड्योइबा मुबा।

येशूसे कू तसी या जुम्बीसे सरी भ्रिबारी छ्याइजी। ७ थेनीगदेसे येशूदा ड्योइबाला ड्योइबान लमाहेन्से येशू राप्सी थेनीगदेदा “जुन म्हिसे खाइमै पाप लबा आरे थेसे डाच्छा चु म्रिडम्हेमेदा युडबासे तोड” भिसी सुङ्जी। ८ जमाहेन्से येशूसे दोःसी कू तसी सरी भ्रिजी।

९ चु ताम थेःसी थेरी मुबा जम्मान म्हिगदे घेनहेन्से जजाधोना गिक गिक लसी थेग्याम निजी। ओच्छे थेरी येशूदेन छ्याम थे म्रिडम्हेमे जे तजी। थे म्रिडम्हेमे चा अभ येशूला डाच्छापट्टि राप्सी चिबा मुबा। १० जमाहेन्से येशू राप्सी थे म्रिडम्हेमेदा चुहङ् भिसी सुङ्जी, “खाइ, एदा दोष लबा म्हिगदे खानड निजी? तिग थेनीगदे खालैसेन एदा सजाय आपिनी?”

११ जमाहेन्से थे म्रिडम्हेमेसे येशूदा “प्रभु, खालैसेन तिगै आलनी” भिसी भिमा, येशूसे थेदा “डाइएनोन एदा सजाय आपिन, दाहेन्से निउ, तर दोःसी पाप थालउ” भिसी सुङ्जी।†

जम्बुलिङला य्हाल

१२ दोःसीनोन येशूसे म्हिगदेदा लोप्बान, “जम्बुलिङला य्हाल डानोन हिन्ना। डादेन छ्याम भ्रबा म्हि खाइमै धोपधोपरी भ्रआतोः। तिगदा भिसम थेसे जुनी पिन्बा य्हाल याङ्ला” भिसी सुङ्जी।*

१३ जमाहेन्से फरिसीगदेसे येशूदा “एसे हाडलान बारेरी पाङ्बान मुला, एसे पाङ्बा ताम सत्य आहिन” भिसी भिजी।*

१४ येशूसे थेनीगदेदा चुहङ् भिसी सुङ्जी, “डाइ डालान बारेरी पाङ्सैनोन

७:५३ जम्मान भन्दा पुरानो ग्रीक बाइबलगदेरी ७:५३ पदहेन्से ८:११ पदधोनाला ताम भ्रिबा आरे।

८:५ लेवी २०:१०; व्यव २२:२२-२४ ८:१२ मत्ती ५:१४; यूह ६:५ ८:१३ यूह ५:३१

डाइ पाङ्बा ताम सत्य हिन्ना। तिग्दा भिसम डा खानङ्ग्याम खबा हिन्ना, ओच्छे खानङ्ग निबान मुला भिबा ताम डादा था मुला। तर एनीगदेदा चु ताम था आरे। ^{१५}एनीगदेसे मी म्हिला ज्ञान बुद्धिग्याम निसाफ लमुला। तर डाइ मी खालैला निसाफ आल। ^{१६}चुदे डा हाङ्गसेन निसाफ लतो:जी भिसम डाइ लबा निसाफ चा सत्य तला। तिग्दा भिसम डा गिक जे आरे, तर डादा पुइखबा आबाएनोन डादेन छ्याम मुला। ^{१७}मोशासे पिन्बा एनीगदेला ठिमरी म्हि न्हीसे पाङ्बा ताम चा सत्य तमुला भिसी भिबा मुला।* ^{१८}हाङ्गलान बारेरी सत्य ताम पाङ्बा म्हि गिक चा डानोन हिन्ना, ओच्छे स्थहान्दो चा डादा पुइखबा आबा हिन्ना।”

^{१९}चु ताम थे:सी थेनीगदेसे येशूदा “एला आबा खानङ्ग मुला?” भिसी ड्योइमा, येशूसे थेनीगदेदा “एनीगदेसे डादाएनोन डोसेबा आरे, डाला आबादाएनोन डोसेबा आरे। चुदे एनीगदेसे डादा डोसेबा हिन्सम डाला आबादाएनोन डोसेसेला मुबा” भिसी सुङ्गी।

^{२०}चु जम्मान ताम येशूसे परमेश्वरला मन्दिररी भेटी युबा ताङ्ग मुबा ग्लाग्याम लोप्बान लबा धुइरी सुङ्ग मुबा। तर थेनीगदे खालैसेन येशूदा आचुङ्गी।

तिग्दा भिसम अभ येशूला धुइ तबा आरेमुबा।

म्हिगदेसे येशूदा डोआसेबा

^{२१}दो:सी येशूसे थेनीगदेदा “डा चुग्याम निनोन निला, ओच्छे एनीगदेसे डादा म्हाइला। तर एनीगदे हाङ्गलान पापरी सिला। डा निबा ग्लारीनोन एनीगदे खबारी आखम” भिसी सुङ्गी।

^{२२}चु ताम थे:सी यहूदी नेतागदेसे “चु म्हि सिबारी म्हाइबा कि तिग? चुसे मी ‘डा निबा ग्लारी एनीगदे खबारी आखम भिसी भिमुला’ भिसी हाङ्ग हाङ्ग न्हडरी ताम लजी।”

^{२३}जमाहेन्से येशूसे थेनीगदेदा “एनीगदे मारग्याम खबा हिन्ना, डा तोरग्याम खबा हिन्ना। एनीगदे चुनोन जम्बुलिङ्गला हिन्ना, तर डा चा चु जम्बुलिङ्गला आहिन। ^{२४}थेतबासेलमा ‘एनीगदे हाङ्गलान पापरी सिला’ भिसी डाइ एनीगदेदा पाङ्गी जिन्बा मुला। चुदे एनीगदेसे ‘डा थेनोन हिन्ना’[†] भिसी डादा विश्वास आलनी भिसम एनीगदे हाङ्गलान पापरी सिला।”

^{२५}जमाहेन्से थेनीगदेसे येशूदा “ए खाल हिन्ना?” भिसी ड्योइमा, येशूसे थेनीगदेदा चुहङ्ग भिसी सुङ्गी, “डा थेनोन हिन्ना, चु ताम डाइ एनीगदेदा डाच्छान पाङ्ग मुला। ^{२६}एनीगदेला

८:२४ “डा थेनोन हिन्ना” भिबा चा परमेश्वरला बचनरी परमेश्वरला मिन हिन्ना।

८:१७ व्यव १६:१५; गन्ती ३५: ३०

बारेरी डाइ पाङ्तोःबा तामदेन एनीगदेला निसाफ लतोःबा ताम ल्हानान मुला। तर डादा पुइखबा चा सत्य मुला, ओच्छे थेग्याम डाइ जुन ताम थेःजी थेनोन ताम डाइ जम्बुलिङला म्हिगदेदा पाङ्बा मुला।”

२७ येशूसे परमेश्वर आबाला बारेरी सुङ्बान मुबा भिबा ताम थेनीगदेसे आघोनी। २८ थेतबासेलमा येशूसे थेनीगदेदा चुहङ् भिसी सुङ्जी, “एनीगदेसे परमेश्वरसे पुइखबा म्हिदा तोर थीमाहेन्से” जे डा थेनोन चीम भिबादेन डाइ डालान सेमग्याम ताम पाङ्बा आहिन्बा चीम, तर परमेश्वर आबासे लोण्बा अन्छार जे पाङ्बा चीम भिबा ताम एनीगदेसे था याङ्ला। २९ ओच्छे डादा पुइखबा डादेन छ्यामनोन मुला, थेसे डादा खाइमै आरुलामुला। तिगदा भिसम डाइ सदन थेदा सेम निबा गे जे लमुला।” ३० चु ताम थेःसी ल्हानान म्हिगदेसे येशूदा विश्वास लजी।

सत्यसे पापग्याम फेला

३१ येशूसे हाडदा विश्वास लबा यहूदीगदेदा चुहङ् भिसी सुङ्जी, “एनीगदे डाइ लोण्बा अन्छार भ्रजी भिसम एनीगदे डाला पक्का चेला दोला। ३२ ओच्छे सत्य तिग हिन्ना भिसी एनीगदेसे था याङ्ला, थेनोन

सत्यसे एनीगदे खालैला तहरी चिआतोः।”

३३ थेनीगदेसे येशूदा “डनी अब्राहामला सन्तान हिन्ना, दान्देधोना डनी खालैला नोकर दोबा आरे। हाडसे डन्दा स्थहान्दोला तहग्याम फेला भिसी सुङ्बाला अर्थ चा तिग हिन्ना?” भिसी भिजी।*

३४ जमाहेन्से येशूसे थेनीगदेदा चुहङ् भिसी सुङ्जी, “च्यागो, एनीगदेसे डाला ताम ड्यान्गो, पाप लबागदे जम्मान पापला तहरी तला। ३५ नोकर सदन मालिकला दिमरी आचि, तर भा चा सदन चिला। ३६ थेतबासेलमा परमेश्वरला भासे एनीगदेदा फेजी भिसम एनीगदे पक्कान फेला। ३७ एनीगदे अब्राहामला सन्तान हिन्ना भिसी डादा था मुला। तसैनोन एनीगदेसे डाइ पाङ्बा ताम नाबारी आखम्बासे लमा डादा साइबारी म्हाइबा मुला। ३८ डा डाला आबादेन छ्याम मुबा धुइरी डाइ जुन ताम म्राङ्मुबा, थेनोन ताम डाइ एनीगदेदा पाङ्बा हिन्ना। तर एनीगदेसे चा एनीगदेला आबाग्याम तिग थेःबा मुला थेनोन लमुला।”

३९ थेनीगदेसे येशूदा “डन्ना आबा चा अब्राहामनोन हिन्ना” भिसी भिमा, येशूसे थेनीगदेदा चुहङ् भिसी सुङ्जी, “एनीगदे पक्कान अब्राहामला सन्तान हिन्सम अब्राहामसे लबा हङ्बा गे

८:२८ “तोर थीमाहेन्से” भिबा चा येशूदा कुसरी टाँगब लबा हिन्ना।

८:३३ मत्ती ३:६; लूका ३:८

एनीगदेसेनोन लसेला मुबा। ४० तर डाइ परमेश्वरग्याम थे:बा सत्य ताम एनीगदेदा पाङ्मा एनीगदेसे चा डादा साइबारी म्हाइजी। तर अब्राहामसे मी चुहङ्बा गे आलनी। ४१ एनीगदेला आबासे जुन गे लबा मुबा, थेनोन गे एनीगदेसेनोन लबा मुला।”

जमाहेन्से थेनीगदेसे येशूदा “डनी स्थहान्दोदेन छ्याम ब्रेल्सी भ्रमा न्हबा कोलागदे आहिन, तर परमेश्वरनोन डन्ना आबा हिन्ना” भिसी भिजी।

४२ येशूसे थेनीगदेदा चुहङ् भिसी सुङ्जी, “च्यागो, एनीगदेला आबा परमेश्वरनोन हिन्सम एनीगदेसे डादा माया लसेला मुबा। तिग्दा भिसम परमेश्वरसे पुइखबासे लमा डा दान्दे चुरी मुला। डा हाङला सुरसे खबा आहिन, तर परमेश्वरसेन डादा पुइखबा हिन्ना। ४३ एनीगदेसे तिग्दा डाइ पाङ्बा ताम आघोबा? तिग्दा भिसम एनीगदेसे डाला ताम नाआखम्नी। ४४ एनीगदेला आबा शैतान हिन्ना, एनीगदेसे हाङला आबासे म्हन्बा अन्छारनोन गे लमुला। थेसे मी डाच्छाहेन्से म्हि साइबा मुबा, थे सत्यरी खाइमै भ्रबारी आखम। तिग्दा भिसम थेदेन छ्याम सत्य भिबा मुनोन आरे। थेसे सदन हाङला बानीबेहोर अन्छार लुसीला ताम पाङ्मुला। थेतबासेलमा थे लुसीला ताम पाङ्बा म्हि हिन्ना, थे जम्मान लुसीला तामला आबा हिन्ना। ४५ तर एनीगदेसे डाला ताम विश्वास आलमुला। तिग्दा भिसम डाइ सत्य ताम पाङ्मुला। ४६ एनीगदे

न्हङला खाल्से डादा पापी भिसी दोष लबारी खम्ला? डाइ सत्य ताम पाङ्मा एनीगदेसे तिग्दा डादा विश्वास आलबा? ४७ परमेश्वरला म्हिगदेसे परमेश्वरला ताम ड्यान्मुला। तर एनीगदे चा परमेश्वरला म्हि आहिन। थेतबासेलमा एनीगदेसे परमेश्वरला ताम आड्यान्मुला।”

अब्राहाम भन्दा येशू डाच्छा

४८ यहूदी नेतागदेसे येशूदा “डन्से पाङ्बा ताम ठीक हिन्ना। ए सामरी यहुलला हिन्ना, एदा म्हङसे स्याप्बा मुला” भिसी भिजी।

४९ येशूसे थेनीगदेदा चुहङ् भिसी सुङ्जी, “डादा म्हङसे स्याप्बा आरे। डाइ डाला आबादा मान लबा मुला, तर एनीगदेसे डादा पे:ना लमुला। ५० डाइ डादा मान लगै भिसी म्हन्बा आहिन, तर डादा मान लबादेन डाला लागिरी निसाफ लसी पिन्बा म्हि स्थहान्दोन मुला। ५१ थेतबासेलमा च्यागो, एनीगदेसे डाला ताम ड्यान्गो, चुदे खालै म्हिसे डाला ताम ड्यान्जी भिसम थे खाइमै आसि।”

५२ यहूदीगदेसे येशूदा चुहङ् भिसी भिजी, “एदा म्हङसे स्याप्बान हिन्ना भिसी दाहेन्से डन्दा पक्का था तजी। तिग्दा भिसम अब्राहामदेन अगमवक्तागदे सिजी, तर एसे चा ‘खालै म्हिसे डाइ पाङ्बा ताम ड्यान्जी भिसम थे खाइमै आसि’ भिसी भिमुला। ५३ तिग ए डन्ना म्हेमे

अब्राहाम भन्दा घेन हिन्ना? थे सिजी, ओच्छे अगमवक्तागदेएनोन सिजी। एसे चा हाडदा खाल भिसी म्हन्बा?”

५४ येशूसे थेनीगदेदा चुहङ् भिसी सुङ्जी, “डाइ हाडदा मान लगै भिसी म्हन्जी भिसम थे गे आखेल्ला ताम हिन्ना। तर डादा मान पिन्बा चा डालान आबा हिन्ना, डाला आबादान एनीगदेसे यहाडला परमेश्वर भिसी पाङ्मुला। ५५ तर एनीगदेसे थेदा डोसेबा आरे। डाइ चा थेदा ज्यना लसी डोसेबा मुला। चुदे डाइएनोन थेदा डोसेबा आरे भिसी भिजी भिसम डाएनोन एनीगदे हङ्बान लुसीला ताम पाङ्बा म्हि दोला। तर डाइ थेदा डोसेबा मुला, ओच्छे थेसे सुङ्बा अन्छारनोन डाइ गे लबा मुला। ५६ एनीगदेला म्हेमे अब्राहामसेनोन डा खबा धिन च्याबारी ल्हानान सेम लबा मुबा। ओच्छे थेसे डा खबा धिन म्हाङ्सी जिन्बासे लमा ताङ्जी।”

५७ थेतबासेलमा यहूदीगदेसे येशूदा “एसे बोगल न्हीसे च्युइ दिङ् मी तबा आरे भिसम खाहङ् लसी एसे अब्राहामदा म्हाङ्जी?” भिसी भिजी।

५८ जमाहेन्से येशूसे थेनीगदेदा “च्यागो, एनीगदेसे डाला ताम ड्यान्गो, अब्राहाम न्हबा भन्दा डाच्छाहेन्सेन ‘डा थेनोन हिन्ना’ भिबा मुनोन मुबा” भिसी सुङ्मैछ्याम, ५९ थेनीगदेसे येशूदा तोबारी भिसी युडबा दुङ्जी।

तर येशू लासी परमेश्वरला मन्दिरला ग्यापग्याम सुटुक्क थोन्सी फेप्जी।

मी आम्राङ्बा म्हिसे म्हाङ्बा

६ थेग्याम फेप्बान लमा येशूसे न्हमान मी आम्राङ्बा म्हि गिकदा स्याप्जी। २ येशूला चेलागदेसे येशूदा “गुरु, खाल्ला पापसे लमा चु म्हि न्हमान काना न्हजी, चुलान पापसे लमा कि चुला आबा आमाला पापसे लमा चुहङ् तबा हिन्ना?” भिसी ड्योइजी।

३ जमाहेन्से येशूसे थेनीगदेदा चुहङ् भिसी सुङ्जी, “थेला पापसे लमाएनोन आहिन, थेला आबा आमाला पापसे लमाएनोन आहिन। तर परमेश्वरला गे थेग्याम म्हाङ्गै भिसीन थे काना तबा हिन्ना। ४ धिनी मुबा धुइरीन यहाडसे डादा पुइखबाला गे लतोःला। धोप तमाहेन्से खालैसेन गे लबारी आखम। ५ डा जम्बुलिङ्गरी चितेधोना डानोन जम्बुलिङ्गला यहाल हिन्ना।”*

६ चुहङ् सुङ्माहेन्से येशूसे सरी थो स्वाजी, ओच्छे थोसे साप्रा ज्योप्सी थे काना म्हिला मीरी फोर्सी पिन्जी। ७ ओच्छे थेदा चुहङ् भिसी सुङ्जी, “सिलोआम भिबा घ्योइरी निसी ली खुउ।” सिलोआम भिबाला अर्थ चा पुइबा हिन्ना। ओच्छे थे, थे घ्योइरी निसी ली खुजी। जमाहेन्से थेसे म्हाङ्जी, ओच्छे दोःसी खजी। ८ थेला

खिम्जेमगदेदेन थेदा डाच्छा हीसी चिबा म्राङ्बा म्हिगदेसे “तिग चु थे हीबा म्हि आहिन?” भिसी ड्योइजी। ६कोइ कोइ म्हिसे थेदा म्राङ्सी, “चु मी थेनोन हीबा म्हि हिन्ना” भिसी भिबान मुबा। स्थहान्दोगदेसे चा हिन्बाम थे हङ्बान म्राङ्बा चीम, तर थे म्हि “आहिन” भिसी भिजी।

तर थे म्हिसे “डा थेनोन हिन्ना” भिसी भिबाला भिबान मुबा।

१०थेनीगदेसे थेदा “दान्दे एसे खाहङ् लसी म्राङ्जी?” भिसी ड्योइजी।

११जमाहेन्से थेसे थेनीगदेदा “येशू भिबा म्हि गिकसे साप्रा ज्योप्सी डाला मीरी फोर्सी डादा ‘सिलोआमरी निसी खुउ’ भिसी सुङ्जी। ओच्छे निसी खुमाहेन्से डाइ म्राङ्जी” भिसी भिजी। १२थेनीगदेसे थेदा “थे म्हि खानड मुला?” भिसी ड्योइमा, थेसे “डादा था आरे” भिसी भिजी।

फरिसीगदेसे ड्योइबा छार्बा लबा

१३जमाहेन्से थेनीगदेसे डाच्छा काना मुबा म्हिदा फरिसीगदे मुबा ग्लारी भोर्जी। १४येशूसे साप्रा ज्योप्सी थेला मीरी फोर्सी थेदा खम्ना लबा धिन चा ब्लप्बा न्हबा धिनकुनु मुबा। १५फरिसीगदेसेनोन थेदा “एसे खाहङ् लसी म्राङ्जी?” भिसी ड्योइमा, थेसे थेनीगदेदा “येशूसे साप्रा ज्योप्सी डाला मीरी फोर्सी पिन्जी, ओच्छे डाइ खुमाहेन्से म्राङ्जी” भिसी भिजी।

१६फरिसीगदे न्हडला कोइ कोइसे “थे म्हि परमेश्वरग्याम खबा आहिन। तिग्दा भिसम थेसे ब्लप्बा न्हबा धिनदा आधङ्मुला” भिसी भिजी। तर स्थहान्दोगदेसे चा “पापी म्हिसे खाहङ् लसी चुहङ्बा उदेकला गे लबारी खम्ला?” भिसी भिजी। थेतबासेलमा थेनीगदे हाड हाड न्हडरी आढिकनी।

१७थेनीगदेसे दोःसीनोन थे काना म्हिदा “थे म्हिसे एला मी खम्ना लजी, दाहेन्से एसे चा थे म्हि खाल भिसी म्हन्बा मुला” भिसी ड्योइमा, थेसे “थे म्हि अगमवक्ता हिन्ना” भिसी भिजी।

१८यहूदी नेतागदेसे थे पक्कान काना मुबा, ओच्छे दान्दे म्राङ्खम्बा हिन्ना भिसी विश्वास लबारी आखम्नी। थेतबासेलमा थेनीगदेसे थेला आबा आमादा ड्योइसी, १९“चु एनीगदेलान भा हिन्ना? तिग चु न्हमान काना न्हबा हिन्ना? थेहङ् भिसम दान्दे चा चुसे खाहङ् लसी म्राङ्जी?” भिसी ड्योइजी।

२०जमाहेन्से थेला आबा आमासे चुहङ् भिसी भिजी, “हिन्ना, चु डन्नान भा हिन्ना, चु न्हमान काना मुबा। २१तर चुला मी खाल्से खम्ना लसी म्राङ्खम्जी भिबा ताम डन्दा था आरे। चु दिड छ्योसी जिन्बा म्हि हिन्ना, थेसे हाडला बारेरी हाडसेन पाङ्खम्ला। थेतबासेलमा हाडनीसे थेदान ड्योइगो।” २२यहूदी नेतागदेदेन छ्याम लोङ्सी थेनीगदेसे थेहङ् भिसी पाङ्बा हिन्ना। तिग्दा भिसम

जुन म्हिसे येशूदा थाबा पिन्बा ख्रीष्ट हिन्ना भिसी विश्वास लला थेदा यहूदीगदे हुप तबा दिमग्याम ते:तो:ला भिसी यहूदीगदेसे डाच्छान सल्लाह लसी जिन्बा मुबा। ^{२३}थेतबासेलमान थेला आबा आमासे “चु दिड छ्योसी जिन्बा म्हि हिन्ना, चुदान ड्योइगो” भिसी पाङ्जी।

^{२४}जमाहेन्से थेनीगदेसे दो:सीनोन थे काना म्हिदा ड्योइसी, “एसे सत्य ताम पाङ्सी परमेश्वरदा मानदेन जयजयकार लउ, थे येशू चा पापी हिन्ना भिसी डन्दा था मुला” भिसी भिजी।

^{२५}थे म्हिसे थेनीगदेदा “थे पापी हिन्ना कि आहिन भिबा ताम मी डादा था आरे। तर डाच्छा डा काना मुबा, दान्दे डाइ म्हाङ्मुला भिबा ताम जे डादा था मुला” भिसी भिजी।

^{२६}जमाहेन्से थेनीगदेसे थेदा “थे म्हिसे एदा तिग लजी? खाहङ् लसी थे म्हिसे एला मी खम्ना लजी?” भिसी ड्योइजी।

^{२७}थेसे थेनीगदेदा “डाइ हाङनीदा दोलोन पाङ्सी जिन्जी, तर हाङनीसे वास्तान आलनी दान्दे दो:सी तिगदा ड्योइबा, तिग हाङनीएनोन थेला चेला दोबारी म्हाइबा हिन्ना?” भिसी जोहाब पिन्जी।

^{२८}थेनीगदेसे थेदा खिसी लबान चुहङ् भिजी, “ए गा थेला चेला हिन्ना, डनी मी मोशाला चेला हिन्ना।

^{२९}मोशादेन छ्याम परमेश्वरसे ताम

लबा डन्दा था मुला, तर चु म्हि चा खानङ्ग्याम खजी थे ताम डन्दाएनोन था आरे।”

^{३०}जमाहेन्से थेसे थेनीगदेदा चुहङ् भिसी भिजी, “चु खाहङ्बा उदेकला ताम! येशूसे डाला मी खम्ना लजी। तर हाङनीसे चा येशू खानङ्ग्याम फेप्खजी भिबा ताम डन्दा था आरे। ^{३१}परमेश्वरसे पापी म्हिला ताम आङ्यान्मुला, तर थेदा मान लबादेन थेसे म्हन्बा अन्छार गे लबा म्हिला जे ताम ड्यान्मुला भिसी य्हाड जम्मादान था मुला। ^{३२}जम्बुलिङ छ्यामाहेन्से दान्देधोना खालै म्हिसे न्हमान काना मुबा म्हिला मी खम्ना लजी भिबा ताम थे:बा आरे। ^{३३}चु येशू परमेश्वरग्याम फेप्खबा आहिनसम येशूसे चुहङ्बा तिगै गे लबारी आखम्सेला मुबा।”

^{३४}थेनीगदेसे थेदा “ए पापरी न्हसी पापरीन छर्बा म्हिसे डन्दा लोप्बारी म्हाइबा?” भिसी भिजी। ओच्छे थेनीगदेसे थेदा यहूदीगदे हुप तबा दिमग्याम ते:जी।

परमेश्वरदा डोआसेबा म्हि काना हङ्बान हिन्ना

^{३५}यहूदीगदेसे थे काना म्हिदा यहूदीगदे हुप तबा दिमग्याम ते:जी भिबा ताम येशूसे थे:जी। ओच्छे थेदेन छ्याम हुप तसी येशूसे “तिग एसे परमेश्वरसे पुइखबा म्हिदा विश्वास लला?” भिसी ड्योइजी।

३६ थेसे येशूदा “प्रभु, डाइ थेदा विश्वास लबारी थे खाल हिन्ना?” भिसी भिमा,

३७ येशूसे थेदा “थे म्हि एसे म्राङ्सी जिन्बा मुला, दान्दे थे म्हि एदेन छ्याम ताम लबान मुला” भिसी सुङ्जी।

३८ चु ताम थे:सी थेसे येशूदा फ्या लबान, “प्रभु, डाइ विश्वास लला” भिसी जयजयकार लजी।

३९ ओच्छे येशूसे, “कानागदेसे म्राङ्गै, ओच्छे डा काना आहिन भिसी भिबा म्हिगदेसे चा थाम्राङ्गै भिसी निसाफ लबाला लागिरीन डा चु जम्बुलिङरी खबा हिन्ना” भिसी सुङ्जी।

४० चु ताम थे:सी थेरी मुबा कोइ कोइ फरिसीगदेसे येशूदा “तिग डनीएनोन काना हिन्ना?” भिसी भिजी।

४१ जमाहेन्से येशूसे थेनीगदेदा “बरु एनीगदे कानान मुबा हिन्सम पापला दोष लगब आतसेला मुबा, तर एनीगदेसे ‘डन्से म्राङ्मुला’ भिसी भिबासे लमा एनीगदेदा सदन पापला दोष तला” भिसी सुङ्जी।

येशू ज्यबा गोठालो

१० येशूसे थेनीगदेदा चुहङ् भिसी सुङ्जी, “च्यागो, एनीगदेसे डाला ताम ड्यान्गो, ग्युला गोठेरी म्रापग्याम आवाङ्ना अर्गुपट्टिग्याम वाङ्बा म्हि चा यहोदेन डाँका हिन्ना। २ तर ग्युगदेला गोठालो चा म्रापग्याम वाङ्मुला। ३ गोठे खुङ्बा

म्हिसे गोठालोदा म्राप ठोङ्सी पिन्ना। जमाहेन्से गोठालोसे ग्युगदेदा मिन किन्सी किन्सी ड्योइला। जमाहेन्से ग्युगदेसे गोठालोला काइ थे:ला, ओच्छे गोठालोसे ग्युगदेदा मङ्ग्यार भोर्ला। ४ हाङला जम्मान ग्युगदे मङ्ग्यार ते:सी जिन्माहेन्से गोठालो डाच्छा डाच्छा भ्रला, ओच्छे ग्युगदे चा गोठालोला लिच्छा लिच्छा भ्रला। तिगदा भिसम ग्युगदेसे हाङला गोठालोला काइ डोसेला। ५ डोआसेबा म्हिसे ड्योइजी भिसम ग्युगदे थे म्हिदेन छ्याम आनि। बरु थे म्हिला काइ डोआसेबासे लमा थेनीगदे लोङ्सी यार्ला।”

६ येशूसे थेनीगदेदा चु उखान सुङ्जी। तर थेनीगदेसे उखानना अर्थ आघोनी।

सत्य म्राप

७ थेतबासेलमा दो:सीनोन येशूसे थेनीगदेदा चुहङ् भिसी सुङ्जी, “च्यागो, एनीगदेसे डाला ताम ड्यान्गो, ग्युगदे वाङ्बा म्राप डानोन हिन्ना। ८ डा भन्दा डाच्छा खबागदे चा जम्मान यहोदेन डाँका हिन्ना, तर ग्युगदेसे थेनीगदेला ताम आङ्यान्नी। ९ म्राप चा डानोन हिन्ना, चुदे खालै म्हि डाग्याम न्हङरी वाङ्जी भिसम थे जोगब तला। थेनीगदे गोठे न्हङरी निबा मङ्ग्यार थोन्बा लला, ओच्छे पिङ पिङबा छे याङ्बा पाङरी चम्याङ्गला।

१० “यहो मी यहो लबारी, साइबारी ओच्छे नाश लबारी भिसी जे खमुला।

तर डा मी थेनीगदेसे पूरान जुनी याङ्गै भिसी खबा हिन्ना। ^{११}ज्यबा गोठालो चा डानोन हिन्ना। हाडला ग्युगदेदा जोगब लबाला लागिरी ज्यबा गोठालो चा सिबारीन तयार तमुला। ^{१२}तर जुन म्हि ग्यु छबारी जे थान्ना ओच्छे थे साँच्चिलान गोठालो आहिन ओच्छे ग्युगदेएनोन थेला आहिन भिसम थेहड्बा म्हि फार्बा खबा म्हाड्माहेन्से ग्युगदेदा रूलासी यार्ला। ओच्छे फार्बासे ग्युगदेदा व्हाला, जमाहेन्से ग्युगदे ससा बडबड तला। ^{१३}थेसे ग्युगदेदा तिगै वास्ता आलना यार्ला। तिगदा भिसम थे टाडगा किन्सी गे लबा म्हि जे हिन्ना।

^{१४-१५}“ज्यबा गोठालो चा डानोन हिन्ना। आबासे डादा, डाइ आबादा डोसेबा हड् लसी डाइ डाला ग्युगदेदा डोसेमुला, ओच्छे ग्युगदेसेनोन डादा डोसेमुला। थेतबासेलमा डाइ डाला ग्युगदेला लागिरी हाडला ज्याननोन पिन्ना।* ^{१६}डाला अर्गु ग्युगदेएनोन मुला, थेनीगदे चा चु गोठेला आहिन। डाइ थेनीगदेदाएनोन भतोःबा मुला, थेनीगदेसे डाला काइ थेःसी बगाल गिकनोन तला। ओच्छे थेनीगदेला गोठालोएनोन गिकनोन तला।

^{१७}“डाइ डाला प्राण पिन्बा चा दोःसी किन्बाला लागिरी हिन्ना। थेतबासेलमा डाला आबासे डादा माया लबा हिन्ना। ^{१८}खालैसे डाग्याम

डाला प्राण किन्बारी आखम, तर डाइ डालान सेमसे डाला प्राण पिन्ना। डादा डाला प्राण पिन्बा अधिकारएनोन मुला, दोःसी किन्बा अधिकारएनोन मुला। डाला आबासे डादा कुल्बा तामएनोन चुनोन हिन्ना।”

^{१९}चु ताम थेःसी दोःसीनोन यहूदीगदे हाड हाड न्हडरी आढिकनी। ^{२०}ल्हानान म्हिगदेसे येशूला बारेरी, “चु म्हडसे स्याप्सी म्योबा मुला। एनीगदेसे तिगदा चुला ताम ड्यान्बा?” भिसी हाड हाड न्हडरी पाड्बान मुबा।

^{२१}तर स्यहान्दो म्हिगदेसे चा “म्हडसे स्याप्बा म्हिसे चुहड्बा ताम लबारी आखम! तिग म्हडसे स्याप्बा म्हिसेनोन काना म्हिला मी खम्ना लबारी खम्ला?” भिसी पाड्बान मुबा।

यहूदीगदेसे येशूदा विश्वास आलबा

^{२२}यरूशलेम शहररी परमेश्वरला मन्दिर अर्पण लबा चाड खबा मुबा। थे धुइ चा सेखरी मुबा। ^{२३}येशू परमेश्वरला मन्दिरला सोलोमन भिबा दलानरी भ्रबान मुबा। ^{२४}यहूदीगदे येशूला क्युर्सीन पोप तसी, “हाडसे डन्दा खाडमाधोना अलमल तना लसी थान्बा? चुदे हाड थार्बा पिन्बा ख्रीष्टनोन हिन्सम डन्दा सिधान सुङ्गो” भिसी भिजी।

^{२५}जमाहेन्से येशूसे थेनीगदेदा चुहड्बा भिसी सुङ्गी, “डाइ डाच्छान पाड्सी

जिन्बा मुला, तर एनीगदेसे विश्वास आलनी। डाइ डाला आबाग्याम अधिकार याङ्सी लबा गेग्यामसेन डा खाल हिन्ना भिसी उन्ना। ^{२६}तर एनीगदेसे डादा विश्वास आलनी, तिग्दा भिसम एनीगदे डाला ग्युगदे आहिन। ^{२७}डाला ग्युगदेसे डाला काइ डोसेमुला, ओच्छे डाइएनोन थेनीगदेदा डोसेमुला। थेनीगदे डादेन छ्याम भ्रमुला। ^{२८}थेनीगदे खाइमै नाश आत। तिग्दा भिसम डाइ थेनीगदेदा जुकजुकधोनाला जुनी पिन्ना। ओच्छे खालैसेन थेनीगदेदा डाग्याम ब्यन्सी भोर्बारी आखम। ^{२९}चुगदे डादा पिन्बा डाला आबा चा जम्मान भन्दा घेन मुला। थेग्यामसे मी भन खालैसेन चुगदेदा ब्यन्सी भोर्बारी आखम। ^{३०}आबादेन डा गिकनोन हिन्ना।”

^{३१}चु ताम थे:सी यहूदी नेतागदेसे दो:सीनोन येशूदा तोबारी भिसी युडबा दुइजी। ^{३२}तर येशूसे थेनीगदेदा “आबासे कुल्बा जम्मान ज्यबा गेगदे डाइ एनीगदेला ओन्छाडरी लबा मुला। थे गेगदे न्हडला खजिबा गेला लागिरी एनीगदेसे डादा युडबासे तोबारी म्हाइबा?” भिसी सुङ्जी।

^{३३}जमाहेन्से यहूदी नेतागदेसे येशूदा “एसे ज्यबा गे लबासे लमा डन्से एदा युडबासे तोबारी म्हाइबा आहिन। तर एसे परमेश्वरला बिरोध लसी ताम लबासे लमान डन्से एदा युडबासे

तोबारी छ्याइबा हिन्ना। ए म्हि तसीनोन हाडसे हाडदान परमेश्वर स्होबा?” भिसी भिजी।*

^{३४}येशूसे थेनीगदेदा चुहङ् भिसी सुङ्जी, “एनीगदेला हाडलान ठिमरी ‘एनीगदे ल हिन्ना’ भिसी परमेश्वरसे सुङ्बा ताम भिबा आरे?” ^{३५}जुन म्हिगदे मुबा ग्लारी परमेश्वरला बचन खजी परमेश्वरसे थेनीगदेन ल हिन्ना भिसी पाङ्मा परमेश्वरला बचन न्होङ्बारी आखम्नी भिसम, ^{३६}परमेश्वर आबासेन धम्सी चु जम्बुलिडरी पुइखबा म्हिसे ‘डा परमेश्वरला भा हिन्ना’ भिसी पाङ्मा खाहङ् लसी डाइ परमेश्वरला बिरोध लबा तला? ^{३७}चुदे डाइ डाला आबाला गे लबा आरे भिसम डादा विश्वास लआतो:। ^{३८}तर चुदे डाइ डाला आबाला गे लसीनोन डादा विश्वास आल भिसम चु गेगदेदा मी विश्वास लउ। जमाहेन्से एनीगदेसे परमेश्वर आबा डादेन छ्याम डा परमेश्वर आबादेन छ्याम मुला भिबा ताम पक्कान था याङ्ला।” ^{३९}चु ताम थे:सी थेनीगदेसे दो:सीनोन येशूदा चुङ्बारी म्हाइजी। तर येशू थेनीगदेला याग्याम स्योर्जी।

^{४०}येशू दो:सीनोन यर्दन स्योडला क्याम्सड फेप्सी धन्छ्याजी। थे ग्लारी डाच्छा यूहन्नासे बप्तिस्मा पिन्मुबा।* ^{४१}ल्हानान म्हिगदे येशू मुबा ग्लारी

खजी। ओच्छे थेनीगदेसे, “यूहन्नासे मी तिगै उदेकला गे आलनी, तर यूहन्नासे येशूला बारेरी जुन जुन ताम पाङ्मुबा थे जम्मान ताम सत्य चीम” भिसी भिजी। ^{४२}ओच्छे थेरी ल्हानान म्हिगदेसे येशूदा विश्वास लजी।

लाजरस सिबा

११ बेथानिया भिबा नाम्सारी लाजरस भिबा म्हि गिक आखम्बा मुबा। थेनोन नाम्सारी मरियमदेन थेला नाना मार्थाएनोन चिमुबा। ^{*} ^२चुनोन मरियमसे तिरेम येशूला स्थापरी अत्तर फोर्सी हाडलान क्रासे फ्यामुबा। आखम्बा लाजरस चा चुनोन नाना आडाला आले मुबा। ^{*} ^३मार्थादेन मरियमसे येशूदा “प्रभु, हाडसे माया लबा म्हि आखम्बा मुला” भिसी समाचार पुङ्जी।

^४चु समाचार थे:सी येशूसे “लाजरस आखम्बा मुला, तसैनोन थे आसि। तर चुहङ् तबा चा परमेश्वरला मानदेन जयजयकार तबाला लागिरी हिन्ना, ओच्छे चुग्यामसेन म्हिगदेसे परमेश्वरला भादाएनोन मानदेन जयजयकार लला” भिसी सुङ्जी। ^५येशूसे मार्था, मरियमदेन लाजरसदा ल्हानान माया लमुबा। ^६तसैनोन लाजरस आखम्बा मुला भिबा ताम थे:सी येशू अफ हाड धन्छ्याबा ग्लारीन न्हीरेधोना धन्छ्याजी।

^७जमाहेन्से येशूसे हाडला चेलागदेदा “लु, दाहेन्से यहाड दो:सीनोन यहूदिया अञ्चलरी निङ” भिसी सुङ्जी।

^८चेलागदेसे येशूदा “गुरु, ओने जे हाडदा थेरी यहूदीगदेसे युडबासे तोबारी म्हाइमुबा, तिग दो:सीनोन हाड थेरीन फेप्बारी म्हाइबा?” भिसी भिजी।

^९येशूसे थेनीगदेदा चुहङ् भिसी सुङ्जी, “तिग धिन गिकरी च्युक न्ही घण्टा आत? धिनीरी भ्रबा म्हिला काड आठोक। तिगदा भिसम थेसे जम्बुलिडरी धिनीग्याम यहाल याङ्ला। ^{१०}तर म्हुनङ् भ्रबा म्हिला काड ठोक्ला। तिगदा भिसम म्हुनङ् थेदेन छ्याम यहाल आत।”

^{११}जमाहेन्से येशूसे थेनीगदेदा “यहाडला ह्यो लाजरस म्हेर्बा मुला। तर डा थेदा छिङ्बारी थेरी नितो:ला” भिसी सुङ्जी।

^{१२}चेलागदेसे येशूदा “प्रभु, थे म्हेर्बा जे हिन्सम थे खम्ला” भिसी भिजी। ^{१३}येशूसे चा लाजरस सिसी जिन्जी भिसी सुङ्बा मुबा, तर थेनीगदेसे चा लाजरस म्हेर्बा जे चीम भिसी म्हन्बा मुबा।

^{१४}थेतबासेलमा येशूसे थेनीगदेदा सिधान सुङ्जी, “लाजरस सिसी जिन्बा मुला। ^{१५}तर एनीगदेसे विश्वास लगै भिसी डा थेरी तुरुन्तन आनिबा हिन्ना। थेतबासेलमा डा ताङ्बा मुला।

दाहेन्से भ्रउ, य्हाड थे मुबा ग्लारी निइ” भिसी सुइजी। १६जमाहेन्से येशूला चेला दिदुमस^१ भिबा थोमासे स्त्हान्दो चेलागदेदा “लु, य्हाडएनोन गुरुदेन छ्याम निइ, सितो:सै गुरुदेन छ्यामनोन सिला” भिसी भिजी।

सिबाग्याम सोना लबादेन जुनी पिन्बा येशू

१७येशू बेथानिया भिबा नाम्सारी धोखमा लाजरसदा धुर्सा न्हडरी थान्बा ब्लिरे तसी जिन्बा मुबा। १८बेथानिया नाम्सा यरूशलेम शहरग्याम कोस गिक ते थारेड मुबा। १९मार्थादेन मरियमला आले सिबासे लमा ल्हानान यहूदीगदे मार्थादेन मरियमदा सम्भब लबारी खबा मुबा। २०येशू फेप्खबान मुला भिबा ताम थे:सी मार्था येशूदा स्याप्बारी निजी। तर मरियम चा दिमरीन चिजी।

२१जमाहेन्से मार्थासे येशूदा स्याप्सी चुहङ् भिजी, “प्रभु, हाड मुबा हिन्सम डाला आले आसिसेला मुबा। २२तर दान्देनोन हाडसे परमेश्वरदेन छ्याम जुन स्हे हीसैनोन परमेश्वरसे हाडदा पिन्ना भिबा ताम डादा था मुला।”

२३येशूसे मार्थादा “एला आले दो:सी सोला” भिसी सुइजी।

२४मार्थासे येशूदा “चु जम्बुलिड नाश तबा धुइरी जम्मान म्हि सिबाग्याम सोमा थेएनोन सोला भिबा ताम डादा था मुला” भिसी भिजी।

२५येशूसे थेदा चुहङ् भिसी सुइजी, “सिबाग्याम सोना लबादेन जुनी पिन्बा डानोन हिन्ना। डादा विश्वास लबा म्हि सिसैनोन सोला। २६ओच्छे डादेन छ्याम भ्रबादेन डादा विश्वास लबा म्हि खाइमै आसि। तिग एसे चु ताम विश्वास लखम्ला?” भिसी सुइजी।

२७मार्थासे येशूदा “हिन्ना प्रभु, डाइ हाडदा विश्वास लला, हाड परमेश्वरला भा जम्बुलिडरी फेप्खबा थार्बा पिन्बा ख्रीष्ट हिन्ना” भिसी भिजी।

२८चुहङ् भिसी मार्था निजी, ओच्छे हाडला आडा मरियमदा सुटुक्क ड्योइसी, “गुरु धोखजी, एदा गुरुसे ड्योइबान मुला” भिसी भिजी। २९चु ताम थे:मैछ्याम मरियम तुरुन्तन येशू मुबा ग्लारी निजी। ३०थे धुइधोना येशू नाम्सारी धोखबा आरेमुबा। तर येशू मार्थासे स्याप्बा ग्लारीन मुबा। ३१थेन्ना दिमरी थेन्दा सम्भब लबारी खबा यहूदीगदेसे मरियम योना योना लसी निबा म्राइजी। थे आलेला धुर्सारी क्राबारी निबा हिन्ना भिसी म्हन्सी थेनीगदे मरियमला लिच्छा लिच्छा निजी।

३२मरियम येशू मुबा ग्लारी धोमाहेन्से येशूदा फ्या लबान, “प्रभु, हाड चुरी मुबा हिन्सम डाला आले आसिसेला मुबा” भिसी भिजी। ३३मरियम ओच्छे थेदेन छ्याम खबा जम्मान यहूदीगदे

क्राबा म्राङ्सी येशूदा ल्हानान दुख इहम्जी।

^{३४} जमाहेन्से येशूसे थेनीगदेदा “एनीगदेसे थेदा खानड थान्बा मुला?” भिसी इयोइमा, थेनीगदेसे येशूदा “प्रभु, फेप्खसी स्हीगो” भिसी भिजी।

^{३५} थे धुइरी येशूएनोन क्राजी।
^{३६} थेतबासेलमा यहूदीगदेसे “च्यागो, येशूसे थेदा गाते माया लमुबा” भिसी भिजी।

^{३७} तर कोइ कोइ म्हिसे चा “तिग काना म्हिला मी खम्ना लबा चु म्हिसे थेदा खम्ना लबारी आखम्नी?” भिसी भिजी।

येशूसे लाजरसदा सिबाग्याम सोना लबा

^{३८} जमाहेन्से येशू दोःसीनोन ल्हानान दुख इहम्सी धुर्सारी फेप्जी। थे धुर्सा चा ऊ हड्बा मुबा। थे धुर्साला म्पारी युडबा थान्मुबा। ^{३९} येशूसे थेनीगदेदा “धुर्साला म्पारी थान्बा युडबा तेःगो” भिसी सुङ्मा, सिबा म्हिला नाना मार्थासे येशूदा “प्रभु दान्देधोना मी थे थाड खसी जिन्तला। तिगदा भिसम थे सिबा ब्लिरे तसी जिन्जी” भिसी भिजी।

^{४०} येशूसे थेदा “एसे विश्वास लजी भिसम परमेश्वरला घेन य्हालदेन शक्ति म्राङ्ला भिसी डाइ एदा पाङ्बा आहिन?” भिसी सुङ्जी।

^{४१} थेनीगदेसे युडबा लेःमाहेन्से स्वर्गपट्टि स्हीसी येशूसे चुहङ् भिसी

सुङ्जी, “आबा, हाडदा धन्यवाद मुला। तिगदा भिसम हाडसे डाला बिन्ती इयान्जी। ^{४२} हाडसे डाला ताम सदन इयान्मुला भिबा ताम डादा था मुला। तसेनोन डादा हाडसे चु जम्बुलिङरी पुइखबा हिन्ना भिबा ताम चुरी मुबा म्हिगदेसे विश्वास लबारी खम्नौ भिसीन डाइ हाडदा चु ताम पाङ्बा हिन्ना।”

^{४३} चुहङ् सुङ्सी जिन्माहेन्से येशूसे घेन काइरी “लाजरस, ए मङ्ग्यार खउ” भिसी क्रिङ्जी। ^{४४} जमाहेन्से सिबा लाजरस रेःसी मङ्ग्यार खजी। अभन थेला थोबोहेन्से काडधोना खीबा मुबा। येशूसे थेरी मुबा म्हिगदेदा “थेदा खीबा क्वान ब्लसी थेदा निपुङ्गो” भिसी सुङ्जी।

येशूदा साइबारी म्हाइबा

मत्ती २६:१-५; मार्कस १४:१-२;

लूका २२:१-२

^{४५} येशूसे लबा चुहङ्बा उदेकला गे म्राङ्सी मरियमदा हुप तबारी खबा ल्हानान यहूदीगदेसे येशूदा विश्वास लजी। ^{४६} तर थेनीगदे न्हडला कोइ कोइ चा फरिसीगदे मुबा ग्लारी निसी येशूसे लबा गेला बारेरी पाङ्जी।

^{४७} जमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे जम्मान भन्दा घेन यहूदी सभाला म्हिगदेदा इयोइसी चुहङ् भिसी भिजी, “चु म्हिसे ल्हानान उदेकला गेगदे लमुला। दाहेन्से य्हाडसे तिग लइ?

४८ चु म्हिदा तिगै आलना ओहङ्गनोन
खलाजी भिसम जम्मान म्हिगदेसे
चुदा विश्वास लला। ओच्छे रोमी
सिपाहीगदे खसी य्हाङला परमेश्वरला
मन्दिरदेन य्हाङला य्हुल नाश लला।”

४९ कैयाफा भिबा म्हि परमेश्वरला
मन्दिररी पूजा लबा थे दिङला मुल
म्हि मुबा। थेसे थेनीगदेदा चुहङ्ग भिसी
भिजी, “एनीगदेदा तिगै ताम था आरे।
५० जम्मान य्हुल्सा नाश तबा भन्दा
बरु जम्मान म्हिेला लागिरी म्हि गिक
सिबान एनीगदेला लागिरी ज्यबा तला
भिसी एनीगदेसे घोबा आरे।”

५१ चु ताम थेसे ह्हाङला सेमग्याम
पाङ्बा आहिन मुबा। तर थे
परमेश्वरला मन्दिररी पूजा लबा थे
दिङला मुल म्हि तबासे लमा यहूदी
य्हुलला लागिरी येशू सिनोन तोःला
भिसी परमेश्वरला ताम पाङ्बा मुबा।
५२ ओच्छे थेसे चु ताम यहूदी य्हुलला
लागिरी जे पाङ्बा आहिन मुबा। तर
ससा बडबड तसी चिबा परमेश्वरला
जम्मान म्हिगदेदा एनोन गिक स्होबाला
लागिरी थेसे चु ताम पाङ्बा मुबा।
५३ थेतबासेलमा थे धिनहेन्से यहूदी
नेतागदेसे येशूदा साइबारी सल्लाह
लजी।

५४ जमाहेन्से यहूदीगदेला डाच्छा
येशू दोःसी डाच्छाला हङ्ग लसी
आभ्रनी। तर थे ग्लाग्याम तोडतोडबा
गलाला डामरी मुबा एफ्राइम भिबा
शहररी फेप्सी थेरीन चेलागदेदेन
छ्याम धन्छ्याजी।

५५ यहूदीगदे मिश्र य्हुल्साग्याम फेसी
खबा धिनदा ढन्सी धङ्बा चाड
खबारी छ्याइमुबा। थेतबासेलमा
चाड खबा भन्दा डाच्छान ह्हाङ
ह्हाङदा चोखो स्होबाला लागिरी
नाम्सा नाम्साग्याम ल्हानान म्हिगदे
यरुशलेम शहररी निजी। ५६ थेनीगदेसे
येशूदा जम्मान ग्लारी म्हाइजी, ओच्छे
थेनीगदे जम्मान परमेश्वरला मन्दिररी
हुप तबा धुइरी “एनीगदेदा खाहङ्बा
छोर्बा मुला, तिग थे चु चाडरी खला?”
भिसी ह्हाङ ह्हाङ न्हडरी ताम लजी।
५७ परमेश्वरला मन्दिररी पूजा लबा
मुल म्हिगदेदेन फरिसीगदेसे चा येशूदा
चुङ्बाला लागिरी थे जुन ग्लारी मुसै
था याङ्बा म्हिसे “डन्दा पाङ्गो”
भिसी कुल्बा मुबा।

येशूदा अत्तर फोर्बा

मत्ती २६:६-१३; मर्कुस १४:३-६

१२ मिश्र य्हुल्साग्याम फेबा
धिनदा ढन्सी धङ्बा
चाड खबा भन्दा ढुरे डाच्छा येशू
लाजरसदा सिबाग्याम सोना लबा
बेथानिया भिबा नाम्सारी धोखजी।
२ येशूला लागिरी थेनीगदेसे जमाकुनु
ड्यसे थेरीन सोल स्होजी। मार्थासे चा
जम्मादान क्योङ्बान मुबा। येशूदेन
छ्यामनोन चिबागदे न्हडरी गिक
चा लाजरस मुबा। ३ थेनोन धुइरी
मरियमसे जटामसी भिबा दोङला
टाग्याम स्होबा महङ्गो खाल्ला ज्यबा
बास्ना खबा अत्तर लिटर गडसल ते

भसी येशूला स्थहापरी फोर्सी हाडलान
क्रासे येशूला स्थहाप फ्याजी। ओच्छे
दिम नाडनोन थे अत्तरला बास्ना
खजी।* ४तर येशूदा चुड्सी पिन्बारी
म्हाइबा चेला यहूदा इस्करियोतसे
चुहङ् भिसी भिजी, ५“चु अत्तर
मी ग्यार्जा सोम म्हुइला डबलरी†
चूड्सी थे टाडगा प्राडबोगदेदा पिन्सै
तसेला।” ६तर थेसे प्राडबोगदेदा
वास्ता लसी चु ताम पाड्बा आहिन
मुबा। तिग्दा भिसम थे यहो मुबा,
ओच्छे टाडगाएनोन थेदेन छ्यामनोन
थान्सी थेसेन यहो लमुबा।

७येशूसे चुहङ् भिसी सुड्जी, “थेदा
तिगै थापाङ्गो, डादा लहुबा धिनना
लागिरी चुसे चुहङ् लबा हिन्ना।
८तिग्दा भिसम प्राडबो म्हिगदे मी
एनीगदेदेन छ्याम सदन तला, तर डा
चा एनीगदेदेन छ्याम सदन आत।”*

लाजरसदा साइबारी सल्लाह लबा

९येशू बेथानिया भिबा नाम्सारी
मुला भिबा था याड्सी ल्हानान
यहूदीगदे थेरी खजी, थेनीगदे येशूदा
च्याबारी जे खबा आहिन मुबा।
तर येशूसे सिबाग्याम सोना लबा
लाजरसदाएनोन च्याबारी खबा
मुबा। १०थेतबासेलमा परमेश्वरला

मन्दिररी पूजा लबा मुल म्हिगदेसे
लाजरसदाएनोन साइबारी सल्लाह
लजी। ११तिग्दा भिसम लाजरसदा
सिबाग्याम सोना लबासे लमा ल्हानान
यहूदीगदेसे थेनीगदेदा ख्लासी येशूदा
विश्वास लबान मुबा।

येशू यरूशलेमरी फेप्बा

मत्ती २१:१-११; मर्कुस ११:१-११;

लूका १९:२८-४०

१२न्हडगरदडसे मिश्र यहुल्साग्याम
फेबा धिनदा ढन्सी धड्बा चाडरी खबा
ल्हानान म्हिगदेसे येशू यरूशलेमरी
फेप्खबान मुला भिबा ताम थे:जी।
१३जमाहेन्से खजूरला हाँगागदे क्युड्सी
थोबान म्हिगदेसे

“थेला जयजयकार तगै,
परमप्रभुला मिनरी फेप्खबासे
परमेश्वरग्याम मोलम याड्गै
इस्माएलला ग्लेदा† परमेश्वरसे
मोलम पिन्सै”

भिसी क्रिड्बान येशूदा मान लबारी
खजी।*

१४येशूसे गधाला कोला गिक
स्याप्जी ओच्छे थेनोन गधाला
कोलाथोरी क्रे:सी फेप्खजी।
परमेश्वरला बचनरीनोन चुहङ् लसी
भ्रिबा मुला,*

१२:५ “ग्यार्जा सोम म्हुइला डबल” चा तिदिडला ज्याला मुबा।

१२:१३ “इस्माएलला ग्ले” भिबा चा थार्बा पिन्बा ख्रीष्ट भिबा हिन्ना।

१२:३ लूका ७:३७-३८ १२:८ व्यव १५:११ १२:१३ भजन ११८:२५-२६

१२:१४ मत्ती २१:१-११; मर्कुस ११:१-११; लूका १९:२८-४०

१५ “सियोनना[†] म्हिगदे, एनीगदे
थालोङ्गो।
च्यागो, एनीगदेला ग्ले गधाला
कोलाथोरी क्रेःसी फेप्खबान
मुला।”*

१६ डाच्छा मी चु ताम येशूला
चेलागदेसेनोन आघोनी। तर येशू
सिबाग्याम सोसी स्वर्गरी घेन य्हालदेन
शक्तिरी फेप्माहेन्से जे थेनीगदेसे येशूला
बारेरी भिबा जम्मान ताम घोजी।

१७ येशूसे धुर्सारी थान्बा लाजरसदा
ड्योइसी सिबाग्याम सोना लबा धुइरी
येशूदेन छ्यामनोन मुबा म्हिगदेसे
येशूसे लबा गेला बारेरी पाङ्सी भ्रजी।
१८ येशूसे चुहङ्बा उदेकला गे लबा
मुबा भिबा ताम थेःबासे लमाएनोन
म्हिगदे येशूदा हुप तबारी निबा मुबा।
१९ थेतबासेलमा फरिसीगदे हाड हाड
न्हडरी “खाइ, यहाडसे तिग लखम्जी।
च्यागो, जम्बुलिङला जम्मान म्हिगदे
थेदेन छ्याम भ्रबारी छ्याइजी” भिसी
भिजी।

ग्रीक य्हलला म्हिगदेसे येशूदा म्हाइबा

२० कोइ कोइ ग्रीस य्हलसाला
म्हिगदे[†] मिश्र य्हलसाग्याम फेबा
धिनदा ढन्सी धङ्बा चाडरी पूजा
लबाला लागिरी यरूशलेम शहररी

खबा मुबा। २१ थेनीगदे गालील
अञ्चलला बेथसेदा भिबा नाम्सारी
चिबा फिलिप मुबा ग्लारी निसी, “डनी
येशूदेन छ्याम हुप तबा सेम मुला”
भिसी बिन्ती लजी। २२ जमाहेन्से
फिलिप निसी अन्द्रियासदा चु ताम
पाङ्जी, ओच्छे थेनीनोन निसी येशूदा
पाङ्जी।

२३ येशूसे थेनीगदेदा चुहङ् भिसी
सुङ्जी, “दाहेन्से परमेश्वरसे पुइखबा
म्हिदा मान लबा धुइ खसी जिन्बा
मुला। २४ च्यागो, एनीगदेसे डाला ताम
ड्यान्गो, बु वारीरी ढ्वबा ग्वाला ब्लु
आसिनी भिसम थे गिक जेन तला। तर
थे सिजी भिसम फुइसी थेरी ल्हानान
ग्वा रोला। २५ थेतबासेलमा जुन म्हिसे
हाडला ज्यान जोगब लबा सेम लला थे
म्हिसे जुकजुकधोनाला जुनी आयाङ्।
तर जुन म्हिसे जम्बुलिङरी मुमा हाडला
ज्यानना वास्ता आलना डादेन छ्याम
भ्रला, थेसे जुकजुकधोनाला जुनी
सदन जोगब लसी थान्ना।* २६ खालै
म्हिसे डाला लागिरी गे लबा सेम लजी
भिसम थे डादेन छ्याम भ्रतोःला।
ओच्छे डा जुन ग्लारी चिला, डाला गे
लबा म्हिएनोन डादेन छ्यामनोन तला।
खालै म्हिसे डाला लागिरी गे लजी
भिसम डाला आबासे थेला मान बढब
लसी पिन्ना।

१२:१५ “सियोन” भिबा चा यरूशलेम शहरदा पाङ्बा हिन्ना।

१२:२० चु म्हिगदे चा यहूदीगदेसे हङ्नोन परमेश्वरदा तेन्बा म्हि मुबा।

१२:१५ जक ६:६ १२:२५ मती १०:३६; १६:२५; मर्कु ८:३५; लूका ६:२४; १७:३३

येशूसे हाड सिबाला बारेरी सुड्बा

२७ येशूसे चुहङ् भिसी सुङ्जी, “दान्दे डादा सेमरी ल्हानान दुख तबा मुला, डाइ तिग पाङ्से? ‘आबा डादा चु दुखग्याम जोगब लउ’ भिसी पाङ्बारी तला? आत, तिग्दा भिसम डा चु दुख नाबाला लागिरीन खबा हिन्ना। २८ आबा, हाड जम्मान भन्दा घेन परमेश्वर हिन्ना भिबा ताम उन्नो।”

जमाहेन्से स्वर्गग्याम “डाइ डा जम्मान भन्दा घेन परमेश्वर हिन्ना भिबा ताम उन्सी जिन्बा मुला, चु ताम डाइ अफ उन्ना” भिबा काइ खजी।

२९ चु ताम थे:सी थेरी मुबा म्हिगदेसे “चु मु गुर्बा हिन्ना” भिसी भिजी। तर स्थहान्दोगदेसे चा “स्वर्गदूत थेदेन छ्याम ताम लबा हिन्ना” भिसी भिजी।

३० येशूसे थेनीगदेदा चुहङ् भिसी सुङ्जी, “स्वर्गग्याम खबा चु काइ डाला लागिरी आहिन, तर एनीगदेला लागिरी हिन्ना। ३१ दाहेन्से चु धुइ चा जम्बुलिङरी मुबा म्हिगदेला निसाफ लबा धुइ हिन्ना, ओच्छे चु जम्बुलिङदा तहरी थान्बादा^१ मङ्ग्यार भ्याङ्गला। ३२ ओच्छे डादा जम्बुलिङग्याम तोर थीमाहेन्से जम्मान म्हिदा डाइ डा मुबा ग्लारी भला।” ३३ येशूसे हाड खाहङ्

लसी सिबान मुला भिबा ताम म्हिगदेसे घोगै भिसी चुहङ् सुङ्बा मुबा।

३४ जमाहेन्से म्हिगदेसे येशूदा “थाबा पिन्बा खीष्ट सदन सोला भिबा ताम डन्से ठिमग्याम थे:बा मुला। हाडसे चा तिग्दा ‘परमेश्वरसे पुइखबा म्हिदा तोर थीनोन तो:ला’^१ भिसी सुङ्बा? परमेश्वरसे पुइखबा चु म्हि चा खाल हिन्ना?” भिसी ड्योड्जी।*

३५ येशूसे थेनीगदेदा चुहङ् भिसी सुङ्जी, “अफ छिन्नड य्हाल एनीगदेदेन छ्याम तला। थेतबासेलमा य्हाल एनीगदेदेन छ्याम मुबा धुइरीन हाड भ्रतो:बा ग्यामरी भ्रउ। आहिन्सम एनीगदेदा धोपधोपसे घण्ला, धोपधोपरी भ्रबा म्हिदा हाड खानड निबान मुला भिबा तामनोन था आत। ३६ य्हाल एनीगदेदेन छ्याम मुबा धुइरी एनीगदेसे थेदा विश्वास लउ। थेहङ् लजी भिसम एनीगदे य्हालला सन्तान दोला।” चु ताम सुङ्सी जिन्माहेन्से येशू थे ग्याम फेप्सी थेनीगदेसे आम्राङ्बा ग्लारी धन्छ्याजी।

यहूदीगदेसे येशूदा विश्वास आलबा

३७ येशूसे यहूदीगदेलेन ओन्छाङरी ल्हानान उदेकला गेगदे लबा मुबा। तसैनोन थेनीगदेसे येशूदा विश्वास

१२:३१ “जम्बुलिङदा तहरी थान्बा” चा शैतान हिन्ना। यूह १४:३०, १६:११ स्तीगो।

१२:३४ येशूसे ‘परमेश्वरसे पुइखबा म्हिदा तोर थीनोन तो:ला’ भिबा चा हाडदा कुसरी टाँगब लसी साइला भिसी सुङ्बा हिन्ना।

१२:३४ भजन ११०:४; यशै ६:७; इज ३७:२५; दानि ७:१४

आलनी। ३८ यशैया अगमवक्तासे पाङ्बा ताम पूरा तबारीन चुहङ् तबा हिन्ना। यशैया अगमवक्तासे

“परमप्रभु, डन्से पाङ्बा ताम खाल्से विश्वास लजी? ओच्छे हाडसे लबा शक्तिशाली गे खाल्से म्राङ्जी?”

भिसी पाङ्बा मुबा।*

३९ थेनीगदेसे विश्वास लआखम्नी, तिग्दा भिसम यशैया अगमवक्तासे दोःसी चुहङ् भिसी पाङ्बा मुला,

४० “प्रभुसे थेनीगदेला मी बन्द लसी पिन्बा मुला

ओच्छे थेनीगदेला सेम कोङ्ना लबा मुला।

आहिन्सम थेनीगदेसे म्राङ्सेला मुबा,

सेमहेन्सेन घोसेला मुबा,

डापट्टि दोःसेला मुबा,

ओच्छे थेनीगदेदा डाइ खम्ना लसेला मुबा।”*

४१ यशैया अगमवक्तासे येशूला घेन शक्ति म्राङ्सी येशूला बारेरीन चु ताम पाङ्बा मुबा।

४२ तसैनोन ल्हानान यहूदी नेतागदेसे येशूदा विश्वास लजी। तर फरिसीगदेसे यहूदीगदे हुप तबा दिमरी वाङ्बारी आपिन भिसी लोङ्सी थेनीगदेसे चु ताम खालैदान आपाङ्नी। ४३ तिग्दा भिसम थेनीगदेसे परमेश्वरसे भन्दा म्हिगदेसे ज्यबा भिगै भिसी म्हन्मुबा।

येशू जम्बुलिङ्दा सोना लबारी फेप्खबा

४४ येशूसे घेन काइरी चुहङ् भिसी सुङ्जी, “डादा विश्वास लबा म्हिगदेसे डादा जे आहिन, तर डादा पुइखबादाएनोन विश्वास लला।

४५ ओच्छे डादा म्राङ्बा म्हिसे डादा पुइखबादाएनोन म्राङ्गला। ४६ डादा विश्वास लबा म्हिगदे धोपधोपरी भ्रआतोःगै भिसीन डा जम्बुलिङरी य्हाल दोसी खबा मुला।

४७ “डाला ताम थेःसीनोन डाइ पाङ्बा अन्छार आभ्रबा म्हिगदेला निसाफ आल। तिग्दा भिसम डा जम्बुलिङला म्हिगदेला निसाफ लबारी खबा आहिन। तर जम्बुलिङला म्हिगदेदा थार्ना लबारी खबा हिन्ना।

४८ तर डादेन डाला तामदा विश्वास आलबा म्हिगदेला निसाफ लबारी न्यायाधीश गिक मुला। थे न्यायाधीश चा डाइ पाङ्बा तामनोन हिन्ना।

थेसेन चु जम्बुलिङ नाश तबा धुइरी थेनीगदेला निसाफ लला। ४९ तिग्दा भिसम चु ताम डाइ डाला सेमग्याम पाङ्बा आहिन, तर डादा पुइखबा

आबासे कुल्बा अन्छारनोन डाइ पाङ्बा हिन्ना। ५० डादा पुइखबा आबासे कुल्बा ताम ड्यान्बा म्हिदा जुकजुकधोनाला जुनी पिन्ना भिबा ताम डादा था मुला। थेतबासेलमा

आबासे जुन ताम पाङ्पुङ्ला थे ताम जे डाइ पाङ्बा मुला।”

येशूसे हाडला चेलागदेला काड खुबा

१३

मिश्र यहूल्साग्याम फेसी खबा धिनदा ढन्सी धङ्बा चाड खबा भन्दा डाच्छान चु जम्बुलिङ रूलासी आबा मुबा ग्लारी निबा धुइ तसी जिन्जी भिबा ताम येशूसे था याङ्सी जिन्बा मुबा। येशूसे जम्बुलिङरी मुबा हाडला चेलागदेदा ल्हानान माया लमुबा, ओच्छे थेनीगदेदा लिच्छाधोनान माया लजी।

२ येशू हाडला चेलागदेदेन छ्याम ड्यसेला सोल छ्योइबान मुबा। थेनोन धुइरी येशूदा चुङ्सी पिन्बा सेम शैतानसे सिमोनना भा यहूदा इस्करियोतदा खना लसी जिन्बा मुबा। ३ परमेश्वरसे जम्मान अधिकार हाडदा पिन्बा मुला भिबा ताम येशूदा था मुबा। ओच्छे परमेश्वरग्यामनोन खसी दोःसी परमेश्वर मुबा ग्लारी निबान मुला भिबा तामएनोन येशूदा था मुबा ४ सोल छ्योइमाहेन्से येशू स्हेङ्जी, ओच्छे हाडसे नान्बा घ क्यार थान्सी क्रेप्सरी गम्सा खीजी। ५ जमाहेन्से येशूसे ताड गिकरी क्युइ युजी, ओच्छे हाडला चेलागदेला काड खुसी हाडसे खीबा गम्सासे थेनीगदेला काड फ्याजी।

६ येशूसे सिमोन पत्रुसला काड खुबारी छ्याइमा सिमोन पत्रुससे

“प्रभु तिग हाडसे डाला काड खुबारी छ्याइबा?” भिसी भिजी।

७ येशूसे थेदा “डाइ तिग लबान मुला, थे ताम एसे दान्दे आघो। तर चु ताम एसे लिच्छा घोला” भिसी सुङ्जी।

८ पत्रुससे येशूदा “हाडसे डाला काड खाइमै खुबारी आत” भिसी भिमा, येशूसे थेदा “डाइ एला काड आखुनी भिसम ए डाला म्हि आदो” भिसी सुङ्जी।

९ जमाहेन्से सिमोन पत्रुससे येशूदा “थेहङ् भिसम प्रभु, डाला काड जे आहिन, तर डाला यादेन थोबोएनोन खुसी पिन्गो” भिसी भिजी।

१० जमाहेन्से येशूसे थेदा “नुहाब लसी जिन्बा म्हिसे काड जे खुतोःला। एनीगदे न्हङरी म्हि गिक बाहेक स्थान्दो जम्मान चोखो तसी जिन्बा मुला” भिसी सुङ्जी। ११ तिगदा भिसम हाडदा खाल्से चुङ्सी पिन्बारी छ्याइबा मुला भिबा ताम येशूदा था मुबा। थेतबासेलमान येशूसे “एनीगदे न्हङला गिक चा चोखो तबा आरे” भिसी सुङ्बा मुबा।

१२ थेनीगदेला काड खुसी जिन्माहेन्से हाडला घ नान्सी येशू दोःसी धन्छ्याजी। जमाहेन्से येशूसे थेनीगदेदा चुहङ् भिसी सुङ्जी, “डाइ तिगदा एनीगदेला काड खुजी भिबा ताम एनीगदेसे घोजी?” १३ एनीगदेसे डादा ‘गुरुदेन प्रभु’ भिसी पाङ्बा ताम सत्य

हिन्ना, तिग्दा भिसम डा एनीगदेला गुरुदेन प्रभुन हिन्ना। १४ चुदे डा प्रभुदेन गुरु तसीनोन डाइ एनीगदेला काड खुजी भिसम एनीगदेसेनोन गिकसेम गिकला काड खुतोःला। १५ डाइ लबा हङ्गनोन एनीगदेसेनोन लगै भिसीन डाइ चुहङ्ग लसी उन्बा हिन्ना। एनीगदेसेनोन चुहङ्गनोन लउ। १६ थेतबासेलमा च्यागो, एनीगदेसे डाला ताम ड्यान्गो, मालिक भन्दा नोकर घेन आत ओच्छे समाचार पुइबा म्हि भन्दा समाचार भोर्बा म्हि एनोन खाइमै घेन आत।* १७ चुदे एनीगदेसे चु ताम घोसी चुनोन अन्छार लजी भिसम एनीगदेसे परमेश्वरग्याम मोलम याङ्ला।

येशूसे हाडदा धोका पिन्बा चेलाला बारेरी सुङ्बा

मत्ती २६:२०-२५; मर्कूस १४:१७-२१;

लूका २२:२१-२३

१८ “चु ताम डाइ एनीगदे जम्मालान बारेरी पाङ्बा आहिन, डाइ धम्बागदेदा डाइ ज्यना लसी डोसेमुला। तर ‘डादेन छ्यामनोन गेड चबा म्हिसे डादा धोका पिन्ना’ भिसी परमेश्वरला बचनरी पाङ्बा ताम पूरा तबाला लागिरीन चुहङ्ग तबा हिन्ना।* १९ चु ताम तमाहेन्सेनोन एनीगदेसे डादा “डा थेनोन हिन्ना” भिसी विश्वास लबारी खम्मौ भिसीन डाइ चु ताम

एनीगदेदा डाच्छान पाङ्बा हिन्ना। २० थेतबासेलमा च्यागो, एनीगदेसे डाला ताम ड्यान्गो, डाइ पुइबा म्हिगदेदा मान लबा म्हिसे डादा एनोन मान लला, ओच्छे डादा मान लबा म्हिसे डादा पुइखबादा एनोन मान लला।”*

२१ चु ताम सुङ्सी जिन्माहेन्से ल्हानान दुख इहम्सी येशूसे चेलागदेदा “च्यागो, एनीगदेसे डाला ताम ड्यान्गो, एनीगदे न्हडलान गिकसे डादा म्हिगदेला यारी जिम्मा पिन्ना” भिसी सुङ्जी।

२२ येशूसे चु ताम खाल्ला बारेरी सुङ्बा हिन्ना भिबा आघोबासे लमा चेलागदेसे हाड हाड न्हडरी गिकसेम गिकला लीरी च्याबारी छ्याइजी। २३ येशूसे ल्हानान माया लबा चेला चा येशूला डामरीन चिबा मुबा। २४ जमाहेन्से सिमोन पत्रुससे थेदा “येशूसे चु ताम खाल्ला बारेरी सुङ्बा हिन्ना? ड्योइगो” भिसी मीला चाल लजी।

२५ थे येशूला डामरी चिबान येशूदा “प्रभु, थे म्हि खाल हिन्ना?” भिसी ड्योइजी।

२६ येशूसे थेदा “डाइ जुन म्हिदा गेड तुइसी पिन्ना, थे म्हि थेनोन हिन्ना” भिसी सुङ्जी। ओच्छे येशूसे टोगल गिक गेड तुइसी सिमोन इस्करियोतला

१३:१६ मत्ती १०:२४; लूका ६:४०; यूह १५:२० १३:१८ भजन ४१:६

१३:२० मत्ती १०:४०; मर्कू ६:३७; लूका ६:४८; १०:१६

भा यहूदा इस्करियोतदा पिन्जी। ^{२७}थे गेड किन्माहेन्से यहूदा इस्करियोत न्हडरी शैतान वाङ्जी। जमाहेन्से येशूसे थेदा “एसे तिग लबारी छ्याइबा मुला, थे योनान लउ” भिसी सुङ्जी। ^{२८}तर येशूसे थेदा तिगदा थेहङ् भिसी सुङ्बा हिन्ना भिसी थेरी चबारी चिबागदे खालैसेन आघोनी। ^{२९}थेनीगदेला टाङ्गा यहूदा इस्करियोतसे थान्बासे लमा कोइ कोइसे चा येशूसे थेदा चाडला लागिरी तोःबा स्हेगदे ग्लुउ भिसी सुङ्जीनम भिसी म्हन्जी। ओच्छे कोइ कोइसे चा येशूसे थेदा प्राडबोगदेदा तिगै पिन्गो भिसी सुङ्जीनम भिसी म्हन्जी। ^{३०}येशूसे पिन्बा गेड चमाहेन्से यहूदा इस्करियोत तुरुन्तन मङ्ग्यार निजी। थे धुइरी धोप तसी जिन्बा मुबा।

येशूसे कुल्बा छार ताम

^{३१}यहूदा इस्करियोत मङ्ग्यार निमाहेन्से येशूसे चुहङ् भिसी सुङ्जी, “दाहेन्से परमेश्वरसे पुइखबा म्हिसे घेन मान याङ्बा मुला, ओच्छे थेग्याम परमेश्वरसेनोन घेन मान याङ्बा मुला। ^{३२}चुदे परमेश्वरसे पुइखबा म्हिग्याम परमेश्वरसे घेन मान याङ्जी भिसम परमेश्वरसेनोन हाडसे पुइखबादा घेन मान पिन्ना। ओच्छे परमेश्वरसे चु गे योनान लला।

^{३३}“कोलागदे, डा एनीगदेदेन छ्याम छिन्नड जे तला। एनीगदेसे डादा म्हाइला, तर दाहेन्से डाइ यहूदीगदेदा पाङ्बा ताम एनीगदेदाएनोन पाङ्ला, ‘डा जुन ग्लारी निबान मुला, थेरी एनीगदे खबारी आखम।’^{*}

^{३४}“दाहेन्से डाइ एनीगदेदा छार ताम गिक कुल्ला, एनीगदेसे गिकसेम गिकदा माया लउ। डाइ एनीगदेदा माया लबा हङ् लसी एनीगदेसेनोन गिकसेम गिकदा माया लउ।^{*} ^{३५}चुदे एनीगदेसे गिकसेम गिकदा माया लजी भिसम एनीगदे डाला चेला हिन्बा चीम भिसी जम्मासेन डोसेला।”

पत्रुससे येशूदा डोसेबा आरे भिसी पाङ्ला भिसी येशूसे सुङ्बा

मती २६:३१-३५; मर्कस १४:२७-३१;

लूका २२:३१-३४

^{३६}सिमोन पत्रुससे येशूदा “प्रभु, हाड खानड फेप्बारी छ्याइबा?” भिसी ड्योइमा, येशूसे थेदा “डा निबा ग्लारी ए दान्दे डादेन छ्याम भ्रबारी आखम, तर लिच्छा चा भ्रला” भिसी सुङ्जी।

^{३७}पत्रुससे येशूदा “प्रभु, तिगदा डा दान्देन हाडदेन छ्याम भ्रबारी आखम? हाडला लागिरी डा सिबारीनोन तयार मुला” भिसी भिजी।

^{३८}जमाहेन्से येशूसे थेदा “तिग एसे डाला लागिरी हाडला ज्याननोन पिन्खम्ला? च्यागो, एसे डाला ताम

इयान्गो, नागा क्राबा भन्दा डाच्छान एसे डादा डोसेबान आरे भिसी सोमेरेमधोना पाङ्ला” भिसी सुङ्जी।

येशूसे चेलागदेदा सम्भव लबा

१४ येशूसे हाडला चेलागदेदा चुहङ् भिसी सुङ्जी, “एनीगदेसे दुख थाम्हन्गो। एनीगदेसे परमेश्वरदा विश्वास लबा मुला, ओच्छे डादाएनोन विश्वास लउ। ^२डाला आबाला दिमरी चिबा ग्ला ल्हानान मुला, ओच्छे डा एनीगदेला लागिरी ग्ला स्होबारी निबान मुला। चुदे ग्ला आरेबा हिन्सम डाइ एनीगदेदा चु ताम पाङ्गोन आपाङ्गसेला मुबा। ^३एनीगदेला लागिरी ग्ला स्होसी जिन्माहेन्से डा दोःसी खला, ओच्छे एनीगदे डादेन छ्यामनोन चिबाला लागिरी एनीगदेदाएनोन डा मुबा ग्लारीन भोर्ला। ^४डा निबारी छ्याइबा ग्याम एनीगदेदा थानोन मुला।”

येशू सत्य, ग्याम ओच्छे जुनी हिन्ना

^५थोमासे येशूदा “प्रभु, हाड खानड फेप्बान मुला भिबा ताम मी डन्दा था आरे भिसम हाड फेप्बा ग्याम मी भन डन्से खाहङ् लसी था याङ्से?” भिसी भिजी।

^६येशूसे चुहङ् भिसी सुङ्जी, “परमेश्वर मुबा ग्लारी भोर्बा ग्याम, सत्य ओच्छे जुनी डानोन हिन्ना। डाग्याम बाहेक खालैनोन परमेश्वर आबा मुबा ग्लारी निबारी आखम।

^७एनीगदेसे डादा डोसेबा हिन्सम डाला आबादाएनोन डोसेसेला मुबा। तर दाहेन्से एनीगदेसे डाला आबादा डोसेला, ओच्छे एनीगदेसे थेदा म्राङ्सी जिन्बा मुला।

^८फिलिपसे येशूदा “प्रभु, डन्दा परमेश्वर आबा उन्सी पिन्गो, चुदे लजी भिसम तला” भिसी भिजी।

^९येशूसे थेदा चुहङ् भिसी सुङ्जी, “फिलिप, चुदे धिनधोना डा एनीगदेदेन छ्याम चिजी, तसैनोन एसे डादा डोसेबा आरे? डादा म्राङ्बा म्हिसे परमेश्वर आबादाएनोन म्राङ्सी जिन्बा मुला। तर डादा म्राङ्सीनोन तिगदा एसे डन्दा परमेश्वर आबादा उन्सी पिन्गो भिसी भिबा? ^{१०}डा आबादेन छ्याम गिक तबा मुला ओच्छे आबा डादेन छ्याम गिक तबा मुला भिबा ताम एदा विश्वास आरे? जुन ताम डाइ एनीगदेदा पाङ्बा मुला थे ताम डाइ डाला सेमग्याम पाङ्बा आहिन। तर डादेन छ्याम गिक तबा आबासे हाडला गे डाग्याम लबान मुला। ^{११}डा आबादेन छ्याम गिक तबा मुला ओच्छे आबा डादेन छ्याम गिक तबा मुला भिबा ताम विश्वास लउ। आहिन्सम डाइ लबा गेगदे च्यासीन विश्वास लउ।

^{१२}“च्यागो, एनीगदेसे डाला ताम इयान्गो, डादा विश्वास लबागदेसे डाइ लबा हङ्बान गे लबारी खम्ला, ओच्छे थे भन्दा घेन घेन गेगदेएनोन लबारी खम्ला। तिगदा भिसम डा

परमेश्वर आबा मुबा ग्लारी निबान मुला। ^{१३}एनीगदेसे डादेन छ्याम जुन स्हे ह्रीसैनोन डाग्याम परमेश्वर आबाला मान तगै भिसी डाइ एनीगदेदा पिन्ना। ^{१४}एनीगदेसे डाला मिनरी जुन स्हे ह्रीसै डाइ एनीगदेदा पिन्ना।

परमेश्वरला आत्मा पुइखला भिसी लबा कबुल

^{१५}“चुदे एनीगदेसे डादा माया लबा मुसम डाइ कुल्बा ताम एनीगदेसे ड्यान्ना। ^{१६}ओच्छे डाइ परमेश्वर आबादेन छ्याम बिन्ती लला, डाला साटोरी परमेश्वर आबासे एनीगदेदा हो लबा आत्मा पुइखला। थे सदन एनीगदेदेन छ्याम धन्छ्याला। ^{१७}थे आत्मासे एनीगदेदा परमेश्वरला बारेरी सत्य ताम घोना लला। तर थेदा जम्बुलिङला म्हिगदेसे विश्वास आल, तिग्दा भिसम जम्बुलिङला म्हिगदेसे थेदा न्ह म्राङला न्ह डोसेला। तर एनीगदेसे मी थेदा डोसेला, तिग्दा भिसम थे एनीगदेदेन छ्यामनोन मुला ओच्छे थे एनीगदे न्हङरी धन्छ्याला।

^{१८}“डाइ एनीगदेदा टुहुरा स्होसी आथान, डा दोःसी एनीगदे मुबा ग्लारी खला। ^{१९}छिन्नङ लिच्छा जम्बुलिङला म्हिगदेसे डादा खाइमै आम्राङ्, तर एनीगदेसे मी डादा म्राङला। तिग्दा भिसम डा सोबासे लमा एनीगदेएनोन सोला। ^{२०}थे धिन खमाहेन्से खाहङ् लसी एनीगदे डादेन छ्याम गिक तसी चिबा मुला, डाएनोन एनीगदेदेन

छ्याम गिक तसी चिबा मुला, ओच्छे डा परमेश्वर आबादेन छ्याम गिक तसी चिबा मुला भिबा ताम एनीगदेसे था याङ्ला। ^{२१}जुन म्हिसे डाइ कुल्बा ताम सेमरी थान्सी थे अन्छार भ्रला थेसे डादा माया लला। डादा माया लबा म्हिदा परमेश्वर आबासेनोन माया लला, डाइएनोन थेदा माया लला ओच्छे डा हाङनोन थे मुबा ग्लारी खला।”

^{२२}यहूदा इस्करियोत चा आहिन, तर स्थान्दो यहूदासे येशूदा “प्रभु, हाङ तिग्दा डनी मुबा ग्लारी चा फेप्खला, तर जम्बुलिङला स्थान्दो म्हिगदे मुबा ग्लारी चा आफेप्ख भिसी सुङ्बा?” भिसी भिमा, ^{२३}येशूसे थेदा चुहङ् भिसी सुङ्जी, “चुदे खालैसे डादा माया लमुला भिसम थेसे डाइ कुल्बा तामएनोन ड्यान्मुला। ओच्छे थेदा डाला आबासेनोन माया लला, थेहङ् लसीन डादेन डाला आबा थे मुबा ग्लारी खसी थेदेन छ्यामनोन चिला। ^{२४}तर डादा माया आलबा म्हिगदेसे डाइ कुल्बा तामएनोन आड्यान्मुला। चु ताम डाइ एनीगदेदा डाला सेमग्याम पाङ्बा आहिन, तर डादा पुइखबा परमेश्वर आबासेन सुङ्बा हिन्ना।

^{२५}“डा एनीगदेदेन छ्याम मुबा धुइरीन चु ताम डाइ एनीगदेदा पाङ्बा मुला। ^{२६}डाला साटोरी आबासे एनीगदेदा हो लबारी पुइखबा थेला आत्मासे एनीगदेदा जम्मान ताम

लोप्ला ओच्छे डाइ पाङ्बा जम्मान
तामएनोन एनीगदेदा ढन्ना लला।

२७ “डा एनीगदेदा शान्ति पिन्सी
निबान मुला। एनीगदेदा पिन्बा शान्ति
चा डाला हाडलान शान्ति हिन्ना।
चु शान्ति चा जम्बुलिङला म्हिगदेसे
पाङ्बा हङ्बा शान्ति आहिन।
थेतबासेलमा दुख थाम्हन्गो ओच्छे
थालोङ्गो।

२८ “डा चुग्याम निबान मुला,
तसैनोन डा एनीगदे मुबा ग्लारी
दोःसी खला’ भिसी डाइ पाङ्बा
ताम एनीगदेसे थेःबा मुला। एनीगदेसे
डादा पक्कान माया लबा हिन्सम डा
परमेश्वर आबा मुबा ग्लारी निबारी
छ्याइबा मुला भिबा ताम थेःसी एनीगदे
ताङ्सेला मुबा। तिगदा भिसम डा भन्दा
मी परमेश्वर आबान घेन हिन्ना। २९ चु
ताम पूरा तमाहेन्से एनीगदेसे डादा
विश्वास लगै भिसी चु ताम पूरा तबा
भन्दा डाच्छान डाइ एनीगदेदा पाङ्सी
जिन्बा मुला। ३० दाहेन्से डाइ एनीगदेदा
चु भन्दा ल्हाना ताम आपाङ्। तिगदा
भिसम चु जम्बुलिङदा तहरी थान्बा
चा खबान मुला। तसैनोन थेदेन छ्याम
डादा तिगै लबा शक्ति आरे।* ३१ तर
डाइ परमेश्वर आबादा माया लमुला
भिबा ताम जम्बुलिङला म्हिगदेसे
था याङ्गै भिसीन परमेश्वर आबासे
कुल्बा अन्छारनोन डाइ लबान मुला।
दाहेन्से भ्रउ, यहाङ चुग्याम निङ।

येशू चा अङ्गुरला दोड

१५ “साँच्चिलान अङ्गुर दोड
चा डानोन हिन्ना, ओच्छे
डाला आबा चा दोडदा सयार लबा
म्हि हिन्ना। २ थेसे डादेन छ्याम
मुबा तिगै आरोबा हाँगा चा थासी
भ्याङ्ला। तर रोबा हाँगागदेदा चा
अभ ल्हाना रोगै भिसी जोगदे घ्याम्सी
ज्यना लसी सयार लला। ३ थेहङ्
लसीन एनीगदेला विश्वास अभ लहेगै
भिसी डाइ पाङ्बा चु बचनगदेसेन
एनीगदेला सेम ज्यना लसी जिन्बा
मुला। ४ एनीगदे डादेन छ्याम गिक
तसी चिउ, डाएनोन एनीगदेदेन छ्याम
गिक तसी चिला। हाँगा दोङ्ग्याम
फेजी भिसम थे हाँगारी तिगै आरो।
थेहङ् लसीन एनीगदेएनोन डाग्याम
फेसी चिजी भिसम एनीगदेसेनोन तिगै
लबारी आखम।

५ “अङ्गुरला दोड डानोन हिन्ना,
एनीगदे चा हाँगागदे हिन्ना। चुदे खालै
म्हि डादेन छ्याम गिक तसी चिजी
भिसम डाएनोन थेदेन छ्याम गिक
तसी चिला, ओच्छे थे विश्वासरी
ल्हेसी ल्हानान ज्यबा गेगदे लला। तर
डाग्याम फेसी चिजी भिसम एनीगदेसे
तिगै लबारी आखम। ६ डादेन छ्याम
गिक तसी आचिबागदेदा चा थे
हाँगागदेदा भ्याङ्बा हङ् लसी
भ्याङ्ला, ओच्छे थे खर्ला। थेहङ्बा



अडगुरला दोड (१५:१)

हाँगागदेदा म्हिगदेसे हुप लसी मेरी
भ्याङ्ला, जमाहेन्से थे मेफ्रा दोला।
७ चुदे एनीगदे डादेन छ्याम गिक तजी
भिसम ओच्छे डाला बचन एनीगदेला
सेम न्हडरी थान्जी भिसम एनीगदेदा
तो:बा स्हे हीमा पिन्ना। ८ चुदे एनीगदेसे
ल्हानान ज्यबा गेगदे लसी डाला चेला
दोसी उन्जी भिसम डाला आबाला
मानदेन जयजयकार तला।

९ “डादा आबासे माया लबा
हङ् लसी डाइएनोन एनीगदेदा
डाच्छाहेन्सेन माया लबा मुला।
थेतबासेलमा एनीगदेसे डाला माया
थाम्ले:गो। १० डाला आबासे कुल्बा
ताम इयान्बासे लमा आबाला माया

सदन डादेन छ्याम मुला। थेहङ्
लसीन एनीगदेसेनोन डाइ कुल्बा ताम
इयान्जी भिसम डाला माया सदन
एनीगदेदेन छ्याम तला। ११ डाला सेम
ताङ्बा हङ् लसी एनीगदेला सेमएनोन
पूरान ताङ्खम्मौ भिसीन डाइ एनीगदेदा
चु ताम पाङ्बा हिन्ना।

१२ “डाइ एनीगदेदा माया लबा हङ्
लसी एनीगदेसेनोन हाङ हाङ न्हडरी
गिकसेम गिकदा माया लउ भिसी
डाइ चु ताम कुल्बा मुला।* १३ होला
लागिरी हाङला ज्याननोन पिन्बा भन्दा
घ्रेन माया अर्गु तिगैनोन आरे। १४ चुदे
एनीगदेसे डाइ कुल्बा ताम इयान्जी
भिसम एनीगदे डाला हो हिन्ना।

१५ दाहेन्से डाइ एनीगदेदा नोकर भिसी आपाङ्, तिग्दा भिसम मालिकसे तिग लबान मुला भिसी नोकरदा था आत। तर डाइ एनीगदेदा हो भिसी पाङ्बा मुला, तिग्दा भिसम डाला आबासे डादा सुङ्बा जम्मान ताम डाइ एनीगदेदा पाङ्सी जिन्बा मुला। १६ एनीगदेसे डादा धम्बा आहिन, तर एनीगदे सदन ज्यबा म्हि दोसी ज्यबा गे लगै भिसीन डाइ एनीगदेदा धम्बा हिन्ना। थेहङ् लसी एनीगदेसे डाला मिन किन्सी परमेश्वर आबादेन छयाम ह्रीजी भिसम एनीगदेसे ह्रीबा स्हे परमेश्वर आबासे पिन्ना। १७ थेतबासेलमा डाइ कुल्बा अन्छार एनीगदेसे गिकसेम गिकदा माया लउ।

चेलागदेदा हेला लबा

१८ “चुदे एनीगदेदा जम्बुलिङला म्हिगदेसे हेला लजी भिसम एनीगदेदा भन्दा डाच्छा डादा हेला लबा हिन्ना भिसी घोउ। १९ चुदे एनीगदे जम्बुलिङला म्हि हिन्बा हिन्सम थेनीगदेसे एनीगदेदा हाङला म्हि म्हन्सी माया लसेला मुबा। तर एनीगदे चु जम्बुलिङला म्हि आहिन। एनीगदेदा डाइ चु जम्बुलिङग्याम धम्बा हिन्ना। थेतबासेलमा एनीगदेदा जम्बुलिङला म्हिगदेसे हेला लबा हिन्ना। २० ‘नोकर मालिक भन्दा घेन आत’ भिसी डाइ पाङ्बा ताम

एनीगदेसे थाम्ले:गो। थेनीगदेसे डादा दुख पिन्जी भिसम एनीगदेदा एनोन दुख पिन्ना। थेहङ् लसीन थेनीगदेसे डाइ कुल्बा ताम इयान्जी भिसम एनीगदेसे पाङ्बा ताम एनोन इयान्ना।* २१ एनीगदे डाला म्हि तबासे लमा थेनीगदेसे एनीगदेदा ल्हानान दुख पिन्ना। तिग्दा भिसम थेनीगदेसे डादा पुइखबा परमेश्वर आबादा डोसेबा आरे। २२ चुदे डा आखबादेन डाइ थेनीगदेदा आपाङ्बा हिन्सम थेनीगदेदा पापला दोष आतसेला मुबा। तर दाहेन्से थेनीगदेसे हाङला पापला लागिरी तिगै निउ लबा ग्ला आरे। २३ डादा हेला लबा म्हिसे डाला आबादा एनोन हेला लला। २४ खालैसेन लबारी आखम्बा गेगदे डाइ थेनीगदेला गुडरी आलबा हिन्सम थेनीगदेदा पापला दोष आतसेला मुबा। तर डाइ लबा उदेकला गेगदे म्हाङ्सीनोन थेनीगदेसे डादेन डाला आबादा हेला लबा मुला। २५ तर थेनीगदेला हाङलान ठिमरी ‘थेनीगदेसे डादा थेहङ् नोन हेला लला’ भिसी भिबा ताम पूरा तबाला लागिरीन चुहङ् तबा हिन्ना।*

२६ “डाइ आबाग्याम सत्यला आत्मा एनीगदेदा हो लबाला लागिरी पुइखला। थे खसी थेसेन डाला बारेरी पाङ्गला। २७ ओच्छे एनीगदे चा

डाच्छाहेन्सेन डादेन छ्याम चिबासे लमा एनीगदेसेनोन डाला बारेरी पाङ्ला।

१६ “एनीगदेला विश्वास म्हासी थानिगै भिसी डाइ एनीगदेदा जम्मान ताम पाङ्बा हिन्ना। ^२एनीगदेदा थेनीगदेसे यहूदीगदे हुप तबा दिमग्याम तेःला। ओच्छे एनीगदेदा साइबा म्हिगदेसे ‘डन्से परमेश्वरदा तेन्बा मुला’ भिसी म्हन्बा धुइएनोन खबान मुला। ^३थेनीगदेसे एनीगदेदा थेहङ् लला, तिग्दा भिसम थेनीगदेसे परमेश्वर आबादा डोसेबा आरे ओच्छे डादाएनोन डोसेबा आरे। ^४च्यागो, थे जम्मान ताम तबा धुइरी एनीगदेसे ‘चु जम्मान तामला बारेरी डादा प्रभुसे डाच्छान सुङ्सी जिन्बा मुबा’ भिबा ताम ढनै भिसी डाइ एनीगदेदा चु ताम पाङ्बान मुला। दान्देधोना डा एनीगदेदेन छ्यामनोन मुबासे लमा चु ताम डाइ डाच्छा एनीगदेदा आपाङ्नी।

परमेश्वरला आत्मासे लबा गे

^५दाहेन्से डा डादा पुइखबा परमेश्वर आबा मुबा ग्लारी निबान मुला। तर एनीगदे खालैसेन डादा ‘हाङ खानड फेप्बा?’ भिसी आङ्योइ। ^६तसैनोन डाइ चु जम्मान ताम पाङ्बासे लमा एनीगदेदा सेमरी ल्हानान सुर्दा तबा मुला। ^७तसैनोन डाइ एनीगदेदा सत्य ताम पाङ्बा मुला, डा चुग्याम निबान एनीगदेदा ज्यबा हिन्ना। तिग्दा भिसम

डा चुग्याम आनिनी भिसम एनीगदेदा हो लबा आत्मा एनीगदे मुबा ग्लारी आफेप्ख। तर डा निजी भिसम डाइ थेदा एनीगदे मुबा ग्लारी पुइखला। ^८थे फेप्खमाहेन्से थेसे जम्बुलिङला म्हिगदेदा परमेश्वरदा सेम निबा गेला बारेरीदेन परमेश्वरसे लबा निसाफला बारेरी, गल्ली गेला बारेरी ओच्छे पापला बारेरी उन्ना। ^९डादा विश्वास आलबान पाप हिन्ना भिसी थेसे थेनीगदेदा घोना लला। ^{१०}थेसे परमेश्वरदा सेम निबा गे तिग हिन्ना भिसी घोना लला। तिग्दा भिसम डा परमेश्वर आबा मुबा ग्लारी निबान मुला, ओच्छे एनीगदेसे डादा दोःसी आम्राङ्। ^{११}थेसे परमेश्वरसे लबा निसाफ भिबा तिग हिन्ना भिसीएनोन थेनीगदेदा घोना लला। तिग्दा भिसम चु जम्बुलिङदा तहरी थान्बादा परमेश्वरसे निसाफ लसी जिन्बा मुला।

^{१२}“डाइ एनीगदेदा पाङ्तोःबा ताम मी ल्हानान मुबा। तर एनीगदेसे दान्दे चु भन्दा ल्हाना घोबारी आखम। ^{१३}तर थे सत्यला आत्मा फेप्खमाहेन्से सत्य ताम तिग हिन्ना भिसी थेसेन एनीगदेदा घोना लला। थेसे हाङला सेमग्याम एनीगदेदा तिगै ताम आसुङ्, थेसे जुन ताम थेःला थेनोन ताम जे एनीगदेदा सुङ्ला। ओच्छे थेसेन लिच्छा तसेला तामगदेएनोन एनीगदेदा घोना लला। ^{१४}थेसे डाला मानदेन जयजयकार लला, तिग्दा भिसम थेसे डाइ पाङ्बा ताम थेःसी एनीगदेदा पाङ्ला।

१५ परमेश्वर आबादेन छ्याम मुबा जम्मान स्हे जम्मान डालान हिन्ना। थेतबासेलमा डाइ पाड्बा जम्मान ताम 'सत्यला आत्मासे थे:सी एनीगदेदा घोना लला' भिसी पाड्बा हिन्ना।”

सुर्दा म्ले:सी ताड्म्याङ्ला

१६ येशूसे हाडला चेलागदेदा “छिन्नड लिच्छा एनीगदेसे डादा आम्राङ्, तर दो:सी तिगै धिन लिच्छा मी एनीगदेसे डादा म्राङ्ला” भिसी सुङ्जी।

१७ चु ताम थे:सी येशूला कोइ कोइ चेलागदेसे “थेसे यहाडदा ‘छिन्नड लिच्छा एनीगदेसे डादा आम्राङ् दो:सी छिन्नड लिच्छा मी एनीगदेसे डादा म्राङ्ला’ भिबादेन ‘तिग्दा भिसम डा आबा मुबा ग्लारी निबान मुला’ भिसी सुङ्बाला अर्थ चा तिग हिन्ना?” भिसी हाड हाड न्हडरी ताम लजी। १८ ओच्छे थेनीगदेसे दो:सी, “थेसे ‘छिन्नड लिच्छा’ भिसी सुङ्बा तिग हिन्ना? थेसे सुङ्बा ताम यहाडदा था आरे” भिसी भिजी।

१९ थेनीगदेसे चु तामला बारेरी ड्योइबा सेम लबा मुला भिसी था याङ्सी येशूसे थेनीगदेदा चुहङ् भिसी सुङ्जी, “डाइ एनीगदेदा ‘छिन्नड लिच्छा एनीगदेसे डादा आम्राङ् भिबादेन छिन्नड लिच्छा मी एनीगदेसे डादा म्राङ्ला’ भिसी पाड्बा तामला बारेरी एनीगदेसे हाड हाड न्हडरी ताम लबा आहिन? २० थेतबासेलमा च्यागो,

एनीगदेसे डाला ताम ड्यान्गो, एनीगदे क्राबा क्रिङ्बा लला, तर जम्बुलिङला म्हिगदे चा ताङ्ला। एनीगदेदा दुखदेन सुर्दा तला, तसैनोन एनीगदेला सुर्दा म्हासी दो:सी ताड्म्याङ्ला। २१ कोला न्हबा धुइरी मिडम्हेमेदा ल्हानान दुख तमुला। तर कोला न्हमाहेन्से थेसे थे जम्मान दुख म्ले:मुला। तिग्दा भिसम जम्बुलिङरी कोला गिक न्हजी भिसी थे ल्हानान ताङ्मुला। २२ थेहङ् लसीन एनीगदेदा दान्दे दुख तबा मुला। तर डा दो:सी एनीगदेदा हुप तबारी खमा एनीगदे सेमरी ल्हानान ताड्म्याङ्ला। ओच्छे एनीगदेला ताङ्बा खालैसेन म्हाना लबारी आखम। २३ थे धुइरी एनीगदेसे डादेन छ्याम तिगै ताम आङ्योइ। च्यागो, डाला मिनरी एनीगदेसे जुन स्हे हीला थे स्हे एनीगदेदा परमेश्वर आबासे पिन्ना। २४ दान्देधोना मी एनीगदेसे डाला मिनरी तिगै हीबा आरे। हीगो एनीगदेदा पिन्ना, ओच्छे एनीगदे पूरान ताड्म्याङ्ला।

येशूसे जम्बुलिङला जम्मान नइबा तामदा ढाबा

२५ “दान्दे चा डाइ एनीगदेदा चु ताम उखानग्याम पाड्बा मुला, तर धुइ तमाहेन्से परमेश्वरला बारेरी पाङ्मा चा उखान आपाङ्ना डाइ एनीगदेदा प्रस्टन घोना लला। २६ थे धुइरी एनीगदे हाडसेन डाला मिनरी हीला। तर डाइ एनीगदेला लागिरी परमेश्वर आबादेन

छायाम ह्रीसी पिन्आतोः। ^{२७}तिग्दा भिसम परमेश्वर आबा हाडसेन एनीगदेदा माया लबा मुला। तिग्दा भिसम एनीगदेसे डादा माया लबा मुला, ओच्छे डा परमेश्वरग्याम खबा हिन्ना भिसीएनोन विश्वास लबा मुला। ^{२८}डा परमेश्वर आबाग्यामसेन चु जम्बुलिडरी खबा हिन्ना, दान्दे दोःसी डा चु जम्बुलिडदा ख्लासी परमेश्वर आबा मुबा ग्लारी निबान मुला।”

^{२९}जमाहेन्से चेलागदेसे येशूदा चुहङ् भिसी भिजी, “दान्दे चा भिसम हाडसे डन्दा उखान आसुङ्ना प्रस्टन घोना लजी। ^{३०}दाहेन्से हाडदा जम्मान ताम था मुला भिबा ताम डन्से था याङ्जी। दाहेन्से खालैसे हाडदा ड्योइतोःबा ताम तिगै आरे। थेतबासेलमा हाड परमेश्वरग्याम फेप्खबा हिन्ना भिसी डन्से विश्वास लजी।”

^{३१}येशूसे थेनीगदेदा चुहङ् भिसी सुङ्जी, “तिग दान्दे मी एनीगदेसे डादा विश्वास लबा मुला? ^{३२}च्यागो, चुहङ्बा धुइएनोन खबान मुला, एनीगदे ससा बडबड तसी डा गिकदा जे ख्लासी हाड हाडला दिमरी निला, पाङ्नोन तोःमा चु धुइ खसी जिन्बा मुला। तसैनोन थे धुइरी डा गिक जे आत, तिग्दा भिसम डाला आबा सदन डादेन छायाम मुला। ^{३३}एनीगदे डादेन छायाम गिक तसी शान्ति याङ्सी चिबारी खम्मौ भिसीन डाइ एनीगदेदा चु जम्मान ताम पाङ्बा हिन्ना। जम्बुलिडरी एनीगदेदा ल्हानान दुख

तला, तर एनीगदेसे आँट लउ, तिग्दा भिसम डाइ जम्बुलिडला जम्मान नइबा तामदा ढासी जिन्बा मुला।”

येशूला प्रार्थना

१७ चु जम्मान ताम सुङ्सी जिन्माहेन्से येशूसे स्वर्गपट्टि स्हीसी चुहङ् भिसी प्रार्थना लजी, “परमेश्वर आबा, दाहेन्से धुइ तसी जिन्बा मुला। हाड गाते घ्रेन मुला भिसी उन्बाला लागिरी हाडसे हाडला भा गाते घ्रेन मुला भिसी उन्गो। ^२हाडसे थेदा पिन्बा जम्मान म्हिगदेदा थेसे जुकजुकधोनाला जुनी पिन्खम्मौ भिसी हाडसे थेदा जम्बुलिडला जम्मान म्हिगदेथोरी शासन लबा अधिकार पिन्बा मुला। ^३हाड गिक जेन सत्य परमेश्वर हिन्ना भिसी डोसेबादेन हाडसे पुइखबा येशू ख्रीष्टदा डोसेबान जुकजुकधोनाला जुनी याङ्बा हिन्ना। ^४हाडसे डादा जिम्मा पिन्बा गे पूरा लसी डाइ जम्बुलिडरी हाडदा मान लबा मुला। ^५परमेश्वर आबा, जम्बुलिड स्होबा भन्दा डाच्छा डा हाडदेन छायाम मुबा धुइरी गाते घ्रेन मानदेन जयजयकार मुबा। दाहेन्से थेहङ् लसीन डादा हाडदेन छायाम घ्रेन स्होउ।

हाडला चेलागदेला लागिरी येशूसे लबा प्रार्थना

^६“हाडसे जम्बुलिडग्याम डादा पिन्बा जम्मान म्हिगदेदा डाइ हाड

खाल हिन्ना भिसी डोसेना लबा मुला। थेनीगदे हाडलान म्हि मुबा, ओच्छे हाडसे डादा पिन्जी। थेनीगदे हाडला बचन अन्छार भ्रबा मुला।^७हाडसे डादा पिन्बा जम्मान ताम हाडग्यामसेन खबा हिन्ना भिसी दान्दे थेनीगदेसे था याङ्सी जिन्बा मुला।^८तिग्दा भिसम हाडसे डादा पिन्बा बचन डाइ थेनीगदेदा लोप्बा मुला, ओच्छे थेनीगदे थे अन्छार भ्रबान मुला। डा हाडग्याम खबा हिन्ना भिसी थेनीगदेसे घोबा मुला, ओच्छे डादा हाडसे पुइखबा हिन्ना भिसी एनोन थेनीगदेसे विश्वास लबा मुला।

^९“डाइ थेनीगदेलान लागिरी प्रार्थना लबान मुला, जम्बुलिङला म्हिगदेला लागिरी चा आहिन। तर हाडसे पिन्बा म्हिगदेलान लागिरी प्रार्थना लबान मुला, तिग्दा भिसम थेनीगदे हाडलान हिन्ना।^{१०}डादेन छ्याम मुबा जम्मान हाडला हिन्ना, हाडदेन छ्याम मुबा जम्मान डाला हिन्ना। ओच्छे थेनीगदेग्याम डाला मानदेन जयजयकार तबा मुला।

^{११}“दाहेन्से डा हाड मुबा ग्लारी खबान मुला। ल्हानान धिनधोना डा चु जम्बुलिङरी आचि, तर चुगदे मी चु जम्बुलिङरीन चिला। थेतबासेलमा डाला आबा परमप्रभु परमेश्वर, हाडदेन डा गिक तबा हङ् लसी चुगदेएनोन गिक तबाला लागिरी

हाडसे डादा पिन्बा हाडला मिनग्याम थेनीगदेदा जोगब लसी थान्गो।^{१२}डा थेनीगदेदेन छ्याम मुबा धुइरी हाडसे डादा पिन्बा हाडला मिनग्याम डाइ थेनीगदेदा जोगब लसी थान्जी। नाश ततो:बा म्हि बाहेक स्यहान्दो खालैदान डाइ नाश तआपुङ्नी। तिग्दा भिसम परमेश्वरला बचनरी भ्रिबा ताम पूरा तबाला लागिरीन चुहङ् तबा हिन्ना।*

^{१३}“तर दाहेन्से डा हाड मुबा ग्लारी खबान मुला। डाग्याम याङ्बा ताङ्बा थेनीगदेसे पूरान याङ्गै भिसीन डाइ चु ताम जम्बुलिङरी मुबा धुइरीन पाङ्बा मुला।^{१४}डा हाडसेन थेनीगदेदा हाडला बचन लोप्जी। तर थेनीगदेदा चु जम्बुलिङला म्हिगदेसे हेला लजी। तिग्दा भिसम डा चु जम्बुलिङला आहिन्बा हङ् थेनीगदेएनोन चु जम्बुलिङला आहिन।^{१५}थेनीगदेदा चु जम्बुलिङग्याम भोग्गो भिसी डाइ प्रार्थना आल, तर थेनीगदेदा शैतानग्याम जोगब लसी थान्गो।^{१६}डा चु जम्बुलिङला आहिन्बा हङ् थेनीगदेएनोन चु जम्बुलिङला आहिन।^{१७}थेनीगदेदा सत्य बचनग्याम हाडदा तेन्बा चोखो म्हि स्होउ। तिग्दा भिसम हाडला बचन सत्य मुला।^{१८}हाडसे डादा जम्बुलिङरी पुइखबा हङ् लसी डाइएनोन थेनीगदेदा जम्बुलिङरी पुइबा मुला।^{१९}थेनीगदेसे हाडसे हाडदान पूरान चोखो थान्गै भिसी

डाइनोन थेनीगदेला लागिरी हाडसे
हाडदान चोखो स्होबा मुला।

**हाडदा विश्वास लबागदे जम्मान
गिक तसी चिगै भिसी येशूसे लबा
प्रार्थना**

२० “डाइ चुगदेला लागिरी जे आहिन,
तर चुगदेला ताम थे:सी डादा विश्वास
लबा म्हिगदेला लागिरीनोन प्रार्थना
लला। २१ थेनीगदे जम्मान गिक तसी
चिबारी खम्मौ। परमेश्वर आबा, हाड
डादेन छ्याम ओच्छे डा हाडदेन छ्याम
गिक तबा हङ् लसी थेनीगदेएनोन
यहाडदेन छ्याम गिक तबारी खम्मौ।
ओच्छे डादा हाडसे पुइखबा हिन्ना
भिसी जम्बुलिङला म्हिगदेसे विश्वास
लबारी खम्मौ। २२ यहाड गिक तबा
हङ् लसी थेनीगदेएनोन गिक तसी
चिबारी खम्मौ भिसी हाडसे डादा मान
याङ्बा म्हि स्होबा हङ् लसी डाइएनोन
थेनीगदेदा मान याङ्बा म्हि स्होबा
मुला। २३ डा थेनीगदेदेन छ्याम ओच्छे
हाड डादेन छ्याम गिक तबा हङ् लसी
थेनीगदेएनोन पूरान गिक तबारी खम्मौ।
ओच्छे डादा हाडसेन पुइखबा हिन्ना
भिबादेन हाडसे डादा माया लबा हङ्
लसी हाडसे थेनीगदेदाएनोन माया
लमुला भिसी जम्बुलिङला जम्मान
म्हिगदेसे था याङ्गै।

२४ “परमेश्वर आबा, हाडसे
जम्बुलिङ स्होबा भन्दा डाच्छाहेन्सेन
डादा माया लसी यहालदेन शक्ति पिन्बा
मुला। चु ताम म्राङ्बाला लागिरी हाडसे

डादा पिन्बा जम्मान म्हिगदे डादेन
छ्याम तगै भिबा डाला सेम मुला।

२५ “ठीक निसाफ लबा परमेश्वर
आबा, हाडदा जम्बुलिङला म्हिगदेसे
डोसेबा आरे, तर डाइ हाडदा डोसेबा
मुला। ओच्छे हाडसेन डादा पुइखबा
हिन्ना भिसी डाला चेलागदेसे था
याङ्बा मुला। २६ हाडसे डादा लबा
माया थेनीगदेदेन छ्याम तगै, ओच्छे
डा थेनीगदेदेन छ्याम तबारी खम्मौ
भिसी डाइ थेनीगदेदा हाड खाल हिन्ना
भिसी डोसेना लबा मुला। अफ हाड
खाल हिन्ना भिसी डाइ थेनीगदेदा
सदन पाङ्ला।”

येशूदा चुङ्बा

मत्ती २६:४७-५६; मर्कस १४:४३-५०;

लूका २२:४७-५३

१८ प्रार्थना लसी जिन्माहेन्से
येशू हाडला चेलागदेदेन
छ्याम किद्रोन भिबा खोल्साला
क्याम्सडपट्टि मुबा बगैचारी फेज्जी।
२थे ग्ला येशूदा चुङ्सी पिन्बा
यहूदादाएनोन था मुबा। तिगदा भिसम
येशू हाडला चेलागदेदेन छ्याम थे
ग्लारी ल्हानान हङ्बा फेप्पुबा। ३थे
धुङ्गरी फरिसीगदेदेन परमेश्वरला
मन्दिररी पूजा लबा मुल म्हिगदेसे
पुइखबा परमेश्वरला मन्दिर खुङ्बा
सिपाहीदेन रोमी सिपाहीगदेदा भसी
यहूदा येशू मुबा ग्लारी धोखजी।
थेनीगदे हतियार थोसी नाडसलदेन
मेदङ्ग म्रासी खबा मुबा।

४ हाडदा तबारी छयाइबा जम्मान ताम था याङ्सी थेनीगदेला डाच्छापट्टि फेप्सी येशूसे थेनीगदेदा “एनीगदेसे खाल्दा म्हाइबा?” भिसी इयोइजी। ५ जमाहेन्से थेनीगदेसे “नासरतला येशूदा म्हाइबा” भिसी भिमा, येशूसे थेनीगदेदा “डा थेनोन हिन्ना” भिसी सुङ्जी। येशूदा चुङ्सी पिन्बा यहूदाएनोन थेनीगदेदेन छ्यामनोन राप्सी चिबा मुबा। ६ येशूसे थेनीगदेदा “डा थेनोन हिन्ना” भिसी सुङ्बा थे:मैछ्याम थेनीगदे ग्यापपट्टि ले:मा जम्मान हिल्जी। ७ दो:सी येशूसे थेनीगदेदा “एनीगदेसे खाल्दा म्हाइबान मुला?” भिसी सुङ्मा, थेनीगदेसे “नासरतला येशूदा म्हाइबा” भिसी भिजी। ८ येशूसे थेनीगदेदा “डा थेनोन हिन्ना भिसी डाइ एनीगदेदा दोलोन पाङ्सी जिन्जी। थेतबासेलमा एनीगदेसे डादान म्हाइबा हिन्सम चु म्हिगदेदा चा निपुङ्गो” भिसी सुङ्जी। ९ “हाडसे डादा पिन्बा म्हिगदे डाइ गिकनोन नाश तपुङ्बा आरे” भिसी येशूसे डाच्छान सुङ्बा ताम चुहङ् लसी पूरा तजी।

१० सिमोन पत्रुससे हाडदेन छ्याम मुबा तरवार ते:सी परमेश्वरला मन्दिररी पूजा लबा मुल म्हिला नोकरदा ताम्मा दाहिनेपट्टिला नाब्यड च्वाट्टन थाजी। थेला मिन चा माल्खस मुबा।

११ येशूसे पत्रुसदा “एला तरवार स्युबारी भाङ्गो। तिग परमेश्वर आबासे नापुङ्बा दुख डाइ थानागो?” भिसी सुङ्जी।*

येशूदा हन्नास मुबा ग्लारी भोर्बा

१२ जमाहेन्से रोमी सिपाहीगदेदेन थेनीगदेला कप्तान ओच्छे यहूदीगदेसे पुङ्बा परमेश्वरला मन्दिर खुङ्बा सिपाहीगदेसे येशूदा चुङ्सी खीजी। १३ ओच्छे डाच्छा थेनीगदेसे येशूदा कैयाफाला केन हन्नास मुबा ग्लारी भोर्जी। कैयाफा चा परमेश्वरला मन्दिररी पूजा लबा थे दिङला मुल म्हि मुबा। १४ चुनोन कैयाफासे “जम्मान म्हिगदेला लागिरी म्हि गिक सिबा चा ज्यबा हिन्ना” भिसी यहूदी नेतागदेदा सल्लाह पिन्बा मुबा।*

पत्रुससे येशूदा डोसेबा आरे भिसी लुसीला ताम पाङ्बा

मत्ती २६:६६-७०; मार्कस १४:६६-६८;

लूका २२:५५-५७

१५ सिमोन पत्रुसदेन स्थान्दो चेला गिक चा येशूदेन छ्याम छ्याम निजी। थे स्थान्दो चेलासे चा परमेश्वरला मन्दिररी पूजा लबा मुल म्हिदा ज्यना लसी डोसेमुबा। थेतबासेलमा थे येशूदेन छ्यामनोन परमेश्वरला मन्दिररी पूजा लबा मुल म्हिला दिमला खाङ्गारी निजी। १६ तर

पत्रुस चा म्नापरीन राप्सी चिबा मुबा।
थेतबासेलमा परमेश्वरला मन्दिररी
पूजा लबा मुल म्हिदा डोसेबा थे
स्थान्दो चेला मङ्ग्यार निसी म्नापरी
चिबा म्निडम्हेमेदा पाङ्सी पत्रुसदा
न्हङरी भजी।

१७ जमाहेन्से म्नापरी चिबा थे
म्निडम्हेमेसे पत्रुसदा “तिग एएनोन थे
म्हिला चेला आहिन?” भिसी भिमा,
पत्रुससे थेदा “डा आहिन” भिसी
भिजी।

१८ खड्बासे लमा थेरी नोकरगदेदेन
पालेगदे मे दूसी चिबा मुबा। पत्रुसएनोन
निसी थेनीगदेदेन छ्यामनोन मे दूबारी
छ्याइजी।

**परमेश्वरला मन्दिररी पूजा लबा
मुल म्हिसे येशूदा ड्योइबा छार्बा
लबा**

मती २६:५६-६६; मार्कुस १४:५५-६४;
लूका २२:६६-७१

१९ परमेश्वरला मन्दिररी पूजा लबा
मुल म्हिसे येशूदा थेला चेलागदेदेन
छ्याम थेसे लोण्बा तामला बारेरी
ड्योइबा छार्बा लजी। २० येशूसे थेदा
चुहङ् भिसी सुङ्जी, “डाइ जम्मालान
डाच्छा लोण्बा मुला। डाइ सदन
यहूदीगदे हुप तबा दिमदेन परमेश्वरला
मन्दिररी खबा जम्मान यहूदीगदेला
डाच्छा लोण्बा मुला। डाइ खालैसे
था आयाङ्ना लसी तिगै ताम पाङ्बा
आरे। २१ डादा तिगदा ड्योइबा? डाइ
लोण्बा ताम थे:बागदेदा ड्योइगो।

डाइ तिग पाङ्जी, तिग लोण्जी भिबा
थेनीगदेदान था मुला।”

२२ येशूसे चुहङ् सुङ्मा येशूला डामरी
राप्सी चिबा परमेश्वरला मन्दिरला
सिपाही गिकसे येशूदा तोबान,
“परमेश्वरला मन्दिररी पूजा लबा मुल
म्हिदेन छ्याम चुहङ् लसी ताम लबारी
तला?” भिसी भिजी।

२३ येशूसे थेदा “डाइ पाङ्बा ताम
ठीक आहिनसम आहिन भिसी
पाङ्गो। चुदे डाइ पाङ्बा ताम ठीक
हिनसम तिगदा डादा तोबा?” भिसी
सुङ्जी। २४ जमाहेन्से हन्नाससे येशूदा
आब्लानान परमेश्वरला मन्दिररी पूजा
लबा मुल म्हि कैयाफा मुबा ग्लारी
पुङ्जी।

**दो:सीनोन पत्रुससे येशूदा डोसेबा
आरे भिसी लुसीला ताम पाङ्बा**

मती २६:७१-७५; मार्कुस १४:६६-७२;
लूका २२:५८-६२

२५ सिमोन पत्रुसएनोन राप्सी मे दूसी
चिबा धुङरी थेरी मुबा म्हिगदेसे थेदा
“एएनोन येशूलान चेला आहिन?”
भिसी ड्योइमा, थेसे थेनीगदेदा
“आहिन, डाइ थेदा डोसेबान आरे”
भिसी लुसीला ताम पाङ्जी। २६ पत्रुससे
नाब्यङ थासी पिन्बा नोकरला
हाडलान म्हिणोन थेरी मे दूसी चिबा
मुबा। थेएनोन परमेश्वरला मन्दिररी
पूजा लबा मुल म्हिला नोकर मुबा।
थेसे पत्रुसदा “डाइ एदा थे म्हिदेन
छ्यामनोन बगैचारी म्नाङ्बा आहिन?”

भिसी भिमा, ^{२७}पत्रुससे दोःसीनोन आहिन, भिसी जोहाब पिन्जी। जोहाब पिन्मैछ्याम नागा क्राजी।

येशूदा पिलातस मुबा ग्लारी भोर्बा

मत्ती २७:१-२, ११-१४; मर्कूस १५:१-५;

लूका २३:१-५

^{२८}थेनीगदेसे येशूदा स्थहोरीन कैयाफाला दिमग्याम रोमी अञ्चलाधीशला दरबाररी भोर्जी। तर हाड अशुद्ध तसी मिश्र यहुल्साग्याम फेसी खबा धिनदा ढन्सी धड्बा चाडरी तिगै चबा स्हे चबारी आम्याड् भिसी थेनीगदे चा लोड्सी दरबार न्हडरी आवाङ्नी।[†] ^{२९}थेतबासेलमा रोमी हाकिम पिलातस मङ्ग्यार खजी। ओच्छे थेसे थेनीगदेदा “एनीगदेसे चु म्हिला तिग दोष स्याप्जी?” भिसी ड्योइमा, ^{३०}थेनीगदेसे थेदा “चुदे चु म्हिला दोष आस्याप्बा हिन्सम डन्से चु म्हिदा हाड मुबा ग्लारी आभसेला” भिसी भिजी।

^{३१}पिलातससे थेनीगदेदा “चु म्हिदा एनीगदेसेन भोर्गो, ओच्छे एनीगदेला हाडलान ठिम अन्छार चु म्हिला निसाफ लउ” भिसी भिजी।

जमाहेन्से यहूदीगदेसे थेदा “खालै म्हिदा साइबाला सजाय पिन्बा डन्ना लागिरी ठीक आरे” भिसी भिजी।

^{३२}हाड खाहड् लसी सितोःला भिसी येशूसेन सुड्बा ताम पूरा तबाला लागिरीन चुहड् तबा मुबा।*

^{३३}दरबार न्हडरी निसी पिलातससे येशूदा ड्योइजी, ओच्छे थेसे येशूदा “तिग ए यहूदीगदेला ग्ले हिन्ना?” भिसी ड्योइजी।

^{३४}येशूसे पिलातसदा “चु ताम हाडसे हाडलान सेमग्याम सुड्बा हिन्ना कि स्थहान्दो खालै म्हिसे हाडदा डाला बारेरी पाड्बासे लमा चु ताम ड्योइबा हिन्ना?” भिसी सुड्जी।

^{३५}पिलातससे येशूदा “तिग डा यहूदी हिन्ना? एलान यहुलला म्हिगदेदेन परमेश्वरला मन्दिररी पूजा लबा मुल म्हिगदेसे एदा चुरी भबा हिन्ना। एसे तिग लजी?” भिसी भिजी।

^{३६}येशूसे पिलातसदा “डाइ शासन लबा चु जम्बुलिडरी आहिन। चुदे डाइ चु जम्बुलिडरी शासन लबा हिन्सम डादा यहूदीगदेला याग्याम जोगब लबारी डाला म्हिगदे थेनीगदेदेन छ्याम छेसेला मुबा। तर डाइ शासन लबा चुरी आहिन” भिसी सुड्जी।

^{३७}पिलातससे येशूदा “थेहड् भिसम ए ग्लेनोन हिन्ना?” भिसी ड्योइमा, येशूसे पिलातसदा “डा ग्ले हिन्ना भिसी मी हाडसेन सुड्बा मुला। डा ग्ले दोबाला लागिरी न्हबा हिन्ना, ओच्छे

१८:२८ यहूदीगदेला ठिम अन्छार यहूदीगदे अर्गु यहुलला म्हिगदेला दिमरी वाङ्जी भिसम अशुद्ध तमुबा।

१८:३२ यूह ३:१४; १२:३२

चुनोन सत्य ताम घोना लबाला लागिरी डा चु जम्बुलिडरी खबा हिन्ना। थेतबासेलमा जुन म्हि सत्यला लिच्छा भ्रला थेसे डाला ताम ड्यान्ना” भिसी सुड्जी।

३८ पिलातससे येशूदा “खाहड्बा सत्य ताम हिन्ना?” भिसी ड्योड्जी।

चु तामगदे ड्योड्मैछ्याम पिलातस मडग्यार यहूदीगदे मुबा ग्लारी निसी चुहड् भिसी भिजी, “डाइ चु म्हिला तिगै दोष आस्याप्नी। ३९ तर मिश्र यहुल्साग्याम फेसी खबा धिनदा ढन्सी धड्बा चाडला धुडरी डाइ एनीगदेला लागिरी म्हि गिकदा ख्लासी पिन्तो:मुबा। थेतबासेलमा डाइ चु यहूदीगदेला ग्लेदा ख्लासी पिन्गै भिसी एनीगदेसे म्हन्बा मुला?”

४० तर थेनीगदेसे “चु म्हिदा आहिन, तर बारब्बादा ख्लासी पिन्गो” भिसी क्रिड्बान भिजी। बारब्बासे चा आन्दोलन लसी म्हि साइबा मुबा।

येशूदा सिबाला सजाय पिन्बा

मत्ती २७:१५-३१; मार्कस १५:६-२०;

लूका २३:१३-२५

१६ जमाहेन्से पिलातससे येशूदा भोर्सी कोर्सासे तोड भिसी रोमी सिपाहीगदेदा कुल्जी। २ कोर्सासे तोमाहेन्से सिपाहीगदेसे पुजुला फेटा स्होसी येशूदा थोड्सी पिन्जी, ओच्छे ग्लेसे क्वान्बा हड्बान वाला वाला पिङ्गै छोनना क्वानएनोन क्वान्सी पिन्जी। ३ ओच्छे येशूला

डामरी खसी, “लास्सो यहूदीगदेला ग्ले, फ्याफुल्ला” भिसी येशूदा खिसी लबान ग्रम्बारी तोबारी छ्याड्जी।

४ पिलातस दो:सी मडग्यार खसी थेरी मुबा म्हिगदेदा “च्यागो, डाइ चु म्हिदा सजाय पिन्बा तिगै दोष आस्याप्नी। चु ताम एनीगदेदा था तगै भिसी डाइ थेदा मडग्यार भबा मुला” भिसी भिजी। ५ येशू पुजुला फेटादेन वाला वाला पिङ्गै छोनना क्वान क्वान्सीन मडग्यार फेप्खजी। जमाहेन्से पिलातससे थेनीगदेदा “लु, च्यागो, चु म्हिदा!” भिसी भिजी।

६ परमेश्वरला मन्दिररी पूजा लबा मुल म्हिगदेदेन सिपाहीगदेसे येशूदा म्हाड्मैछ्याम “चुदा कुसरी टांगब लसी साइगो, कुसरी साइगो!” भिसी क्रिड्बाला क्रिड्बान लजी। जमाहेन्से पिलातससे थेनीगदेदा “चु म्हिदा एनीगदेसेन भोर्सी कुसरी टांगब लउ, तिगदा भिसम चु म्हिदा सजाय पिन्तो:बा तिगै दोष डाइ आस्याप्नी” भिसी भिजी।

७ यहूदीगदेसे थेदा “डन्ना ठिम गिक मुला थे ठिम अन्छार चुदा साइनोन तो:ला। तिगदा भिसम चुसे हाडसे हाडदान परमेश्वरला भा स्होबा मुला” भिसी भिजी।

८ चु ताम थे:सी पिलातस भन लोड्जी। ९ पिलातससे दो:सी दरबार न्हडरी वाड्सी येशूदा “ए खानडला हिन्ना?” भिसी ड्योड्जी। तर येशूसे थेदा तिगै जोहाब आपिन्नी।

१० थेतबासेलमा पिलातससे येशूदा “तिग ए डादेन छ्याम ताम आपाङ्? एदा ख्लासी पिन्बा अधिकार डादा मुला, ओच्छे एदा कुसरी टाँगब लसी साइबा अधिकारएनोन डादा मुला भिसी एदा था आरे?” भिसी भिजी।

११ येशूसे थेदा “चु अधिकार परमेश्वरसे आपिन्बा हिन्सम हाडसे डादा तिगै लबारी आखम्बसेला मुबा। थेतबासेलमा डादा हाडला जिम्मारी पिन्बा म्हिदा भन ल्हाना पापला दोष तला” भिसी सुङ्जी।

१२ चु ताम थे:सी पिलातससे भन येशूदा ख्लाबारी म्हाइजी। तर यहूदीगदेसे क्रिड्बान चुहङ् भिसी भिजी, “चुदे हाडसे चु म्हिदा ख्लाजी भिसम हाड रोमी ग्याल्बो कैसरला म्हि आहिन। जुन म्हिसे हाडसे हाडदान ग्ले हिन्ना भिसी पाङ्ला थे म्हिसे रोमी ग्याल्बो कैसरला बिरोध लबा हिन्ना।”

१३ चु ताम थे:सी पिलातससे येशूदा मङ्ग्यार भजी ओच्छे पिलातस युडबा तीबा खाङ्गारी निसाफ लबा ठिरी चिजी। थे युडबा तीबा खाङ्गादा हिब्रू ग्योइरी गब्बथा भिसी भिमुला। १४ थे धुइरी ओस्पन धिनना बाह बजब तसी जिन्बा मुबा। थे धिन चा मिश्र यहूल्साग्याम फेसी खबा धिनदा ढन्सी धङ्बा चाड धङ्बारी तयार लबा धिन मुबा। पिलातससे यहूदीगदेदा “च्यागो, एनीगदेला ग्ले” भिसी भिजी।

१५ तर थेनीगदेसे “चुदा कुसरी टाँगब लसी साइबारी भोर्नोन तो:ला” भिसी क्रिड्बाला क्रिड्बान लजी।

जमाहेन्से पिलातससे थेनीगदेदा “थेहङ् भिसम डाइ एनीगदेला ग्लेदा कुसरी टाँगब लसी साइगो?” भिसी भिमा, परमेश्वरला मन्दिररी पूजा लबा मुल म्हिगदेसे “रोमी ग्याल्बो कैसर बाहेक डन्ना स्थान्दो खालै ग्ले आरे” भिसी भिजी।

१६ थेतबासेलमा चु ताम थे:सी पिलातससे येशूदा कुसरी टाँगब लसी साइगो भिसी थेनीगदेदा जिम्मा लसी पिन्जी। जमाहेन्से येशूला जिम्मा सिपाहीगदेसे किन्जी।

येशूदा कुसरी साइबा

मती २७:३२-४४; मार्कस १५:२१-३२;

लूका २३:२६-४३

१७ येशूसे हाडला कुस हाडसेन पुइसी, “खप्परला ग्ला” भिबा ग्लारी फेप्जी, चु ग्लादा हिब्रू ग्योइरी गलगथा भिमुबा। १८ थेरी धोमाहेन्से थेनीगदेसे येशूदा कुसरी टाँगब लजी, ओच्छे य्हो न्हीदाएनोन गिकदा येशूला दाहिनेपट्टि गिकदा देब्रेपट्टि कुसरी टाँगब लजी। येशूदा चा गुडरी थान्जी।

१९ पिलातससे “नासरतला येशू, यहूदीगदेला ग्ले” भिसी भिबा ताम येशूला थोबो भन्दा फिरी कुसरी ठोकपुङ्जी। २० चु ताम ल्हानान यहूदीगदेसे पढब लजी। तिगदा भिसम येशूदा कुसरी टाँगब लसी साइबा ग्ला

शहरला डामरीन मुबा। चु ताम हिब्रू, ल्याटिनदेन ग्रीक ग्योइरी भिबा मुबा।
 २१ परमेश्वरला मन्दिररी पूजा लबा यहुदीगदेला मुल म्हिगदेसे पिलातसदा “यहुदीगदेला ग्ले” भिसी आहिन, तर चुसे डा यहुदीगदेला ग्ले हिन्ना भिजी भिसी भिउ” भिसी भिजी।

२२ पिलातससे थेनीगदेदा “डाइ जुन ताम भिसै, भिसी जिन्जी, तजी” भिसी भिजी।

२३ येशूदा कुसरी टांगब लमाहेन्से सिपाहीगदेसे येशूला क्वान भो ब्लि लसी ह्वाड ह्वाड न्हडरी भो लजी। ओच्छे थेनीगदेसे येशूसे न्हडरी क्वान्बा क्वानएनोन किन्जी, तर थे क्वान चा आहुप्ना तोरहेन्से मारधोनान रासी स्होबा मुबा। २४ थेतबासेलमा थेनीगदेसे “चु चा आढेगे, तर खाल्दा परब तबा चीम चिट्टा युसी च्यागे” भिसी ह्वाड ह्वाड न्हडरी ताम लजी। बचनरी भिबा ताम पूरा तबाला लागिरीन चुहङ् तबा मुबा। बचनरी

“थेनीगदेसे डाला क्वान ह्वाड ह्वाड न्हडरी भो लजी,

ओच्छे डाला क्वान किन्बाला लागिरी चा चिट्टा युजी”*

भिसी भिबा मुबा।

थेतबासेलमा सिपाहीगदेसे चु गे लजी।*

२५ येशूला आमादेन येशूला आमाला आडा ओच्छे क्लोपासला म्रिड

मरियमदेन मरियम मग्दलिनी येशूला कुसला डामरी राप्सी चिबा मुबा।
 २६ येशूसे ह्वाडला आमादेन ह्वाडसे माया लबा चेला डामरी राप्सी चिबा म्राइसी आमादा “आमा च्यागो, दाहेन्से चु ह्वाडला भा हिन्ना” भिसी सुङ्जी।
 २७ ओच्छे येशूसे थे चेलादाएनोन “च्यागो, दाहेन्से थे एला आमा हिन्ना” भिसी सुङ्जी। जमाकुनुहेन्से थे चेलासे येशूला आमा मरियमदा ह्वाडला दिमरी भोर्जी।

येशू सिबा


मत्ती २७:४५-५६; मार्कस १५:३३-४१;

लूका २३:४४-४६

२८ “दाहेन्से डाइ लतो:बा गे जिन्जी” भिसी येशूसे था याइसी बचनरी भिबा जम्मान ताम पूरा तगै भिसी येशूसे “डादा क्युड फुइजी” भिसी सुङ्जी।*
 २९ थेरी अडगुरला कम्बा निडगु मुबा ताड गिक मुबा। थेतबासेलमा सिपाहीगदेसे हिसप भिबा दोडला हाँगारी क्वानगेन खीसी थे निडगुरी ब्लुम्सी येशूदा ख्वाजी। ३० अडगुरला निडगु सोल्माहेन्से येशूसे “दाहेन्से डाला गे जिन्जी” भिसी थोबो कु लजी। जमाहेन्से येशूला सा निजी।

येशूला राइरी भालासे भ्लोबा

३१ थे धिन चा मिश्र यह्लसाग्याम फेसी खबा धिनदा ढन्सी धङ्बा चाड



हिसपला दोड (१६:२६)

धड्बारी तयार लबा धिन मुबा। चु धिन चा यहूदीगदेसे बलपबा न्हबा धिनना डाच्छाकुनु मुबा। न्हडगरदड मिश्र यहूल्साग्याम फेसी खबा धिनदा ढन्सी धड्बा चाड धड्बा धिन परब तबासे लमा जमाकुनुला बलपबा न्हबा धिन चा थेनीगदेला लागिरी मुल धिन मुबा। थेतबासेलमा थे मुल धिनकुनु कुसरी खालैलान लास आतगै भिसी यहूदीगदेसे हाड हाड न्हडरी सल्लाह लजी। ओच्छे थेनीगदे पिलातस मुबा ग्लारी निसी, “सिबाला सजाय पिन्बा म्हिगदे योनान सिगै भिसी थेनीगदेला काड क्युइसी कुसग्याम मार ते:पुङ्गो” भिसी बिन्ती लजी। ३२जमाहेन्से सिपाहीगदे खसी डाच्छा येशूदेन छ्यामनोन कुसरी टाँगब लबा म्हि न्हीला काड क्युइजी। ३३येशूलाएनोन स्थाप क्युइबारी

छ्याइमा थेनीगदेसे येशू डाच्छान सिसी जिन्बा म्राङ्जी। थेतबासेलमा थेनीगदेसे येशूला स्थाप आक्युइनी। ३४तर सिपाही गिकसे येशूला राइरी भालासे भलोमा येशूला राइग्याम कादेन क्युइ थोन्जी। ३५एनीगदेसेनोन विश्वास लखम्मौ भिसी चु म्राङ्बा म्हिसे जस्तो तबा म्राङ्बा मुबा थेहङ्बान पाङ्बा मुला। चु ताम सत्य हिन्ना भिबा थेदा था मुला। ३६“थेला नखु गिकनोन आक्युइ” भिसी बचनरी भिबा ताम पूरा तबाला लागिरीन चुहङ् तबा हिन्ना।* ३७दो:सी बचनना अर्गु ग्लारी “जुन म्हिदा थेनीगदेसे भलोला, थेनोन म्हिदा थेनीगदेसे च्याला” भिसी भिबा मुला।*

येशूदा धुसारी थान्बा

मती २७:५७-६१; मर्कूस १५:४२-४७;

लूका २३:५०-५६

३८यहूदीगदेदेन छ्याम लोङ्सी स्थान्दोसे था आयाङ्ना येशूदा विश्वास लबा अरिमाथिया भिबा शहरला योसेफ भिबा चेला गिक मुबा। थेसे पिलातसदेन छ्याम येशूला लास हीजी, जमाहेन्से पिलातससे थेदा “तला, भोगो” भिसी भिजी। जमाहेन्से थे निसी येशूला लास कुसग्याम मार ते:सी भोजी। ३९ओच्छे डाच्छा म्हुनड येशू मुबा ग्लारी निबा निकोदेमसएनोन बोगल गिकसे च्युक



मूर् (१६:३६)

सोम किलो ते मूर्देन घ्युकुमारी दोङ्सी स्होबा ज्यबा बास्ना खबा अत्तर भसी खजी। * ४० चुहङ् लसी थेनीगदेसे यहूदीगदेला ठिम अन्छार येशूला लासरी थे बास्ना खबा अत्तर फोर्सी मलमलला क्वानरी रिल्जी। ४१ येशूदा कुसरी टाँगब लबा ग्लाला डामरी बगैँचा गिक मुबा। थे बगैँचारी खालैलान लास आथान्बा छार धुर्सा गिक मुबा। ४२ यहूदीगदेसे ब्लप्बा न्हबा धिनना डाच्छाकुनुला धिन तबासे लमा थेनीगदेसे येशूला लास थे डामरीन मुबा धुर्सारी थान्जी।

येशू धुर्सारी आरेबा

मत्ती २८:१-८; मर्कुस १६:१-८;

लूका २४:१-१२

२० आइतवार स्थहोरीन मरियम मग्दलिनी^१ येशूला लास थान्बा धुर्सारी निजी। धुर्सारी धोसी च्यामा थेसे धुर्साला प्रापरी मुबा युडबा ले:सी जिन्बा प्राङ्जी। ^२जमाहेन्से थे थेग्याम याबान सिमोन पत्रुसदेन येशूसे माया लबा चेला मुबा ग्लारी निसी, “थेनीगदेसे यहाडला प्रभुदा धुर्साग्याम भोर्जीम! तर खानड भोर्सी थान्जी भिबा डन्दा था आरे” भिसी भिजी।

^३जमाहेन्से तुरुन्तन पत्रुसदेन थे चेला याबान धुर्सारी निजी। ^४थेन्नी छ्याम छ्यामनोन यार्सी निमा पत्रुसदा रूलासी थे स्थहान्दो चेला चा धुर्सारी डाच्छा धोजी। ^५धुर्साला प्रापग्याम योइ तसी च्यामा थेसे डाच्छा येशूदा बेरब लबा क्वान जे प्राङ्जी, तर थे धुर्सा न्हडरी आवाङ्नी। ^६सिमोन पत्रुसएनोन थे चेलाला लिच्छा लिच्छा खसी धुर्सा न्हडरी वाङ्सी च्याजी। थेसेनोन थेरी येशूदा बेरब लबा मलमलला क्वान जे प्राङ्जी। ^७येशूला थोबोरी बेरब लबा क्वान चा मलमलला क्वानदेन छ्याम आरेबा। तर जजाकी क्याथाडपट्टि

२०:२ मत्ती, मर्कुसदेन लूकारी च्यामा स्थहान्दो मिडम्हेमे न्हीएनोन मुला, तर चु पदरी चा स्थहान्दो मिडम्हेमे न्हीला मिन पाङ्बा आरे।

१६:३६ यूह ३:१-२

भसी पटट्याब लसी थान्बा मुबा।
 ८जमाहेन्से पत्रुस भन्दा डाच्छा
 धोखबा चेलाएनोन धुर्सा न्हडरी
 वाङ्सी च्याजी। चु म्राङ्माहेन्से थेसे
 येशू सिबाग्याम सोजीम भिसी विश्वास
 लजी। ६तिग्दा भिसम येशू सिबाग्याम
 दोःसी सोनोन तोःला भिसी बचनरी
 भिबा ताम थेनीगदेसे दान्देधोना घोबा
 आरेबा। १०जमाहेन्से थे चेला न्ही
 हाडला दिमरी निजी।

येशू मरियम मगदलिनी मुबा ग्लारी फेप्खबा

मत्ती २८:६-१०; मर्कूस १६:६-११

११तर मरियम मगदलिनी चा क्राबान
 धुर्साला डामरी राप्सी चिबा मुबा।
 क्राबान थेसे धुर्सा न्हडरी योइ तसी
 च्यामा, १२येशूला लास थान्बा ग्लारी
 तार क्वान क्वान्बा स्वर्गदूत न्हीदा
 म्राङ्जी, गिक येशूला थोबोपट्टि गिक
 स्थहापपट्टि मुबा। १३थे स्वर्गदूत न्हीसे
 थेदा “माइ, ए तिग्दा क्राबा?” भिसी
 ड्योइमा, थेसे थेनीगदेदा “म्हिगदेसे
 डाला प्रभुदा भोजीम, थे म्हिगदेसे
 प्रभुदा खानड भोर्सी थान्जी भिबा डादा
 था आरे” भिसी भिजी।

१४चुहङ् भिसी थेसे ग्याप्पट्टि च्यामा
 येशू राप्सी स्थूबा म्राङ्जी। तर थेसे
 येशून हिन्ना भिसी डोआसेनी।

१५येशूसे थेदा “माइ, ए तिग्दा
 क्राबा? एसे खाल्दा म्हाइबा?” भिसी
 सुङ्मा, थेसे येशूदा बगैचारी म्हेन्दो
 क्वबा म्हि मुनम भिसी, “ज्योज्यो,

हाडसे येशूदा चुग्याम भोर्बा हिन्सम
 खानड थान्बा मुला डादा सुङ्गो, डाइ
 थेदा भोर्ला” भिसी भिजी।

१६येशूसे थेदा “मरियम!” भिसी
 ड्योइमा, फ्लिक दोःसी थेसे येशूदा,
 हिबू ग्योइरी “रब्बोनी” भिसी भिजी।
 “रब्बोनी” भिबा चा “डाला गुरु”
 भिबा हिन्ना।

१७येशूसे थेदा “डादा चुङ्सी
 थाथान्ना, तिग्दा भिसम डा दान्देधोना
 आबा मुबा ग्लारी निबा आरे। तर ए
 डाला ज्योज्यो आले नाना आडागदे
 मुबा ग्लारी निसी थेनीगदेदा ‘डाला
 आबादेन एनीगदेला आबा ओच्छे
 डाला परमेश्वरदेन एनीगदेला
 परमेश्वर मुबा ग्लारी डा निबान मुला’
 भिसी पाङ्सी पिन्गो” भिसी सुङ्जी।

१८जमाहेन्से मरियम मगदलिनी
 चेलागदे मुबा ग्लारी निसी, “डाइ
 प्रभुदा म्राङ्जी” भिसी भिजी। ओच्छे
 येशूसे थेदा सुङ्बा ताम थेनीगदेदाएनोन
 पाङ्सी पिन्जी।

येशू चेलागदे मुबा ग्लारी फेप्खबा

मत्ती २८:१६-२०; मर्कूस १६:१४-१८;

लूका २४:३६-४६

१९थेनोन धिनकुनु ड्यसे येशूला
 चेलागदे यहूदी नेतागदेदेन छ्याम
 लोङ्सी म्राप दुङ्सी चिबा मुबा।
 थे धुइरीन येशू थेनीगदे मुबा ग्लारी
 फेप्खसी थेनीगदेला गुडरी राप्सी
 धन्छयाजी। ओच्छे येशूसे थेनीगदेदा
 “एनीगदेदा शान्ति तगै” भिसी सुङ्जी।

२० चुहङ् सुङ्माहेन्से येशूसे थेनीगदेदा हाङला यादेन राइ उन्जी। प्रभुदा म्राङ्सी थेनीगदे ल्हानान ताङ्जी।

२१ जमाहेन्से येशूसे दोःसीनोन थेनीगदेदा “एनीगदेदा शान्ति तगै! डाला आबासे डादा पुइखबा हङ् लसी डाइएनोन एनीगदेदा पुइबान मुला” भिसी सुङ्जी। २२ जमाहेन्से येशूसे थेनीगदेदा फू लसी चुहङ् भिसी सुङ्जी, “परमेश्वरला आत्मा किन्नो। २३ जुन म्हिला पाप एनीगदेसे माफ लला, थेनीगदेसे माफ याङ्ला, ओच्छे जुन म्हिला पाप एनीगदेसे माफ आल, थेनीगदेसे माफ आयाङ्।”*

येशू थोमा मुबा ग्लारी फेप्खबा

२४ येशू फेप्खबा धुइरी च्युक न्ही चेलागदे न्हङरी दिदुमस भिबा थोमा चा थेनीगदेदेन छ्याम आरेमुबा। २५ थेतबासेलमा स्थान्दो चेलागदेसे थेदा “डन्से प्रभुदा म्राङ्जी” भिसी भिजी। तर थेसे थेनीगदेदा “येशूला यारी खिल ठोकबाला पोर आम्राङ्तेधोना, ओच्छे थे पोरदेन राइला पोररी डाला या जुम्बी आभाङ्तेधोना डाइ विश्वास आल” भिसी भिजी।

२६ साता गिक लिच्छाएनोन चेलागदे दिमरीन म्राप हुङ्सी चिबा मुबा। जमा चा थोमाएनोन थेनीगदेदेन छ्यामनोन मुबा। तर येशू थेनीगदे मुबा ग्लारी फेप्खसी थेनीगदेला गुडरी राप्सी

धन्छ्याजी, ओच्छे “एनीगदेदा शान्ति तगै!” भिसी सुङ्जी। २७ जमाहेन्से येशूसे हाङला छ्या उन्बान थोमादा “एला या जुम्बी चुरी थान्गो, ओच्छे डाला या च्यागो। ओच्छे एला यासे डाला राइरी थुर्सी च्यागो। एसे शङ्का थालउ, तर विश्वास लउ” भिसी सुङ्जी।

२८ थेनोन धुइरी थोमासे येशूदा “डाला प्रभुदेन परमेश्वर!” भिसी भिजी।

२९ येशूसे थेदा “एसे डादा म्राङ्बासे लमा विश्वास लबा आहिन? तर जुन म्हिसे डादा आम्राङ्सैनोन विश्वास लला, थेसे गाते ल्हानान मोलम याङ्ला” भिसी सुङ्जी।

३० येशूसे हाङला चेलागदेला डाच्छा ल्हानान उदेकला गेदेन शक्तिशाली गेगदे लबा मुबा, थेतामगदे चुकिताबरी भिबा आरे। ३१ तर एनीगदेसे येशू परमेश्वरला भा थार्बा पिन्बा ख्रीष्ट हिन्ना भिसी विश्वास लगै भिसीन चुकिताब भिबा हिन्ना। थेदा विश्वास लसी एनीगदेसे जुकजुकधोनाला जुनी याङ्गै।

येशू हाङला चेला निस मुबा ग्लारी फेप्खबा

२१ जमाहेन्से येशू दोःसी गालील अञ्चलला तिबेरियास भिबा समुन्द्रला कुनीरी

ह्वाडला चेलागदे मुबा ग्लारी फेप्खजी।
 चुहङ् लसी येशू थेनीगदे मुबा ग्लारी
 फेप्खजी।^२ थेरी सिमोन पत्रुस, दिदुमस
 भिबा थोमा, गालील अञ्चलला काना
 भिबा शहरला नथानेलदेन जब्दियाला
 भा न्ही, ओच्छे स्थहान्दो चेला
 न्ही पोप तसी चिबा मुबा।^३ सिमोन
 पत्रुससे ह्वाडला ह्ोगदेदा “दाहेन्से
 डा मी तार्डा साइबारी निला” भिसी
 भिमा, थेला ह्ोगदेसे “डनीएनोन
 एदेन छ्यामनोन निला” भिसी भिजी।
 जमाहेन्से थेनीगदे दौंगारी क्रे:जी। तर
 थेनीगदेसे म्हुन गिकरी तार्डा गिकनोन
 चुङ्बारी आखम्नी।*

^४ य्हाल तबारी छ्याइबा धुइरी येशू
 समुन्द्रला कुनीरी राप्सी धन्छ्याबा
 मुबा। तर चेलागदेसे येशून हिन्ना
 भिसी डोआसेनी।^५ येशूसे थेनीगदेदा
 “कोलागदे, एनीगदेदेन छ्याम तार्डा
 मुला?” भिसी इयोइमा, थेनीगदेसे
 “आरे” भिसी भिजी।^६ येशूसे थेनीगदेदा
 “एनीगदेसे दौंगाला दाहिनेपट्टि घ्याड
 रोप्पो तार्डा स्याप्ला” भिसी सुङ्जी।
 थेनीगदेसे येशूसे सुङ्बा ग्लारी घ्याड
 रोप्पा ल्हानान तार्डा स्याप्बासे लमा
 घ्याडनोन छेङ्बारी आखम्नी।*
^७ येशूसे माया लबा चेलासे पत्रुसदा
 “थे मी प्रभु गा चीम” भिसी भिजी।
 “थे मी प्रभु गा चीम” भिबा थे:सी
 सिमोन पत्रुस ह्वाडला क्वान क्रेप्सरी
 खीसी समुन्दरी वाङ्जी। तिगदा भिसम

थेसे क्वान स्युबा मुबा।^८ तर स्थहान्दो
 चेलागदे चा दौंगारीन चिसी तार्डासे
 प्लिङ्बा घ्याड छेङ्बान समुन्द्रला
 कुनीरी खजी। समुन्द्रला कुनीग्याम
 थेनीगदे ल्हाना थारेड आरेमुबा,
 ओस्पन ग्यार्जा गिक मिटर ते जे थारेड
 मुबा।^९ समुन्द्रला कुनीरी धोखमाहेन्से
 थेनीगदेसे मेभुप्पारी तार्डा म्राङ्जी
 ओच्छे गेडएनोन म्राङ्जी।

^{१०} येशूसे थेनीगदेदा “एनीगदेसे
 भर्खर चुङ्बा तार्डा जजाकी भउ”
 भिसी सुङ्जी।

^{११} जमाहेन्से सिमोन पत्रुस दौंगारी
 क्रे:सी घेन घेन तार्डासे प्लिङ्बा घ्याड
 छेङ्बान पाखारी भजी। थेरी ग्यार्जा
 गिकसे बोगल न्हीसे च्युक सोम तार्डा
 मुबा। ओते ल्हाना मुसैनोन घ्याड चा
 आढेनी।^{१२} येशूसे थेनीगदेदा “चबारी
 खउ” भिसी सुङ्जी। तर चेलागदे
 खालैसेन येशूदा “ह्वाड खाल हिन्ना?”
 भिसी इयोइबा सेम आलनी। तिगदा
 भिसम येशू प्रभु हिन्ना भिसी थेनीगदेसे
 डोसेसी जिन्बा मुबा।^{१३} येशू फेप्खसी
 थेनीगदेदा गेडदेन तार्डा पिन्जी।
^{१४} येशूदा सिबाग्याम सोना लमाहेन्से
 ह्वाडला चेलागदे मुबा ग्लारी फेप्खबा
 चु सोमरेमला पालरी मुबा।

येशूदेन पत्रुस

^{१५} थेनीगदेसे चसी जिन्माहेन्से
 येशूसे सिमोन पत्रुसदा “यूहन्नाला

भा सिमोन, तिग एसे डादा चुगदेसे भन्दा ल्हाना माया लला?” भिसी सुङ्जी।

जमाहेन्से पत्रुससे येशूदा “हिन्ना प्रभु, डाइ हाडदा माया लमुला भिबा ताम हाडदान था मुला” भिसी भिमा, येशूसे थेदा “थेहङ् भिसम एसे डाला ग्युला कोलागदेदा^१ ज्यना लसी छउ” भिसी सुङ्जी।

^{१६}येशूसे दोःसी, “यूहन्नाला भा सिमोन, तिग एसे डादा माया लला?” भिसी सुङ्जी।

जमाहेन्से थेसे येशूदा “हिन्ना प्रभु, डाइ हाडदा माया लमुला भिबा ताम हाडदान था मुला” भिसी भिमा, येशूसे थेदा “थेहङ् भिसम एसे डाला ग्युगदेदा ज्यना लसी च्यागो” भिसी सुङ्जी।

^{१७}येशूसे दोःसीनोन थेदा “यूहन्नाला भा सिमोन, तिग एसे डादा माया लला?” भिसी सुङ्जी।

येशूसे चुहङ् लसी सोमरेमधोना “तिग एसे डादा माया लला?” भिसी सुङ्बासे लमा ल्हानान आज्यना इहम्सी पत्रुससे येशूदा “प्रभु, हाडदा जम्मान ताम था मुला। डाइ हाडदा माया लमुला भिबा तामएनोन हाडदा था मुला” भिसी भिजी।

जमाहेन्से येशूसे थेदा चुहङ् भिसी सुङ्जी, “थेहङ् भिसम एसे डाला ग्युगदेदा ज्यना लसी छउ। ^{१८}एसे डाला ताम इयान्गो, ए भ्योन मुबा धुइरी एसे हाडला के: हाडसेन खीमुबा, ओच्छे जुन ग्लारी निबा सेम लमुबा थेरीन निमुबा। तर खेप्बा दोमाहेन्से एसे तिगै लबारी आखम, एदा स्थान्दो म्हिसे के: खीसी पिन्ना ओच्छे जुन ग्लारी एदा निआम्हन थेरीन एदा भोर्ला” भिसी सुङ्जी। ^{१९}चु ताम चा परमेश्वरदा मान लबादेन जयजयकार लबारी पत्रुस खाहङ् लसी सितोःला भिसी येशूसे सुङ्बा हिन्ना। चु ताम सुङ्सी जिन्माहेन्से येशूसे पत्रुसदा “ए डादेन छ्याम भ्रउ” भिसी सुङ्जी।^१

येशूसे माया लबा चेला

^{२०}पत्रुससे ग्याप दोःसी च्यामा येशूसे माया लबा चेला लिच्छा लिच्छा खबान लबा म्राङ्जी। चुनोन चेलासे भोज चबा धुइरी येशूला डामरी चिसी, “प्रभु, हाडदा चुङ्सी पिन्बा म्हि खाल हिन्ना?” भिसी इयोइबा मुबा।^{*} ^{२१}थेदा म्राङ्सी पत्रुससे येशूदा “चुला चा तिग तला?” भिसी इयोइजी।

^{२२}जमाहेन्से येशूसे पत्रुसदा “डा

२१:१५ “ग्युला कोलागदे” भिबा चा येशूदा विश्वास लबा म्हिगदे हिन्ना।

२१:१६ ल्हाना हङ्बा बाइबल विद्वानगदेसे पत्रुसदा बोगल गिकसे च्युइ दिङ लिच्छा थोबो ग्युरो लसी कुसरी टांगब लसी साइजी भिसी पाङ्बा मुला।

२१:२० यूह १३:२५

आखतेधोना थेसे डादा भ्रान्सी चिगै
 भिबा डाला सेम मुसैनोन एदा तिग्दा
 तो:जी? ए चा डादेन छ्याम भ्रउ”
 भिसी सुङ्जी। २३थेतबासेलमा थे
 चेला आसिनम भिबा ताम स्यहान्दो
 चेलागदेसे था याङ्जी। येशूसे मी थे
 आसि भिसी सुङ्बा आरेमुबा, तर “डा
 आखतेधोना थेसे डादा भ्रान्सी चिगै
 भिबा डाला सेम मुसैनोन एदा तिग्दा
 तो:जी?” भिसी जे सुङ्बा मुबा।

२४चुनोन चेलासे चु जम्मान ताम
 पाङ्बा हिन्ना, ओच्छे थेसेन चु ताम
 भ्रिबा हिन्ना। थेसे पाङ्बा तामदेन
 भ्रिबा ताम सत्य मुला भिसी डन्दा था
 मुला।

२५येशूसे अर्गुएनोन ल्हानान गेगदे
 लबा मुला। थे जम्मान गेला बारेरी
 भ्रिबा हिन्सम चु किताबगदे जम्बुलिङ
 नाङनोन आवाङ्सेला मुबा भिसी डाइ
 म्हन्मुला।